

# سُرتال

گور بھجن گل



# سُرتال

(پنجابی غزلاں)



## ایسے قلم توں:

(شعری پراگا)	شیر گھوٹ بولدا ہے
(غزل پراگا)	پراگھندہ اپنڈ میرا ہے
(شعری پراگا)	بال مٹی دیا دیا
(شعری پراگا)	اکن کھن
(شعری پراگا)	خیر ہانکاس پائیاں دی
(شعری پراگا)	دھرتی تار
(گیت پراگا)	پھلاں دی جہاں جہاں
(شعری پراگا)	پار دشتی
(غزل پراگا)	مور پتھر
(شعری پراگا)	من تندور
(غزل پراگا)	گلکار
(غزل پراگا)	مرگولی
(غزل پراگا)	راوی
(زعمائیاں)	سہموردانی
(گیت پراگا)	آٹاں پٹیاں
(غزل پراگا)	دو طرفہ سیدی
(انکھاں)	چرنوی
(نثر)	کسرے دی اکھ بولدی
(دوویں کتاباں تاج پر تاپ سنگھ سندھو دے)	چنے پنے لکھی مبارت (زمائیاں)
(چراں نال)	

لکھک دیاں رچناواں دے ہور ناں ولوں مرتب کیجے پراگے

(شعری پراگا)	غرض سمندر
(غزل پراگا)	دو طرفہ سیدی
(غزل پراگا)	من دے لہے باریاں
(غزل پراگا)	تاریاں دے تال گاں کردیاں

سُرتال

گور بھجن گل



پنجابی لوک وراثت اکیڈمی

لدھیانہ

یورپین پنجابی سٹھ والے ویر  
موتا سنگھ سرائے تے امن دیپ سنگھ پھلڑ لدھیانہ  
ورگے اُبنّاں دھرتی پتراں دے ناں  
جیہناں نے دُلا بھٹی توں لے کے اج تیک  
دھرتی دی لوک پکھی سنگھرش مریدا نوں  
پرسارن تے پرچارن وچ مہتوپورن حصہ پایا



سنکیچ: اسیس کور ٹیل

جھٹکھڑا ہے جھٹکھڑا: کہیاں ہن ڈوہے ڈپ میں عین  
 قرض دھون مردہ رہی اے کاکاں غیورن سر ہے عین  
 مردہ کلاہر عات یرہ وید تعلیم مچھراں کروے  
 وکیہ مکائے آئیاں پڑاں، مٹی ٹانڈے ڈھاک ہے بھڑیا



## **SUR TAAL (Shahmukhi)**

Collection of Ghazals by

© Gurbhajan Singh Gill

113-F

Shaheed Bhagat Singh Nagar,  
Pakhawal Road, Ludhiana, 141013

Ph : 9872631199

Email : Gurbhajansinghgill@gmail.com

Transliteration by : M. Asif Raza

ISBN : 81-87526-91-2

Price : 300/-

15 March 2022

*Sole Distributor*

**Singh Brothers, Amritsar**

*Publishers:*

**Satvik Books**

S.C.O. 225, City Centre  
Amritsar

**Punjabi Lok Virasat Academy**

Ludhiana

*Printed at*

**Printwell**

146, Industrial Focal Point, Amritsar

## ویرا

- 13 غزلاں دی زرخیز زمین (سُرجیت پاتر)  
 19 خوشیاں نال بھریاں جھولیاں، پرہسن لئی وقت نہیں  
 21 سرچڑھ کے اچ بولے گی جی، جو جو پائی ووٹ مبارک  
 22 پیار دا بُوٹا روح وِچ لایا جاندا اے  
 24 نیم گلابی ہوٹھاں اُتوں، چُپ دے جندرے کھول دیا کر  
 25 کیہڑے کم آئیاں ساڈے دوستو فقیریاں  
 26 سُن لہو جی کن کھول کے سُن لہو، پتھر دل تے بھار نہیں ہوندا  
 27 پرکھتاں ہریا ولے سی کیوں پتر ہرے؟  
 28 ایویں گم سم، گم سم، چُپ چاپ رہنا  
 29 لوک اڈیک رہے نیں جھنڈے، ساڈے حق وِچ کجھ تے تولن  
 30 ایہہ تُوں کدھر تریا پھر دیں، ہر رشتے دا ناں نہیں ہوندا  
 31 چچھدے نیں لوک جی، ہنیر اکدوں ملنا  
 32 حق سچ تے انصاف دی ویکھی، میں تاں کتے دُکان نہیں  
 33 آکوٹھے تے منجیاں ڈاہ کے، تاریاں دے سنگ گلاں کریئے  
 34 من مندر دی ٹلی ٹوں، ٹیکار لیا ہے  
 35 امبروں کریا اک اڈھ اتھرو، پس وِچ جے پل جاوے گا  
 36 کیہ بدگنی ہوگئی میتھوں، گُمیا چن گواپے تارے  
 37 میری ماں تے بابل بن گئے، باتاں گزرے کال دیاں بن  
 38 کٹنڈے جندرے کیوں لاؤندے ہو، چچھدے نیں بند بوہے  
 39 پھر رہیا ایہہ کون، تلیاں ٹکا، انگیار ٹوں  
 40 مہک رہی مُسکان پیاری، ہائے توبہ  
 41 قطرہ قطرہ تپکا تپکا دل جے درد سمندر بھریا  
 42 شہنشاہی کفر جد وی بولدا ہے

43 خبر ہی نہیں، میں بھلا کیہ کر رہیا ساں  
 45 چل نی بھینے آ پاں رل کے، ویراں دے سنگ قدم ودھائیے  
 46 کیوں ہوئی دا بھرم پالدریں، ایہہ رنگ کچے لہہ جانے میں  
 47 میں سترگی پینگھ چڑھائی، امبرتیک ہلارے مل گئے  
 48 من مستک وچ پہلاں آ پے جنگل دا دستھار کرن گے  
 50 ماں جائے وی اپنی تھاں میں، رشتہ تاں وشواس داناں ہے  
 52 ہوش دے نالوں مستی چنگی، پر نہیں چنگی بے پرواہی  
 53 جگ رہیا سورج دا گولا دھند وی ڈاڈھی گھنی ہے  
 54 سرد سیال تریل چ بھجیاں لف لف جان گلابی پیتاں  
 55 حق سچ تے انصاف دی خاطر جس ویلے انسان بولدا  
 56 بندیاں کولوں چھاواں منگن، چھانگے برکھ وچارے ہو گئے  
 57 زندگی چ کدے پیا ایسراں نہیں کریدا  
 58 تن من اندر سواس وانگراں پنج ککار دکھاوا نہیوں  
 59 ساڈے من دی گلی چوں اج کون لنگھیا  
 60 مر چلے ہاں دم دم کر کے رشتیاں دی پرکرم کر دے  
 61 دھیٹے نال پتیٹے رل گئے، پی گئے داڑو دا دریا  
 63 پیار دے راہ وچ دستوتاں سہی کس نوں نہیں درد ملے  
 64 نشپا دھار ترو تاں قادر منزل نیڑے کر دیندا اے  
 65 تاریاں دے نال ایویں ضد نہیں پگائی دی  
 66 مارن کھنڈا سا نہ ہمیشہ سُرخ و ستروں ڈردا ہے  
 67 کیہ پچھدے ہو باتاں یارو، اتھرے دل دلیکیر دیاں  
 68 سجنان بگیچویں گلاب بھیجیا  
 69 ویکھو پیار نال جے عینک اتار کے  
 70 دھرتی میرے چار چنڈیرے، روح دے اندر وار سمندر  
 71 شیراں دے شکاری کدے بکری نہیں پال دے  
 72 میں اوہ برکھ کسے نہیں ڈٹھا، جس دیاں ہوں نہ چھاواں ہو  
 73 پوناں ہتھ سنبھا گھلیا، اس نوں خود پروان کرو جی  
 75 وطن اساڈا چوراں والی، جتھے دھرم ایمان توں چوری

76 تر رہیا ہے وقت سچے، صرف اِکو چال نال  
 77 زندگی بچ کدے پیا ایسراں نہیں کریدا  
 78 کہہ دینداں، پرورتاں نہ میں، شبد کدے ہتھیار دے وانگ  
 79 ویڑھے دے وِچ رکھڑا لائیں چاواں لئی  
 80 راجیاں نوں یاد نہ جے قول اقرار ہے  
 81 نہ مطلع نہ مقطع ایہہ تاں درد کہانی رات دی  
 82 کچیاں گھراں دے بوہے کندھاں نوں سنبھالیے  
 83 نہ گھراویں جین جو گیا، اج مگروں ہی کل ہوندا اے  
 84 اک پڑتھلے دو جا اُتے، پیش رہے چکی وِچ دانے  
 86 داس کیردی جکھی ہے کیوں گل کٹھن دے پاس اے وی  
 87 ساڈے ہوندے سُن دیاں پنجاب گیا ٹھگیا  
 88 بڑا ہی ورجیا خود نوں ایہہ کہیوں رہ نہیں سکدا  
 89 چکی پھردیں لاش اے وی، تن حیدر امن اندروں مریا  
 90 بچ جا پنجاب سیہاں، چوکیدہ کہہ گیا  
 92 عوامی شاعر اُستاد امن دے نال  
 94 رات ہیری ہوکا دیویں، آکھیں بارم بار او یار  
 95 میں تیرے ساہاں حاضر، الوداع کہنا نہیں ہے  
 96 میرے ہتھ وِچ سورج نہیوں، دیوا ہے اک ٹمک رہیا  
 97 دن چڑھدے توں شام تیک جد یاداں جھرمٹ پوندیاں نیں  
 99 ہمیشہ ڈھال ہی بننا، کدے ہتھیار نہیں بننا  
 100 میں وی نزل نیر کدے سی ستیج داساں وہن دوستو  
 101 رن بھومی نے روپ بدلایا، انٹرنیٹ میدان بن گیا  
 102 کبیدی اے مجال ساناں ڈبی وِچ پا لوے  
 103 پکاں او لھے لکھا سورج، چڑھدا تاں پر بھات ویکھدے  
 104 تن دی بھٹکن، من دی اٹکن، ثابت قدم اڈول رہے  
 105 جیہناں ہتھ کنجیاں نیں اوہ لاگے بہن نہیں دیندے  
 106 ایس وطن وِچ گھر کتھے ہے، خالی چار دیواراں نیں  
 107 تان دیو ہریالی چھتری، دُھے سڑدی دھرتی ماں جی



108 بھگتِ سرابھّا اودھم سکھتاں آنکھی رٹ کر دارِ داناں ہے  
 109 سارا جنگل ساڑ لیا ہے، سوچ ذرا کیوں آپاں کھپے؟  
 110 کدے وی آس دے دیوے، ہوا توں ڈرنہ دینا  
 111 چیکدے سارے کہ ایہہ تاں رجیاں دے گھر بھرے  
 113 میں اکھیں تک کئی واری، بدل وی محبتاں کر دے نیں  
 114 سُنیا سی رُتاں اکسار نہیوں رہندیاں  
 115 بن ملیاں توں میرے دل دی، بات کس طرحاں کہہ جاندا ایں؟  
 116 ڈھیری ڈھاہ کے بہہ جاندا ایں، ایس طرحاں نہ کریا کرتوں  
 117 زندگی! تیرے ورگے سجن سارے نہیں ہوندے  
 118 میں جو آکھیا، اوہ میرا ہے، ایس گل توں انکار نہیں  
 119 چل گھمیا راگنھ کے مٹی، دیوے گھڑ دے چانن لئی  
 120 جہر ظلم دی پیگنھ سکھر جد پینچے اتیا چاراں تے  
 121 کس دروازے دیپ دھراں میں، من مستک وچِ نھیر پیا ہے  
 122 تک لے لکھیا دھراں والے، کیسی امر ویل نے گھیرے  
 123 کیہ دشاں فی خوشبو جیہے، میں تے ہر پل ایہو چاہواں  
 124 چھڈ دے آلس بھراوا، وقت نہیں کرنا خراب  
 125 صبر صدق سنو تھک سمرین، سچ سلیقہ شامل کر دے  
 126 تیرا دتا زخم میں کپھڑا جریا نہیں  
 127 شبد ہمیشہ چُپ رہندے نیں، جس ویلے کردار بولدا  
 128 بنی زندگی نمائی لگی اوڑکاں دی پیاس  
 129 شام گھٹاں چڑھ آئیاں مُڑ کے، سانوں گھرنوں موڑ مہاراں  
 130 امبراں چ آڈ دے غبارے بنی کمال ہے  
 131 رنکھ چوڑے والی دھی نوں سپنیاں خاطر امبر دیویں  
 132 چھا نگلیاں برکھ اُداس کھڑا ہے، لبھدا انگلیاں ٹاہنیاں ٹوں  
 133 راتیں تینوں یاد کر دیاں، واہوا لڑیاں تیرے نال  
 134 صدیاں توں ہی لوک وچارے، مگلتیاں خاطر سوچ رہے نیں  
 135 سکدے سکدے نیک چلے نیں، یار میرے دریاواں ورگے  
 137 شہر خاموش دے بُوے بند نیں، مُونہہ وچ جیویں زبان نہیں ہے

138 تُوں پچھیا ہے، غزل لکھاں میں، بہتا کپھڑے بحر دے اندر  
 139 سوچ دے ڈوٹگھے سمندر تر دیاں وی  
 141 کئی جنماں تُوں وچھڑے آپاں، آجا دوویں اک ساہ ہوئیے  
 142 میری روح دے اندر وار کتے، ایہہ جگدا مگھدا نور جیہا  
 143 سنگڑے نیں لوک جیہڑے رلے دھوناں وچ  
 144 بڑا سوچیا کہ تینوں ہور گچھ وی نہیں کہنا  
 145 دیکھن والی اکھ نہیں لہدی، قدم قدم تے رُلدے ہیرے  
 146 من دی بستی دیکھن نوں تاں، اُسری ہے، آباد نہیں  
 147 کن کر کول میرے، سوہنے چن کھنا  
 148 میرے ساہاں جے کچھ تازگی ہے  
 149 کالھی کالھی ہر پل کالھی، کچھ پل میرے کول تاں بہہ جا  
 150 دل تے بھار بڑا ہے بھادیں، اتھرو بن کے ویہہ نہیں سکدا  
 151 میری روح دے اندر وار کتے اک جوت الہی جگدی ہے  
 152 بھل کے وی ورلاپ نہ کریئے مرکیاں دریاواں دا  
 153 کیوں مردے ہو مارن لگیاں، مینوں مارو پیار دے نال  
 154 دیکھیں اک دن گھل جاوَن گے، صدیاں تُوں بندتالے  
 155 تنہی دے کھنھاں تے لکھ کے، ایہہ جوتوں پیغام بھچیا  
 156 کیو بادے اُکھیلے صدر فیڈل کاسترو دے مرن تے  
 157 آکھوندر چل تڑ چلیے، وقت دیاں دیواراں اولھے  
 158 کئے سورج چڑھ کے لہہ گئے، وقت لحاظ کدے نہیں کردا  
 159 نہ سی کالی عینک اکھیں، ہتھاں وچ دستانے  
 160 گولی مار، بندوق چلاؤ، شہد کدے وی مردے نہیں  
 161 سال مگروں پھیر مڑ کے آگئی شور اُتری  
 162 شہنشاہی کفر جد وی بولدا ہے  
 163 اج کاہنوں ہوئیاں تینوں نیندراں پیاریاں  
 164 کون کہندا ہے محبت مگدی پرواگی  
 165 تُوں تے مینوں آپ کہیا سی، دھرتی دھرم نبھائیں رل کے  
 166 ٹکیا رہ ہمدردا وڈیا، مریاں تُوں نہیں ماریدا

167 کسہڑے کم آئیاں ساڈے دوستو فقیریاں  
 168 کنڈے چندرے کیوں لاؤندے ہو، چچھدے میں بند بُو ہے  
 171 مہک رہی مسکان پیاری، ہائے توبہ  
 172 گرد غبار ہنیر چغیرا ہمت کر کے ہونجھو یارا!  
 173 تیرا دتا زخم میں کسہڑا جریا نہیں  
 174 دل دا کمال دیکھ، پہلاں تاں نہیں بولدا  
 175 راجیاں تُوں یاد نہ جے قول اقرار ہے  
 176 عمر گزاری جیہناں ساری، وطن میرا برباد کر دیاں  
 177 ساڈے من دی گلی چوں، اج کون لنگھیا  
 178 بڑا ہی ورجیا خود تُوں، ایہہ کہینوں رہ نہیں سکدا  
 179 ماں دھرتی، جہنی، ماں بولی، جسراں آپاں بھل چلے آں  
 180 چین دا ٹکڑا پہن دودھیا، جد سپنے وچ آجاندا ہے  
 181 اے ولا! جد تک تریں گا، روشنی دے نال نال  
 182 کدے وی آس دے دپوے، ہوا توں ڈرن نہ دینا  
 183 سورج جان توں مگروں تاں بس کجھ پل گلدے رات بنن لئی  
 184 مر چلے ہاں آپاں یارو، چُپ رہ کے نہ بولن کر کے  
 185 درد سیاہی نال توں لیکاں واہیاں نیں  
 186 اِس دھرتی تے ورے ورے سکٹ سَمیں سہارے بندے  
 187 ملدیاں تینوں میرا کیسا مقدر ہو گیا  
 188 اک ادھ بول سنا دے مینوں حالے دل نہیں بھریا یار  
 189 ٹالھی توت پھٹارا پھٹیا ویکھ مہینہ چتر چڑھیا  
 191 اگ نال کھیڈیے انگاراں نال کھیڈیے  
 192 جان والیا جانہ بیبا، اک واری فیر میرا ہو جا  
 193 شاماں تُوں سورج جان دیاں اقرار کر گیا  
 194 وا تا ورن گڑدا جاوے، لا دیئے وشواس دا بُوٹا  
 195 دیس پنجاب دے بر خور دار اپنی سرت سنبھال دولیا  
 196 رات پئی ہے، پھر کیہ ہو یا، میں نہ ہن دِگیر بناں گا  
 197 جھڑ گئے پت پُرانے بھائیں، رت نویاں دی آئی نہیں

## غزلاں دی زرخیز زمین

گر بھجن گل کول غزلاں دی بہت زرخیز زمین ہے۔ زرخیز زمین دوہاں شبدان  
دے جوڑ وچ عیب اے تنافر ہے پر غزل دے پرسنگ وچ شبد زمین ہی سجدا  
ہے۔ پر جے ایہناں دوہاں شبدان نوں احتیاط تے ٹھرے نال پڑھیا جاوے تاں  
ایہناں دی سانجھی دھن وچوں اک مٹھاس وی ملدی ہے۔  
گر بھجن گل زرنتر شاعر ہے، کدی کدائی، ورھے چھمائی لکھن والا شاعر نہیں۔  
اوہ لکھدا ہے:

گیت، غزل، کویتاواں مینو رات دے انوواد کردیاں  
کھورے کھڑا شبد کسے نوں کیہڑے ویلے بھا جاندا ہے  
غزل نوں پردیسی تے جاگیر و صنف کہہ کے بہت دیر آ پروان کیتا جاندا رہا  
، پر شکر ہے اس نوں سدھا جواب دین دی وی لوڑ نہیں پئی۔ اجو کے سمیاں وچ تے  
بہت ساریاں دھرتیاں تے بے حد مقبول ہو کے اس نے پنا کہیاں ہی ثابت کر دتا  
کہ سوہنیاں صنفان کدے نہیں مردیاں۔ ہر یگ وچ تے ہر دھرتی تے اوہ  
اوسدیاں ہو جانیاں ہن۔ اوہناں وچ بہت کجھ سمون دی سمر تھا ہوندی ہے۔  
گر بھجن دیاں غزلاں وی اس سچ دا پرمان ہن۔ اوس دیاں غزلاں ہر پکھوں  
پنجا ب دی دھرتی دیاں جائیاں لگدیاں ہن۔ اوہناں وچ پنڈ، کھیت، کیرت سبھ



سموئے ہوئے ہن۔ اس سنگرہ وِچ شریںہہ، ٹالہلیاں توت وی حاضر ہن۔ گھوہ وی  
تے تُوڑی دی پِنڈ وی تے جُوہ وِچ چر دے پُشو وی، رنبی پئی وی:

سر سی بھاری ذمے واری، کھسکدیاں گنڈ کھسکی ایسی  
وِچ دریا دے تُوڑی دی پِنڈ وانگ بھراؤ گھل چلے ہاں

بھر بھر ٹنڈاں جتھوں مال لیاؤندی سی بنی پانی  
دیکھو ساڈے دیکھدیاں ہُن خالی ہو گئے گھوہے  
کھسکی جُوہ دے اندر فرن ٹولے بے لگامے جو

توں اپنی فصل اندر ورج، اتھے چرن نہ دینا

گھوڑ سوار حکومت کردے، وارو واری وقت سواری

اوہی رنبی، اوہی پئی، گھائیاں دے پُت اج وی گھاہی

اُس دی بولی، لہجہ تے مثالاں وی پِنڈ دے سیانے جہیاں ہن:

نچ جا پنجاب سیہاں چوکیدار کہہ گیا

اونا تاں بچا لے، جِنّا پلے تیرے رہ گیا

زرمے دی پِنڈ بھاری، تُریا رہیں رُکیں نہ

اُٹھیاں نہیں جاناں جے توں پانی وِچ بہہ گیا

چین وی تاں اُٹھیا سی فیم دے پہاڑ چوں

جگ سارا کوکدا سی ڈھبہ گیا بنی ڈھبہ گیا

کئی دیسی لفظاں دا دیسی پن تاں ایناں گوڑھا ہے کہ اُس نوں غزل دے

پٹھ شہد ارتھ وی دینا پیا ہے:

دھیٹے، پُتیتے، دوکھڑی، گھریکنا، بوہیاں، پڑاوے، ٹانڈ، گھڑونجی، صبرکتا، چوپ،

ترنگڑ، جُھنب، دُپڑ، اُوری، مُورا، دکڑے۔

شہداں تو علاوہ اُس دیاں غزلاں دیاں بحراں وی پنجابی دیسی چھندا دیاں ہن:

سجناں بگیچو گلاب بھیجیا  
 پنا لکھے خط دا جواب بھیجیا  
 ساڈے دل بھیج ہور سندی سویر  
 اساں تینوں راوی تے چناب بھیجیا

•  
 کیہڑے کم آئیاں ساڈے دوستو فقیریاں  
 پہلی ہی قطار مل بہندیاں وزیریاں  
 وکھ لو گھمائی جاوے عقلان دے گیڑ نوں  
 کئی وار جاپدا اے بن گئے بھمیریاں

•  
 پچھدے نے لوک جی ہنیرا کدوں مگناں  
 پاپ والی جنج ایتھوں ڈیرا کدوں چکناں  
 کدوں تیک رہنا جی ہنیر گھپ گھیر ہے  
 کدوں تیک رہنا ہے نشانیاں توں، اُکناں

•  
 صرف وراثتی شہزادولی نوں ہی نہیں گربھجن نے اپنے اجوکے پنجاب نوں وی  
 سموچے سماجک، سبھیاچارک تے راجنیتیک ورتاریاں سمیت آپنیاں غزلاں وچ سموئیا  
 ہے:

غمگین جیہا دل بھاری ہے، بن چلیا نری مشین جیہا  
 دن رات چرکھڑی گھمے پئی، بس اپنے لئی وقت نہیں

دِن رات سرکدے سبھ پہیے، ہُن ہور کسے نوں کیہ کہیے  
 آپنی ہی زندگی جیؤن لئی ہُن آپنے کول ہی وقت نہیں  
 چین دیاں لڑیاں دا بھادیں، چان ملدا ستے بھاء  
 میں تاں دیوے بال ہنیرا میٹوں فرض پچھان لئے  
 پون گورونوں گندھلا نہ کر، شام پئی توں دِن ڈھلیاں  
 گل عالم وچ خوشیاں ونڈتوں، ملیاں نیں جو مانن لئے

نثیاں سمیت کئے ویلاں تینوں ماریا  
 ایویں تاں نہیں پہیا تیرا پٹری توں لہہ گیا  
 نرمے دی پنڈ بھاری، تڑیاں رہیں رُکی ناں  
 اُٹھیاں نہیں جاناں جے توں پانی وچ بہہ گیا  
 چین وی تاں اُٹھیا سی فیم دے پہاڑ چوں  
 جگ سارا کوکدا سی ڈھہہ گیا بی ڈھہہ  
 دلی وچ درباری دیکھو دُدھ وچ کانچی گھول رہے نیں  
 ہوش ہواس گوا بیٹھے نے جو جی آئیاں بول رہے نیں  
 کرسی عجب خماری دے وچ نال حقیقت پائے وچھوڑا  
 دھرم دھراتل والے پاوے، تانہیوں پیروں ڈول رہے نیں

اُس دیاں پیار۔ غزلاں دارنگ وی گُوڑھا پنجابی ہے:  
 ساڈے من دی گلی چوں اچ کون لنگھیا  
 وے میں جیہدے کولوں بن بولے دل منگیا

مینوں سُدھ بُدھ بھُلّی، ہوئی چند ادھ موئی  
 جدوں والاں وِچ اُس نے گلاب ٹنگیا  
 لاجوتی دے وانگ میں وی کھولی نہ زُبان  
 اوہ وی چھوئی مُوئی چھوئی موئی بڑا سنگیا



وِکھو پیار نال جے عینک اُتار کے  
 مٹدی پیاس اس طرحاں اگھاں تُوں تھار کے  
 چنگا نہیں جی اسطراں کنڈ کر کے پرتاں  
 چلے کیوں ہو سوہنیوں جیدے نوں مار کے



میں تیرے ساہاں بچ حاضر، الوداع کہنا نہیں ہے  
 اک پل کیہ، اک ساہ وی دور میں رہنا نہیں ہے  
 پلک دے اندر نورانی روشنی وِچ گھل گیا ہاں  
 ایس تھاں بن ہو رکھڑے میں کدے بہناں نہیں ہے  
 توں کدے وی شام ویلے ایہہ کہیں نہ جان دے ہُن  
 بن سواساں جین والا درد میں سہنا نہیں ہے  
 پوناں ہتھ سُنہیا گھلیا، اِس نوں خود پروان کرو جی  
 اپنی ڈوگھی چُپ دھاری ہے گچھ تاں میری جان کرو جی

گُربھجن گل دی غزل دے سروکار پنجاب دے دراں گھراں، کھیتاں  
 کھلیہاناں، پگڈنڈیاں شاہراہاں، ڈھاریاں محلاں، راجے رنکاں، انہونیاں تے



کہندے کہاوندیاں تک پھیلے ہوئے ہن۔ اتے اس سبھ گُجھ دے درمیان گُور بھجن  
گلِ داموہ تے روہ برقرار ہے۔ شبد وِچ اُس دی آستھا قائمِ دائم ہے۔ ستکورو،  
صوفیاں سنتاں توں ملدا چانن انگ سنگ ہے، گبھرو آں مُٹیاں راں نوں ملدی اُسدی  
اسیں جیوندى جاگدی ہے۔

سُر تال دی آمد تے میرے ولوں بہت بہت مُبارکاں، دُعاواں تے شُکھ  
اچھاواں۔

سُرجیت پاتر

〇〇



خوشیاں نال بھریاں جھولیاں نیں، پر ہسّں لئی ہی وقت نہیں  
دن رات دوڑدی دُنیا وچ، بس اپنے لئی ہی وقت نہیں  
اکھیاں وچ نیندر قہراں دی، بے چین ہے تن من سارا ہی  
گھر بیچ مَملی سُنّی ہے، بس سون لئی ہی وقت نہیں  
غمگین جیہا دل بھاری ہے، بن چلیا نری مشین جیہا  
دن رات چرّھوی گھمے پئی، ہُن رون لئی ہی وقت نہیں  
اسیں سارے رشتے مار لئے، اوہناں دے استھ وی تار لئے  
اِس تن دے لیراں چولے نُوں، دُناؤن لئی ہی وقت نہیں  
پیسے دی ہوڑ بیچ دوڑ رہے، کر اپنا اگا چوڑ رہے  
راہاں وچ اسیں گواچ گئے، بس تھکن لئی ہی وقت نہیں  
سبھ اک دوجے توں ڈرے ہوئے، لگدا اے بُت جیوں مرے ہوئے  
ہُن فون سنبھے دیندا ہے، پر دوستی لئی ہی وقت نہیں  
دن رات سرکدے سبھ پہیے، ہُن ہور کسے نوں کیہے  
اپنی ہی زندگی جیوں لئی، بس اپنے کول ہی وقت نہیں

اسیں قدر کسے دی کیہ کریئے، کس خاطر کِداں کیوں مرئے  
اکھیاں وچ رڑک برابر ہے، تے سُنیاں لئی ہی وقت نہیں  
ہُن تُوں ہی دس دے جندڑیئے، اُس بندے دا کیہ بننا ہے  
جس کول مرن دی ویلھ نہیں، تے چین لئی ہی وقت نہیں

00



سر چڑھ کے اچ بولے گی جی، جو جو پائی ووٹ مبارک  
لوک اڈیکن وچوں نکلُو، آساں والا بوٹ مبارک  
جیہناں وپچی آنکھ تے غیرت، بُکل دے وچ مونہہ دیون گے  
آپو اپنے مُونہہ دی کالکھ، ہووے دل دی کھوٹ مبارک  
لوک شکتیاں دستک دیون، لوک اڈیک رہے نیں سورج  
بھولے پنچھی کہندے تھک گئے، ست گور تیری اوٹ مبارک  
دانا دُنکا کنکا کنکا، کرن اکٹھا چڑیاں ویکھو  
توری پھردی دیش دیشتر، سبھ نوں سکھنی پوٹ مبارک  
ہُن وی پھرن باگھیاں پاؤندے، دھرم کرم دے پردے لاہی  
ہور کہاں کیہ بے عقلاں نوں، شرم حیا دی توٹ مبارک  
سورج دی لالی دا چانن، ہر تھاں رحمت بن کے چمکے  
جگن چراغ اُمیداں والے، لشکن چہرے کوٹ ☆ مبارک  
ایہہ تاں صرف لڑائی نکی، جتن ہارن ہے بے ارتھا  
لمے یُدھاں خاطر کیوں نہ، لگے دل تے چوٹ مبارک

\* کروڑاں



پیار دا بُوٹا روح وچ لایا جاندا ہے  
خون جگر دا ہر پل پایا جاندا ہے  
ہووے نہ دلدار سُنن لئی، کول جدوں  
شبداں تُوں ہی درد سُنایا جاندا ہے  
مِل جایا کر، سُننے اندر ایداں ہی  
اُنج بھلا دس کتھے، آیا جاندا ہے  
روح توں بھار اُتارن دے سبھ، ترلے نیں  
اوداں کتھے من اُلٹھایا، جاندا ہے  
نال مقدر شکوہ کریاں، ملنا نہ  
ایہہ تاں ایویں وقت گویا جاندا ہے  
ہار وقت دی ویکھی ہے میں، ایس قدر  
کھل نانک نوں نانک، بنایا جاندا ہے  
ویکھ کیویں بن ساز، ہواواں رکدیاں  
ایس طرحاں وی گیت، سنایا جاندا ہے



کنا وقت گنوايا، تے ہُن سچھے ہاں  
آپ گوا کے ہی کچھ، پایا جاندا ہے  
مُر تے ساز وَلکدے، پڑاں دِن لئی  
دُھر اندروں جے، مَن پگھلایا جاندا ہے

00



نیم گلابی ہوٹھاں اُتوں، چُپ دے جندرے کھول دیا کر  
دل دی دھڑکن جو کہندی اے، جھجک پنا توں بول دیا کر  
پلکیں ڈکے ہنجو ویکھیں، پتھر نہ ہو جاون کدھرے  
برسن غم دے بدّل جد وی، اکھیاں تھانیں ڈولھ دیا کر  
من دے ویڑھے رات براتے، جے آواں تے درکھڑکاواں  
بُھلے بھٹکے راہی ئوں توں، دل دے بوہے ٹول دیا کر  
شہد رلے گلقتند ورگیاں، جندے باتاں پایا کر ئوں  
اندرے اندر روح نوں گنڈھاں، ایس طرحاں نہ گول دیا کر  
بہت ضروری ہوندے ایہہ وی، دل نوں اپنا درد سناؤنا  
شیشے ستمکھ ساؤدھان ہو، دل دی گٹھڑی پھول دیا کر  
دل دی تکرڑی تلدے نہیوں، زیور مہنگے مانک موتی  
میرا نام پکار کے میرے، ساہیں صندل گھول دیا کر  
تیرے نیناں دے وچ کئے، چن ستارے ڈُب کے موئے،  
چانن دے ونجارے نہ توں، وچ ہنیرے رول دیا کر



کیہڑے کم آئیاں ساڈے دوستو فقیریاں  
پہلی ہی قطار مل بہندیاں وزیریاں  
دیکھ لو گھمائی جاوے، عقلاں دے گیڑ نوں  
کئی واری جاپدا ہے، بن گئے بھنیریاں  
دھرماں دی منڈی وی، نیلام گھر ہو گئی  
وسچدا بازار ہُن، گدھیاں نوں پیریاں  
جتے کتے باغ وچ، لال سوہے پُھل نیں  
آ گیا آدیش بیجو کیسری پنیریاں  
ساڈیاں وی رتجھاں توں ہے جیہناں نیں مدھولیا  
اوہی ہُن کہن، چھڈو، دل دگیریاں  
امبراں تے گڈیاں، چڑھاؤن والی رتجھ نے  
سوٹی ہوئی ڈور نال، اُنگلاں نیں چیریاں  
رکھ نہ اُمید ایویں، بھولے دلا پاتشاہ  
نیت بدکار اوہدی، نیتیاں وی پٹیریاں



سُن لو جی کن کھول کے سن لو، پتھر دل تے بھار نہیں ہوندا  
اصلی صورت ہی دکھلاوے، شیشہ کدے غدار نہیں ہوندا

ساڈے وچ ہے وڑیا بیٹھا، حکمران دے روپ بچ راون  
تیر کمان چلائیے کتھے، اندروں دشمن مار نہیں ہوندا

اپنے گھوڑے اُلٹ دِشا ول، پھرے بھجائی، حال دہائی  
ہور تے کجھ وی ہو سکدا ہے، فوجاں دا سردار نہیں ہوندا

نہ بولاں تے دم گھٹدا ہے، بولن تے اعتراض ہے تینوں  
جیندے جی تاں روح دا پنچھی، اپنے ہتھوں مار نہیں ہوندا

تیرے آل دواآلے جھر مٹ، الاں گر جھاں کاواں دا ہے  
وسدے گھر وچ ایس طرحاں دا، بالکل ہی پریوار نہیں ہوندا

شانت سمندر تھلے جو کجھ ورت رہیا ہے اُس نوں سمجھو  
چُپ دی انتر پیڑ سُنے بن، چڑھیا قرض اُتار نہیں ہوندا

اکھاں میٹ کبوتر بیٹھے، بلی خوب تیاری وچ ہے  
میں تے صرف کیہا ہے، جاگو! بیٹھا کدے اڈار نہیں ہوندا



برکھ تاں ہریا ولے سی کیوں کرے پتر ہرے؟  
چھاں دھونی دھرت ویکھاں، خواب وچ وی من ڈرے  
اس طرحاں دا قہر اج تک، ویکھیا سی نہ کدے  
سازشی چالاں نوں لوکیں کہن لگ پئے مشورے  
نیڑ دی عینک لوا کے، دور چاہندے ویکھنا  
عقل توں پیدل زمانہ، دسو شیشہ کیہ کرے؟  
اڈدے پنچھی دی شامت، رات پے گئی اوس تھاں  
دھرت ساری اوپری ہے، جال وی تھاں تھاں دھرے  
ایس دریا دی کہانی، نہ سنا، میں جان داں  
ایس راوی زخم دتے، اچ وی اوویں ہرے  
درد میرے پڑکھیاں دا، شدھ کوڑا زہر سی  
دیکھ پی گئے پھیر وی اوہ، گھٹ وی پورے بھرے  
بابلا میرا سکھاؤندا سی، ہمیشہ سبق ایہہ  
تھک جاندا ہے اکلا، قافلہ منزل ورے





ایویں گم سُم، گم سُم، چُپ چاپ رہنا  
ایداں غماں دا پہاڑ، تیرے من توں نہیں لہنا  
کدے دوسرے دی سُنیں، کدے اپنی سنائیں  
تیری ویدنا نوں تیرے توں بغیر، کس کہنا  
مہنگے ہار تے شنگار، ساڈی مت دین مار  
ہوندی سادگی سدیو، سچا زندگی دا گہنا  
ایویں کھولدے سمندراں نوں ویکھ کے نہ ڈر  
ہممھ ہار کے اخیر، ایہناں شانت ہو کے بہنا  
چلو منیا کہ صدقاں دے پار ہوندے بیڑے  
زور جابراں دا، ہور اچے، کنی دیر سہنا  
جیویں ماچساں دی ڈبی وچ، تیلیاں تے اگ  
سانوں دوہاں نوں ہی پینا، اک دوسرے تے کھہنا  
کچے گھراں اُتے قہر، سدا زندگی سچ زہر  
ندی شوکدی نیواناں ول، وگدے ہی رہنا



لوک اُڈیک رہے نیں جھنڈے، ساڈے حق وچ کجھ تے بولن  
نیڑے آ کے پیٹھن اُٹھن، سنن سناؤن تے درد پھولن  
دل دے بھارے پریت اندر، کنے غم جو کھنکر ہو گئے  
مانک موتی لبھن والے، ساگر چوں ہُن درد ٹولن  
وقت سوالاں گھیرے اندر، پتھر ہو گئے روح دے پنچھی  
وید دھنتر چُپ کیوں نیں، فرض پچھان، گھنڈی کھولن  
اچ توں گروں اچ نہیں آؤنا، کل دا نام کویلے ورگا  
جیہاں والے چُپ نہ پیٹھن، بول پگاون، ہُن نہ ڈولن  
دھرت تریڑاں پاٹی ترسے، رحمت دا مینہ کھل کے برسے  
جیون جوگڑے زہر تیاگن، ساہاں اندر مشری گھولن  
اُس برہن دی کون سُنے گا، جس دا کنت گھرے نہ مڑیا  
چاندی والا چوگا چُگدا، رَجدا ہی نہیں کملا ڈھولن  
اَکے لوک پلھدے تختہ، راج بھاگ تاں شے ہی کجھ نہ  
وگدی پونے دینیں سنیہڑا، ہور نہ ساڈی ہستی رولن



ایہہ تُوں کدھر تریا پھر دیں، ہر رشتے دا ناں نہیں ہوندا  
کیہ دساں سرناواں تینوں، مہک دا کوئی گراں نہیں ہوندا  
جس دی آس تے بیا پھر دیں، ایہہ وی بدّل چھٹ جانا ہے  
مان مرتبے، اُچی گُرسی، پرچھاواں ہے، چھاں نہیں ہوندا  
توں دربان بٹھا دتے نیں، پیر پیر تے چونک چُستیں  
تیرے دل دے نیڑے تیڑے، ایسے لئی میں تاں نہیں ہوندا  
ایس طرحاں پرکرما کردے، تُردا وی ہے، تھکدا وی ہیں  
لکھن والیا، پڑھن والیا، تاں ہی سفر اگانہہ نہیں ہوندا  
ماں توں وطن پیارا سانوں، کافی ودھ ہے تیرے نالوں  
چداں توں اکھوائیں جبری، ایہہ تاں رشتہ ماں نہیں ہوندا  
آزادی دا پرچم سچا، چن سورج توں کتے اُچیرا  
ساڈی بونی ہستی کولوں، اک وی انچ اُتانہہ نہیں ہوندا  
میری چُپ دی اصل عبارت، پڑھنی سکھ لے اِکو واری  
جے نہ بولاں سمجھ لیا کر، لفظ دے کول سماں نہیں ہوندا



پُچھدے نیں لوک جی، ہنیرا کدوں مُنّا  
پاپ والی جنج ایتھوں، ڈیرہ کدوں چُکنا  
کدوں تیک رہنا جی، ہنخیر گھپ گھیر ہی  
کدوں تیک رہنا ہے نشانیاں توں، اکنا  
ایس دا علاج ہُئے کرو پنڈ والیو  
جڑھ ولوں ہو گیا ہے بوڑھ ویکھو سُنکا  
جال وچوں اڈ پڈ جاؤ، او پرندو  
تند تند تار، شروع کر دیو ٹلنا  
اکھاں کھولو، سُنئیو، جگاؤ سُنئی آتما  
چنگا لگو سُر جا سیر سار دُھکنا  
سُوریرو یودھیو تے رناں دیو موہریو  
مار کے دامے چوٹ، شروع کرو بُکنا  
بڑا چر ہو گیا مذاق ہُن سہندیاں  
بند کر حاکما، توں چند اُتے تھکنا



حق سچ تے انصاف دی دیکھی، میں تاں کہتے دُکان نہیں  
ایس قسم دے گھٹ وِنجارے، وِکدا کہتے سامان نہیں  
بھارت لہدے کیویں کولمبس لہ لیا امریکہ ئوں  
میں تھکيا ہے وِچ امریکہ، جسدا نام نشان نہیں  
شبد سلامت گر ہے میرا، جے پڑھداں راہ دسدا ہے  
سو دی اک سناواں میرا، مٹی دا بھگوان نہیں  
میں ہی تینوں چُنیا، چُن کے، تینوں خود سرکار کِہا  
میرے نال برابر بہہ توں، میں تیرا دربان نہیں  
اِس وِچ میں تے پُرکھے رہندے، کھیڈن پچڑے شام سویر  
نت نیمن بیوی دے کارن، گھر ایہہ صرف مکان نہیں  
مینوں گر اُپدیش سکھایا، سُن لو دنیا والڑیو  
روح دے کنگے، دھن دے لو بھی، شاہ تاں ہُن، دھن وان نہیں  
سیس تلی دھر، یار گلی ول، تَرنا اپنا سہل نہیں  
اُس نوں سمجھ کدے نہیں پینی، جس مٹی وِچ جان نہیں





آ کوٹھے تے منجیاں ڈاہ کے، تاریاں دے سنگ گلاں کرینے  
چپ نہ پیسے، کچھ تاں کہیے، من دے سکھنے کوئے بھریئے  
تارے رکھتیاں جھر مٹ دا ناں، رکھیا آپاں، چھڑیاں دا راہ  
تینوں تاں ایہہ یاد نہیں ہونا، بال وریس ویاہیے دریئے  
راتیں ستیاں بدل بن دا، چھجھیں کھاریں روح تے ورہدا  
اس پل جاگو میٹی اندر، سُبھدا ہی نہ، ہن کیہ کریئے؟  
اُسو کتک نیم گلابی، موسم اندر روح دے ہانی  
تڑپن دید تیری نوں ترسن، فی خواہاں دی الھڑ پریئے  
نکے ہونڈیاں وچھڑ گئے سی، جیہڑے میتھوں رتجھاں سپنے  
چل فی جندے ڈھونڈ لیاہیے، ہُن نہ ہور وچھوڑا جریئے  
بھیت تہاتھوں کیہڑا گجھا، کنے ہنجھ سرہانے پیتے  
قصے کھول سناؤ ہُن تاں، اُتلے کھیس، پٹھلی دریئے  
بستر پئے تریل دے تپکے، جم کے کالی چتری ہوئے  
روپ کیویں ہے بدرنگ ہويا، اِس نوں کس پیٹی وچ دھریئے



من مندر دی ٹلی ٹوں، ٹیکار لیا ہے  
روح نوں مکت کرا کے، بھار اُتار لیا ہے  
جتھے قدم اگانہہ ٹوں پٹیاں، دھوڑاں اُڈن  
ہُن میں خود نوں کنکے توں وستھار لیا ہے  
فرضاں دے لئی مان، مرتبے، گُرسی، نک سُک  
غرضاں والا کوڑا، منوں بہار لیا ہے  
جیہڑے گھر وچ شکرے، چڑیاں دے کھنھ نوچن  
میں اُس در نوں باہروں، جنڈرا مار لیا ہے  
روح دا پنچھی تڑپ رہیا سی، پنجرے اندر  
چوری دی مجبوری نوں، درکار لیا ہے  
چل ہُن عرش اڈاری بھریئے، ساگر تریئے  
تن تے من نے رل کے، پکا دھار لیا ہے  
کالکھ دی کوٹھی وچ رہنا، بہت کٹھن سی  
میں راہاں نوں چانن نال، شنگار لیا ہے



امبروں کرایا اک اڈھ اتھرو، پسی وچ جے پل جاوے گا  
دیکھ لئیو جی، ہولی ہولی، موتی دے وچ ڈھل جاوے گا  
سکھر دُپہرے رات دا پہرہ، قدرت دا ورتارا نہیوں  
ایس طرحاں ہی نظراں اگے، ویری کالکھ مل جاوے گا  
بلی اگے اکھیاں میٹی، بیٹھ گئے نیں بنھ قطاراں  
سمجھ رہے نیں چوہے ایداں، آیا خطرہ ٹل جاوے گا  
پھیر چھپار دے میلے اندر جوگی ناتھ وجاون بیناں  
گگا پیر دکھا کے چھلیا، جتنا، دیکھو چھل جاوے گا  
گندھلی پون چ گھلیا اتھے، زہر سنے ہے ہور بڑا کجھ  
ہولی ہولی ساہاں دے وچ، ایہہ سارا کجھ رل جاوے گا  
روح دے اندر بیٹھا دھسر، مارن والی گل نوں تورو  
کاغذ دا راون تاں تیلی، بالدیاں ہی جل جاوے گا  
سخت زمین نوں پولی کر کے، سُنن بچ تاں دھریئے یارو  
ہولی ہولی آس دا بوٹا، ایس طرحاں ہی پھل جاوے گا



کیہ بدشگنی ہو گئی میتھوں، گمیا چن گواچے تارے  
مُددھ بن رُوپ گروپ ہو گیا، ساہ وی ہو گئے بے اتبارے  
خوشبو دا اوہ بلا نہ ہن، روح میری نوں آ مہکائے  
جس نے پہلی وار کیہا کجھ، موہ وچ بھج کے تیرے بارے  
اینے پکے چُپ دے جندرے، میرے وس نہیں، کھول سکاں میں  
ہو رہے ویکھو ترلو مچھی، بن گئے نیں ہن شبد وچارے  
کوہ نہ تری تہائی جند نوں، چھڈیا کیہڑے جنگل وچ توں  
اک دوجے توں دور کھڑے نیں، رُکھ وی کنے ککے کارے  
ڈردی واج نہ سنگھیوں نکلے، آپ سمجھ لے من دی حالت  
پتھر ہو گئے پلکیں ہنجو، ویکھ کیویں ہن، من من بھارے  
ہنوکے والی جون ہنڈھاؤنی، پے جاوے نہ دشمن نوں وی  
ہکڑی دے وچ تپدے کھپ گئے، موہ دے جگنو کنے سارے  
تپدے تھل دی بھر مچلی نے، کتھوں تیک پچایا ویکھو  
درس پیاسے تڑپ رہے نیں، تیز دوڑ دے مرگ وچارے



میری ماں تے بابل بن گئے، باتاں گزرے کال دیاں ہن  
کانبا بن کے چیر دیاں نیں، راتاں سرد سیال دیاں ہن  
سر سُوہی پھلکاری لے کے، جیکوں سوہریں آوے ووہٹی  
پھگن چتر پھلاں ونڈیاں، مٹھیاں جیویں گلال دیاں ہن  
تُر گئی ماں تے منجا خالی، سنے بسترے ڈسک رہیا اے  
ساڈی بھولی روح تے نظراں، کس نوں رهندیاں بھال دیاں ہن  
اُکھڑے ساز دے وانگوں ساڈے، من دی حالت بے ترتیبی  
طرب تان دی سمجھ گواچی، درگتیاں سُر تال دیاں ہن  
دھرمی بابل دھرم گوا کے، بن چلیا بھرمی بابل  
گلاں وچ گاجا رهندے، من دے بال گوپال دیاں ہن  
کسیں کاریں رُجھے بچڑے، اٹھیں پہریں وی نہ ملدے  
سارا دن تاں کلیاں یاداں، تن من آپ سنبھال دیاں ہن  
جھڑ چلیاں نیں کر مو کرنی، ٹاہناں سرخ گلاباں دیاں وی  
کنڈے کنڈے چھڈ چلیاں نیں، جھڑ کے پیتاں نال دیاں ہن





کُنڈے جنڈرے کیوں لاؤندے ہو، پچھدے میں بند بوہے  
اس گھر اندر کوئی نہ رہندا نہ بلی نہ چوہے  
نہ کوئی بدن بار سجاوے، چوہے تیل شکن دا  
مدت ہوئی نظر پئے نہ، سرتے سالو سوہے  
نہ دستک نہ بڑک سُنے تے نہ ہی چاپ قدم دی  
سہکدیاں نیں کندھاں، سانوں آکے کوئی تاں چُھوہے  
گوڈے گوڈے گھاہ چڑھیا، تے سپ سلوٹی پھر دے  
سن سراں، نہ پیڑ کسے دی، میرے من دی جُوہے  
ایوں پتھرائے نینیں جمیا، سرد جیہا اک ہوکا  
جیوں کوئی درد پوٹلی بنھ کے، دھر گیا میری رُوے  
اینا سیک ہجر دا توبہ! سہن سَکھالا نہیوں  
تن من تپے تندور تے جیہا ہو گئے لال پھلوہے  
بھر بھر ٹنڈاں جتھوں ماہل لیاؤندی سی بئی پانی  
دیکھو ساڈے دیکھدیاں ہن، خالی ہو گئے گھوہے



پھر رہیا ایہہ کون، تلیاں تے ٹکا، انگیار نُوں  
اک پل وی نہ اُتارے، دل دے اُتلے بھار نُوں  
میں محبت نوں ہمیشہ، مانیاں کجھ اس طرحاں  
طرب چھڈے، سُر سارنگی، ویکھدی جیوں تار نُوں  
سپنیاں دی چھال پرکھن والیا، ایہہ سوچ لے  
دھرت سوڑی ہے ہمیشہ، پتچھیاں دی ڈار نُوں  
وقت دے گھوڑے سواری کرن والا شوق ہے  
نیندراں نہیں آؤندیاں، میں پورنیں اقرار نُوں  
لگن ہے تاں اگن ہے، مگروں تاں ساری راکھ ہے  
اے ہوا! توں دس دیویں، جا کے میرے یار نُوں  
مہک وانگوں آ ملیں، رنگاں دے میلے وچ توں  
سپن لوں آپے توں میری، سرگی گفتار نُوں  
تیری میری اک دھرتی، اک ہی آکاش ہے  
کرچ نے آہ لیک واہی، کیوں دلاں وچکار نُوں



مہک رہی مسکان پیاری، ہائے توبہ  
دے دے اک ادھ چنگ اُدھاری، ہائے توبہ  
شام پئی تے گھر جانے پرچھاویں نیں  
پھر نہیں لبھنی صورت پیاری، ہائے توبہ  
تارے بڑے پیارے پر ایہہ امبریں نیں  
نھیر دی بکل دھرتی ماری، ہائے توبہ  
نین کٹورے ہرنوٹے دی ریس کرن  
ڈنگدی پئی سرمے دی دھاری، ہائے توبہ  
ارتھ وچارے پچھے رہ گئے شبدائ توں  
دل تیتھوں جاوے بلہاری، ہائے توبہ  
سپنے وچ توں آئیں جاں نہ آئیں پر  
بند کریں نہ دل دی باری، ہائے توبہ  
جس وچ تیری میری روح دا ریشم سی  
کدھر گئی ہن ادھ پھلکاری، ہائے توبہ



قطرہ قطرہ تیکا تیکا، دل جے درد سمندر بھریا  
اگنی دا ایہہ ساگر دسو، ہمت باجھوں کس نے تریا  
بے ہمتے نوں ماں دھرتی وی، چوگ چگاؤ نوں ٹل جاندی ہے  
جیوں پر پین پرندہ، کوئی بناں اڈاری پھر دا مریا  
کچیاں پلایاں اٹاں دا میں، گا ہک نہیں جی، سن لو سارے  
نانک شاہی پکیاں اٹاں، صدق سلامت میرا کریا  
دھرتی ماتا، بابل امبر، کھیڈ کھڈاوی سگل سرشٹی  
تاہیوں روح دا چمبا کھڑیا، نالے من دا ویڑھا بھریا  
تیری نظر سولی مگروں، روپ میرا نویایا ایداں  
سکے برکھ پھٹارا جیکوں، جنگل دا ہر بوٹا ہریا  
وقت دے اتھرے گھوڑے اُپر، مار پلاکی چڑھیا ہاں میں  
تیرے دم تے اڈیا پھر داں، پہلاں ساں میں ڈریا ڈریا  
کون کسے دی خاطر مردے، سورمیاں، جانبازاں توں بن  
سیس تلی تے، پیر دھار تے، نشے باجھوں کس نے دھریا



شہنشاہی کفر جد وی بولدا ہے  
تخت دا پاوا اودوں ہی ڈولدا ہے  
بھرم ہے تینوں کہ پیسہ پیر سبھ دا  
کوڑ ویکھو، تکڑی کنج تولدا ہے  
میل دیوے دھرت نوں آکاش تیکر  
جل پنا گڑوی چ مشری گھولدا ہے  
جیہڑیاں پیراں دے بیٹھاں دھرت ہی نہ  
ایہہ مسافر اوس بستی کول دا ہے  
جال اُتے چوگ چگدا ویکھیا میں  
پر پرندہ اڑن خاطر تولدا ہے  
اک دن سُنیا میں جھگی والیاں توں  
کون سانوں تھاں کو تھاں تے رولدا ہے  
رہن دے توں پھوکیاں ہمدردیاں نوں  
پھر کہیں گا، میرے پردے پھولدا ہے





خبر ہی نہیں، میں بھلا کیہ کر رہیا ساں  
ریت چھل دے پانیاں وچ، تر رہیا ساں  
نین تیرے غزل سوہنی، کہہ رہے سن  
بن بلّائے، میں ہنگارا بھر رہیا ساں  
توں کیہا، کچھ وی نہیں، چل پھیر کیہ اے  
میں تاں اپنے آپ گلاں، کر رہیا ساں  
جاگیا پر بھات تیکر، رات بھر میں  
دن دے چٹے چانوں میں ڈر رہیا ساں  
من رہیا بھٹکن چچ گاہندا نیل امبر  
کون کہندی رات ٹوں میں، گھر رہیا ساں  
مہک تیری مگر، کافی تیز ثریا  
شاید، سورج وانگ دھرتی ور رہیا ساں  
جنم دن لنگھے تے مگروں یاد آیا  
دوِس، راتاں، ہر گھڑی ہی مر رہیا ساں

دستکاں تاں دتیاں، سُنیاں نہ توں ہی  
میں تاں دھڑکن وانگ، دل دے در رہیا ساں

00



چل نی بھینے آپاں رل کے، ویراں دے سنگ قدم ودھائیے  
گھر دی چار دیواری اندر، گھر کے نہ چکھے رہ جائیے  
دھرتی توں لے چندرما تک، کیہڑی تھاں جو ساتھوں اوہلے  
ہر ورقے تے لیکاں واسیے، ہر کھیتر وچ سیو کمائیے  
دھرتی وانگوں دھی وی دھن ہے، بابل دھرمی نوں ایہہ دسیئے  
دادی نانی ماں متا ئوں، انپڑھیا جو سبق پڑھائیے  
نہ اردھانگن نہ ہاں ابلا، پوری ہستی لے کے جی  
آپے جگ ایہہ سمجھ لوے گا، پہلاں تاں خود نوں سمجھائیے  
گیت غزل کوتاواں جہیاں، دھیاں اس توں ہور اگیرے  
زندگی دے میدان چ وی ہن، رن چنڈی دا روپ دکھائیے  
زندگی دی شطرنج دے مہرے، آپاں دوہاں نے نہیں بننا  
سجے کبھے ہتھ دے وانگوں، اک دوجے دا ساتھ نبھائیے  
صدیاں صدق، سلیقہ، سیوا، شُھ کرم دا بیج سانھیا  
آ جا اپنے ہتھیں آپے، وچ سیاڑاں ایہہ سبھ لائیے



کیوں ہولی دا بھرم پال دیں، ایہہ رنگ کچے لہہ جانے نیں  
درد پڑے زخمی سپنے، ایہہ ہی روح تے رہ جانے نیں  
چڑھیا سورج لش لشدنڈا، چمک رہے پر ایہہ نہ بھلیں  
تاج تخت تے محل منارے، شام ڈھلی تے ڈھیہہ جانے نیں  
سکھر پہاڑی چوٹی اُتے، ہوکیاں دے برفانی تودے  
پگھلن گے، توں ویکھیں اک دن، اتھرو بن کے ویہہ جانے نیں  
میں دُوجتیاں نسلان کولوں ایہی سبق سمجھ، تاہیوں  
بول میں جیہڑے سوچ لئے اوہ، جاندے جاندے کہہ جانے نیں  
آہُن تریئے، بہہ نہ جھریئے، ہر دن سبق پڑھاوے، پڑھ لے  
جے نہ تریوں، تیرے سپنے، ادھ وچکار ہی رہ جانے نیں  
کنج تیرا دھنواد کراں میں، درد سمندر دین والیا  
باقی زخم کسسیاں وٹ میں، ایس طرحاں ہی سہہ جانے نیں  
لاوے وانگوں اُبلن والے، تھوڑ چری ہستی دے مالک  
شرلی وانگ ہوا وچ اُڈدے، راکھ دے وانگوں بہہ جانے نیں



میں سترنگی پینگھ چڑھائی، امبر تیک ہلارے مل گئے  
رات دی بُلکل وچوں تاہیوں، کجھ جگنو کجھ تارے مل گئے  
بھٹکن دا وی روپ بدلایا، خوشبو دا جد ساتھ مل گیا  
توں میں من دی دھرت پھرولی، وچوں یار پیارے مل گئے  
ہوئے کے ہاوے تے اُدریوں، گم گواچ گئے سن سارے  
تیری طلب بنی سرناواں، اوہ سارے دے سارے مل گئے  
دل دا سودا نقدی سُنیا تاں سی، کیتا نہ سی  
بے سمجھی وچ کر بیٹھے تاں کئے درد اُدھارے مل گئے  
غم دے بدل اُڈدے پھردے، خبر نہیں سی کتھے وسدے  
روح تے کن من ایسی برسی، سرب سمندر کھارے مل گئے  
دِن مُکیا، پچھتاوا سی کہ، سورج چل، نہیر پسرپا  
کالی چادر جدوں پھرولی، وچوں چن ستارے مل گئے  
لُکھ پھرکدے ویکھے تیرے، کہنا کیہ سی جان لیا ہے  
دل میرے نے بھری گواہی، جد نرشد ہنگارے مل گئے





من مستک وچ پہلاں آپے جنگل دا وستھار کرن گے  
جگدے دیپ بجھا کے ڈاکو، وچ ہنیرے مار کرن گے  
بچ جا او توں بھولے پنچھی، ایہناں والی چوگ چگیں نہ  
برکھ چیر کے ایہہ ونجارے چھاواں تارو تار کرن گے  
تیرے ہتھ ہتھیار دین گے، ون سونے بھرم بھلیکھے  
ہولی ہولی تینوں ایداں ویکھ لویں مسمار کرن گے  
تیری تھالی وچوں روٹی، چک لینی ایس اڈنے کاواں  
تیز تراری، موت سواری، شاطر بہت خوار کرن گے  
نہ بن صرف مشینی پرزہ، تیری ہستی کتے وڈیری  
پون سوار کرن گے چاتر، مگروں سر دے بھار کرن گے  
نیتا جے اہنیتا تینوں، کہہ کھلناک رول دین گے،  
چھج چ پا کے چھٹن والا باقی کم اخبار کرن گے  
کیہ ہو یا تے کیوں ہو یا، میسنیاں دے ٹولے آ کے،  
تیری لوتھ سرھانے بہہ کے ڈوگھی سوچ وچار کرن گے

ہمدردی دا پاٹھ پڑھدیاں، مگروں ایہہ سبھ بھوگ پاؤن گے  
اپنا پلہ جھاڑن مگروں ڈاڈھا اتیاچار کرن گے  
بڑا روکیا مڑیا ہی نہ، یارو ساتھوں ہڑ دا پانی  
ہوئیاں تے انہویاں باتاں میرے بارے یار کرن گے

00



ماں جائے وی اپنی تھاں نے، رشتہ تاں وشواس دا ناں ہے  
جو کجھ آکھ بلائیے توں میں، ایہہ تاں، صرف لباس دا ناں ہے  
ست سمندر کنیاں جھیلاں، تریاں تیرے نیناں اندر  
دھرت آکاش ملواک دن تاں، ایہہ ہی میری آس دا ناں ہے  
چن دا ٹکڑا قید چ گھریا کالی رات چپھیرے پسری  
پورنماش دا چن پورا، میرے لئی دھرواس دا ناں ہے  
اکو ہاؤکا بھریا سی توں، تکیا نہیں، محسوس کر لیا  
بن ملیاں، بن بولن توں ہی، کیہتے بچن بلاں دا ناں ہے  
آس کدے وی مردی نہیوں، بور جیوں چندن دے رکھ دا  
کجھ لوکاں لئی دل دی دھڑکن جینا صرف سواس دا ناں ہے  
ہئے میں تیتھوں دور گیا ساں، اکھ پکارے مڑ آیا ہاں  
کرامات نہ دیوی شکتی، ایہہ میرے ابھیاں دا ناں ہے  
تیری روح دے اندر چھپیا، پڑھیا ہے میں اکھر اکھر  
نہیوں مارے نیناں نے لکھیا، مڑ مڑ کسے اداس دا ناں ہے

سورج دی لالی وچ گھلیا سرخ سندھوری چہرہ تیرا  
میرے لئی تاں سورج تاہیوں بالکل کھاسم خاص دا ناں ہے  
امبریں آہ سترنگی جیہڑی، جس نوں پینگھ لکھاری کہندے  
امبر دے ورقے تے لکھیا رب نے تیرے داس دا ناں ہے

00



ہوش دے نالوں مستی چنگی، پر نہیں چنگی بے پرواہی  
ساودھان ہو! خون چ تیرے رچ نہ جاوے کوڑ سیاہی  
تر پو، تر پو، سستی ماریا، بیٹھا کچھے رہ جاویں گا  
وقت کدے وی خود نہیں دسدا کس منزل ول جاوے راہی  
سال بدلایا، صرف کلنڈر، پر نہ بدلے رسے پیڑے،  
بن مقصد توں بھجدی خلقت، اوویں پھردی ساہو ساہی  
ٹانگے والے گھوڑے وانگوں آل دوآلے لکھ نہ دیکھے  
اپنی ٹاپ نوں آپے سندا، بھجیا پھردا واہو داہی  
دنیا بھر دے چتر چلاکو، بند کرو ہن ایہہ اتھرو بازی  
سرحدیں دے راکھے ساڈے، پتر کیتے کانے کاہی  
گھوڑ سوار حکومت کردے، وارو واری وقت سواری  
اوہی رمی اوہی پلی، گھاہیاں دے پت اج وی گھاہی  
وارث میاں ہیر وچاری کس اگے فریاد کرے ہن  
قیدو نال رل گیا ہن تاں، کرسی بدلے رانجنن ماہی





جگ رہیا سورج دا گولہ دھند وی ڈاڈھی گھنی ہے  
دس رہے نہ، راہ گواچے، درد بارش، کنمنی ہے  
مارو تھل دی قسمتے ہے، تپن لکھیا، کھپن لکھیا  
تڑفدی ہے ریت لکی، اک نہ ڈگی کنی ہے  
رات دن بجلی لنگھاوے، تن تے من اندر ہنڈھاوے  
تار دی ہمت توں صدقے، کس طرحاں ویکھو تنی ہے  
پاڑا پتھر دا سینہ، شیشیاں نوں چیر دیویں  
ہیریا! شاباش تیرے، سانہہ کے رکھی انی ہے  
ویل بوٹی چاننی دی، کیہ کراں ایہہ بن ترے میں  
ویکھ چانن جہات کہندا، روشنی برکھوں چھنی ہے  
یاد اندر نین برسن، مور من دا ہنچھ کیرے  
سمجھیا کر، مہرما توں، جان تے مشکل بنی ہے  
دھند نوں توں چیریا تے پاٹیا اندھیار کمبل  
ویکھیا! کداں چھڑی جی، من دے ویڑھے جھنجھنی ہے



سرد سیال تریل چ بھجیاں لف لف جان گلابی پتیاں  
ہور گھڑی تک سورج چڑھیاں ٹھکنیاں ایہہ مان چ متیاں  
دھرت وصال بچیا اس وچ، ون سونے پھل تے کنڈے  
بن تھماں توں گگن کھلوتا، ڈردے لوکاں کندھاں چھتیاں  
چار چنیر ہنھیرا تیرے، ٹھڈے کھا کھا مر چلیا ایں  
وچ دواکھیں دیوے دھر دے، توں وی یار جگا دے بتیاں  
سفر اچے وی لم سلما، کوہ نہ تری تہائی بابا  
جندڑیے کیوں بہہ چلی ایں، حالے نہ پنج پونیاں کتیاں  
دھرت پریتی سایاں ملی، جر جروانے تاندو کردے  
سرمائے دے جنگل فیلے، وگن تدے ہی پوناں تتیاں  
سمیں سمیں دی بات پیارے، رلن بادشاہ، بیگم، یکے  
پھرن سکندر وانگوں جیتو، دکیاں تکیاں، پنجیاں ستیاں  
کنڈیاں نے زخمائے سپنے، پھلاں نال کول کردیاں  
زخمی رتجھاں دے پنکھیرو، اڈیاں تلیاں سوہیاں رتیاں



حق سچ تے انصاف دی خاطر جس ویلے انسان بولدا  
انی ریت گیان وھونی، کھندی ہے بھگوان بولدا  
رہی قہر خدائی آکھن، بھانا کہہ کے بہہ جانڈے نیں  
بھری جال وچھا کے اتھے جس ویلے شیطان بولدا  
دین درد دکھ بھنجن ویلا، اوسے نوں ہی ستیگ کہیے  
کدے کدائیں صدیاں نگروں جس ویلے ایمان بولدا  
توں بندے توں کیہ لینا ہے، کیہڑی وسط بازار وکے نہ  
گنجھل دار بجھارت سمجھو، جو بولی دھن وان بولدا  
سون بنسری محلاں اندر طرز قیمتی ویچ رہی ہے  
بانس وچارا ہو چلیا ہے، جھڑا سرل زبان بولدا  
ساودھان جی، وطن پیارا نہیر گفہ ول تریا جاوے  
بہتا چر ایہہ گپنی نہیں جے، جو بولی سلطان بولدا  
عمر گوا کے اپنی گل وی کنکا ماتر سمجھ پئی ہے  
گھگو وچ آواز بیگانی جو کجھ وی دربان بولدا



بندیاں کولوں چھاواں منگن، چھانگے برکھ وچارے ہو گئے  
ماپے کل مُکے بیٹھے، کورے اکھ دے تارے ہو گئے

سویاں اندر جاوے ایہہ راہ، زہر پسریا پوناں اندر  
اگنی بھیٹ بنسپت ہوئی، ساہ لینے وی بھارے ہو گئے

گھرتوں تریا منزل ول نوں، راہاں وچ گواچ گیا ہاں  
میرے من دے کھنھ وی یارو ڈاڈھے بے اتبارے ہو گئے

موہ ممتا دے دھاگے چھٹے، ٹی ڈور پتنگڑیاں دی  
خشبوئیاں دی جوئی پے گئے، رب نوں یار پیارے ہو گئے

پھلاں بھری کیاری چھڈ کے، امبر دے وچ بن گئے تارے  
یاراں توں بن دھرتی سنی، اتھرو من من بھارے ہو گئے

نہ روو نی اکھیو ہن تاں، غم دا ساگر ترن دھیلا  
کتھوں چنچ بھرے ایہہ جندڑی، سارے پانی کھارے ہو گئے

سورج چن گواچے تارے، کٹھے کیتے جگنوں ایہہ میں  
میری بکل دے وچ ویکھو، مڑ کے کنے سارے ہو گئے



زندگی چ کدے پیا ایسراں نہیں کریدا  
بُریاں دی بات دا ہنگارا وی نہیں بھریدا  
بہن تے کھلون ویلے اکو گل جان لے  
سچ پلے ہووے، کھلے ہون توں نہیں ڈریدا  
رات پکھوں دن پھیر ایہی نت نیم ہے  
ایویں دم گھٹ گھٹ حیندیاں نہیں مریدا  
جسراں ملاپ روح چ چھیڑے وساد نوں  
اوسے طرحاں مترا وچھوڑیاں نوں جریدا  
ٹٹ گیا سپنا حقیقتاں نوں جان لے  
بھل جا توں سپنا حسین کسے پری دا  
آئیاں ازماؤن تیرا تان میرے ہیریا  
ویکھ کے مصیبتاں نوں ایویں نہینوؤں ٹھری دا  
اج نوں سنوار بھائی کل کس ویکھیا  
ایہی اپدیش میرے گورو تیرے ہری دا





تن من اندر سواس وانگراں پنج ککار دکھاوا نہیوں  
پکا رشتہ نال گورو دے کیول گنڈھ چتراوا نہیوں  
کیساں نال سواس نبھن گے، کنگھا، کچھ کرپان سنے ہی  
سجے ہتھ کڑا ہے میرے، من وچ بھرم بھلاوا نہیوں  
سہاں دی مالا دی شکتی، گر شداں دے منکے پھر دے  
تیخ دھار تلوار ترن دا تاں ہی تاں پچھتاوا نہیوں  
آنندپور وچ جنم بھوم ہے، گورو گوبند سنگھ بابل میرا  
تریکا لک ہستی ہے میری، میں مٹی دا باوا نہیوں  
روح دے اندر ماچھیواڑا، جنگل راہ کنڈیالے میرے  
دسم پتا دے سکھ لئی کتھے، دھرتی بلدی آوا نہیوں  
پہریدار وراثت دا ہاں، دھرتی دھرم نبھاواں گا میں  
ایس جنم تاں نبھ جاواں گا، ہور جنم دا دعویٰ نہیوں  
صبر صدق سنتو کہ سمرپن سورج دے تپ تیز جیہا ہے  
ظالم دا جم کال بناں گا، راج تخت دا پاوا نہیوں



ساڈے من دی گلی چوں اج کون لنگھیا  
وے میں جیہدے کولوں بنا بولے دل منگیا  
مینوں سدھ بدھ بھلی، ہوئی جند اڈھموئی  
جدوں والاں وچ اوس نے گلاب ٹنگیا  
جیہڑے جان دے نیں سچیاں محبتاں دی سار  
کہندے رب اوہناں روحاں تائیں آپ رنگیا  
لاجوتی دے وانگ میں دی کھوہی نہ زبان  
اوہ وی چھوئی موئی، چھوئی موئی بڑا سنگیا  
شاید اوس دا ہی نمھا نمھا نیناں چ سرور،  
پہلی مکنی چ مینوں جیہدے پیار ڈنگیا  
ایہہ تاں روحاں دا سمیل، جیکوں دیوا بتی تیل  
کالے جگ دا ہنھیر ویکھ بڑا کھنگھیا  
ہن مٹ گئے زمانے دیاں تیراں دے نشان  
اساں درد مچھٹھڑے چ من رنگیا



مر چلے ہاں دم دم کر کے رشتیاں دی پر کرما کردے  
کچ دا بھانڈا اٹھ نہ جاوے، ہتھ پاؤندے ہاں ڈردے ڈردے  
نہ سندے، نہ سمجھ رہے ہاں، سوچن والے بوہے بند نیں  
تن نیڑے من دور دور نے، شیش محل گھر گوڑھے پردے  
پتھر دے بھگوان دی سنگت، کردیاں عمر گزار لئی ہے  
ایہدے ورگے جگرے ہو گئے، پوجا اسدی کردے کردے  
غرضاں دے جنگل وچ پھر دے دن ڈھلیا تے رات پئی ہے  
آپے ہی دس کیہڑے ویلے فرضاں دی رکھوالی کردے  
منجی تھلے جمیاں نوں دس، چن تے سورج دسدے کتھے  
عمر و ہاؤندے سہکدیاں ہی، کھڑے دُپہرے جونہیں جردے  
توڑ دیا کر در دیواراں عقل کوٹ دے واسی سبنا  
چوگردے دے قیدی جہڑے، نہ ہی جیوندے نہ ہی مردے  
جس دن آپاں جنم لیا سی، جے نہ زندگی اس توں سوہنی  
خود اپنے توں پچھنا بندے، کیہ ہاں آپاں رہندے کردے



دھیٲے 1 نال پٲیٲے 2 رل گئے، پٲ گئے داؤ دا دریا  
دیوے بجھے دواکھڑیاں 3 چوں، گھرکیناں 4 نوں تھان ملیا  
بوپیٲے 5 اندر رکھی روٹی، سکی لکڑ وانگ بنی  
اھہ گئے پرات پڑاوے 6 اک دو، اُچا نیواں پیر پیا  
ٹانڈ 7 دے اتے کجھ نہیں دسدا، گھڑونجی 8 تے گھڑے دھرے  
صبر کتے 9 ویڑھے اندر، چچ وھیاں چوپ 10 لیا  
جھکھڑ جھانجا، سر تے بڈل، دانا پھکا سانجھ لوو  
وچ ترنگڑ 11 توڑی بنھ توں، جھمب 12 اُتار تے سستی لاه  
ٹنک رہیا چاندی دا دیڑ 13 ویکھ روپیٲہ چن جیہا  
امبر دے وچ خطیاں ڈلھکن، تارے ونڈدے نور اتھاہ  
گل وچ ہار بگھتیاں والا، گھمدی اوری 14 نار پھرے  
بے قدرے مورے 15 نوں ایویں، دکڑیاں 16 دا فکر پیا

میری ماں نے شبد سنبھالے، دیکھو کتنا مہنگا مال  
سانوں خبر نہیں کیوں ویرو، کیہ کچھ گم گواچ گیا؟

00

1 دھیاں والے۔ 2 پتاں والے۔ 3 دیوا دھرن والی تھاں۔ 4 گھرنی دا گھر۔ 5 ڈکو۔ 6 پرات  
ہٹھ جڑے پیر۔ 7 پرچھتی۔ 8 گھرے رکھن لئی دیوار چ گڈیا چوکھٹا۔ 9 بھرے  
بھرائے۔ 10 سرخ پھلکاری۔ 11 توڑی ڈھون لئی بنیا جال۔ 12 بکل موں سرکیدی۔ 13 دوہرا روپیہ  
چاندی دا۔ 14 جلا ہے دی لکلی۔ 15 وڑی بھریا مرد سریر۔ 16 پیسیاں دا

00





پیار دے راہ وچ دسوتاں سہی کسنتوں نہیوں درد ملے  
وکھری گل ہے، ون ہریالے، بن کے کجھ ہمدرد ملے  
مرتے سورج، تپدی دھرتی، جد پیراں وچ چھالے سی  
بہتی واری، کول کھڑے نہ، جنے رشتے، سرد ملے  
میں مٹھے خربوزے دانگوں جیہناں ستمکھ حاضر سی  
چاقو، تیز کٹار کدے کجھ بن کے مینوں کرد ملے  
کالے مینڈے رستے بھاویں، چنے وستر پا تریا  
سمجھ پوے نہ سارے راہیں، مگرے اڈدی گرد ملے  
چوس گیا رت چندرا موسم، سرخ گلاب دی واڑی دا  
جد ویکھاں پنجاب دا چہرہ، پیلا بھوک تے زرد ملے  
کرسی تے بھگوا جاں سوہا، نیلا پیلا جو بہندا  
جتن لئی شطرنج دی بازی، رنگ برنگی نزد ملے  
وقت اڈیک رہیا ہے چرتوں، روح دا درد نوارن لئی  
موئی مٹی جاگ پوے ایہہ، پھیر اگڑا مرد ملے



نچا دھار ترو تاں قادر منزل نیڑے کر دیندا ہے  
شوا دیوتا، بے ہستے نوں، اوداں کتھے ور دیندا ہے  
رحمت دا مینہ ستیاں اتے، نہیں برسا دکھیا میں  
ہمتیاں نوں داتاں دے دے جھولی کئی کر دیندا ہے  
ہس کے مکیاں دھرتی ساری پھل کلیاں خشبوآں بندی  
اکھ وچ اتھرو ہون تاں شیشہ چہرہ دھنلا کر دیندا ہے  
تیری میری شکتی ویکھیں، اک نقطے تے رک نہ جاوے  
پتھر دے دھر اندر اوہی، کیڑیاں نوں وی گھر دیندا ہے  
چیتے رکھیں، ہمت اگے نچدی پچھی دھن دی دیوی  
بے پرواز پرندہ چاہے، تاں ہمت نوں پر دیندا ہے  
میں بنداں جد جگنوں، تارو، چن بے رات ہنھیری اندر  
تڑکسار پر بھات دے مگروں، سورج مٹی دھر دیندا ہے  
حنگن تھال وچ چن تے سورج جیکر دیوے دسدے ہوون  
میرا بابا سپنیاں نوں وی، دھرتی جڈا بر دیندا ہے



تاریاں دے نال ایویں ضد نہیں پگائی  
امبراں تے اپنی اچی پینگھ نہیں چڑھائی  
دور دور بیٹھنا تے چپ رہنا ٹھیک نہ  
لسی تے لڑائی ایویں بہتی نہیں ودھائی  
دل دی آواز پرواز آپے کردی  
ہاؤکیاں دی بات دوجے کن نہیں سنائی  
خوشیاں نوں ونڈنا جے سکھ لوے آدمی  
لمی نہیوں ہندی کدے رات وی جدائی دی  
پھلاں وچوں رنگ تے سنگدھ کوئی لے گیا  
دسو! کھیڑے ٹھانے ایہدی رپٹ لکھائی  
میدے چج سندھور گنھ چہرہ تیرا ساجیا  
اکھیاں بلوری چج اداسی نہیں لیا  
روح دے اتے بھار کیوں پہاڑ جڈا رکھیا  
تتلی معصوم کدے پنجرے نہیں پائی



مارن کھنڈا سانھ ہمیشہ سرخ وستروں ڈردا ہے  
ایسے ڈر چوں رتے رنگ تے مڑ مڑ حملے کردا ہے  
ہتھیاراں دا ونج کردیاں بھل بیٹھا ہے مانوتا  
وطن ثبوتا نگلن خاطر اکو برکی کردا ہے  
ست سمندر پاروں وی اوہ کردا پھر دا آدم بو  
وشو امن دا چٹا پرچم، اندروں اندری ٹھردا ہے  
مگرچھ دا چتھیا بندہ دھرتی اپر رینگھ رہیا  
پرمانوں دا جھمبیا جیکوں نہ جیندا نہ مردا ہے  
بھون سفید بچ خونی پنجہ، منجا ڈاہ کے بیٹھ گیا  
گول گلوب بھکیاں کولوں، کمبدا ہر ہر کردا ہے  
قلم دوات تھڑکدی پیروں، لکھدا کالے لیکھ جدوں  
کورا ورقہ کمب جاندا پھر، ٹھنڈے ہاؤ کے بھردا ہے  
بور جھڑے امباں دا سارا، مرجھاؤندے پھل ٹاہنی تے  
ایہہ بدبخت، کلہنا باغیس پیر جدوں وی دھردا ہے



کیہ چکھدے ہو باتاں یارو، اتھرے دل دگیر دیاں  
پیڑاں ہن تے ہم راہ ہونیاں، ندیوں وچھڑے نیر دیاں  
کنڈیاں والی تار چ اڑ کے پاٹی چنی سنگناں دی  
ہن تیکر وی لیراں سنداں، اس چنی دی لیر دیاں  
گیرو وستر پا پر بھاتی گاؤندا جھڑا لنگھدا سی  
دل دی تختی اتے بولن، طرزاں اوس فقیر دیاں  
کٹاں دے وچ مندریں پا کے ایہہ جوگی کیہ چاہندے نیں  
فیشن دی منڈی دے رانجھے، کرن شکایتاں ہیر دیاں  
نہیوں لہنے لال گواچے، جاندیاں وی تر پیناں  
وچھڑے یار محبتاں والے، قیداں توڑ سریر دیاں  
رات کھڑی سی، دیوا بجھیا، چار چنیر ہنھیر پیا  
اوہ باتاں نہ من توں لٹھن، کیتیاں وقت اخیر دیاں  
شام ڈھلی پرچھاویں لے ہوئی جاندے برکھاں دے  
ڈاراں آون بنھ قطاراں، جان ہوا نوں چیر دیاں





سجناں بگیچویں گلاب بھیجیا  
پنا لکھے خط دا جواب بھیجیا  
رات میری پکڑی چ پکدا رہیا  
دن چڑھے جیہڑا توں خواب بھیجیا  
انگ انگ مہکیا سروریا گیا  
شبداں چ گنھ کیہ جواب بھیجیا  
اوس پچھوں پھیر کجھ یاد نہ رہیا  
سانجھ لیا جیہڑا توں شباب بھیجیا  
دل وچ رکھیا سواس وانگراں  
ہسو کے دا جواب میں شباب بھیجیا  
ویکھ لے سجایا ایہنوں تمنغے دے وانگ  
میرے لئی جیہڑا توں خطاب بھیجیا  
ساڈے ول بھیج ہور صندلی سمیر  
اساں تینوں راوی تے چناب بھیجیا



دیکھو پیار نال جے عینک اُتار کے  
مٹھی پیاس اس طرحاں، اکھاں نوں ٹھار کے  
مٹی دا تن شنگار لو، بازار آکھدا  
دیکھو گے شیشہ ہن کدوں، روح نوں نکھار کے  
تکلیا کرو جی نور وی، اکھیاں نوں میٹ کے  
رنگاں دی کھکشاں دھرو، سہایں دلار کے  
دنیا عجیب پرخ وچ، پایا، میں پے گیا  
اوسے ہی تھاں تے آ گیاں، پھر تر کے، ہار کے  
ادھی کو رات سی جدوں، میں اٹھ کے بہہ گیا  
خورے سی کس نے ناں لیا، میرا پکار کے  
میں نال تیرے تر رہاں، خوشبو تے پون وانگ  
مینوں توں درد سوئپ دے، من توں اتار کے  
چنگا نہیں جی اس طرحاں، کنڈ کر کے پرتنا  
چلے کیوں ہو سوہنیوں، جیدے نوں مار کے



دھرتی میرے چار چغیرے، روح دے اندر وار سمندر  
درداں دے دریا دا پانی، کردا مارو مار سمندر  
اکھ دا پانی، دل دی بستی، جیہا دا رس، پیار محبت  
میں تاں اج تک دیکھے نے بئی، ایہی نے کل چار سمندر  
اک چوانی مٹی کیول باراں آنے کھارا پانی  
پھر وی تپدا کھپدا رہندے، رکھدا روح تے بھار سمندر  
تیری میری پریت کہانی، تابیوں ہنجھ دی جون پئی ہے  
ذات، دھرم تے رنگ نسل دے، ہن ساڈے وچکار سمندر  
انمن شکتی کھنیاں اندر، دیس پرانے اڈیاں کونجاں  
دیکھو بنھ قطاراں چلیاں، کرن گیاں ایہہ پار سمندر  
ندیاں نالے بھر بھر وگدے، وہندے دن تے رات پئے نیں  
بکل وچ سمیٹے سبھ نوں، کداں آخرکار سمندر  
اپنی دولت ہندیاں سندیاں، اچھل جاندے، تھوڑلا ایہہ  
آل دوال اجاڑے سبھ نوں، رکھے دل وچ کھار سمندر



شیراں دے شکاری کدے بکری نہیں پالدے  
ہندے نہیں شکاری کتے ہرناں دے نال دے  
ہمتاں دے اگے تاں مصیبتاں وی لکھ نہ  
کم چور رہندے نے بہانے سدا بھالدے  
متوں ہولے بندے سدا دوسرے نوں ڈیگدے  
عزتاں دے بھائیوال پگ نہیں اچھالدے  
آ جانی چنوتیئے، توں دور کاہنوں کھڑی ایں  
سمیاں دے ہانی کدے ہونیاں نہیں ٹالدے  
ہنساں تے کاواں دے نے اڈو اڈ آلھنے  
بھاویں نے نواسی دوویں اکو جہی ڈال دے  
برکھاں وٹائے ویس، موسماں توں سہم کے  
وکھ درویشاں بانے، ہاڑھ تے سیال دے  
بلی نے پڑھایا شیر، اوسے نے دبوچیا  
بندے شکاری قیدی، اپنے ہی جال دے



میں اوہ برکھ کہتے نہیں ڈٹھا، جس دیاں ہوں نہ چھاواں ہو  
موہ ممتا دا اس گھر مروآ، جس گھر دادیاں ماواں ہو  
ماں تے دھی دی سانجھی بکل، دل تے دھڑکن اکو ہی  
من اندر دی پیڑ نوارن کردیاں دور بلاواں ہو  
دھرت ہنھیری، امبر کالا، پوناں پاگل ہوئیاں نیں  
شکر خدایا، جگنوں جگدا، چانن دا سرناواں ہو  
میں سترنگیاں پیٹنگھاں جھوٹاں، توڑاں تارے امبر توں  
رتجھاں دی لُج عرشاں اتے کس ٹاہنی تے پاواں ہو  
میری مٹھی وچوں کر گئے، پنچ دریا دے موتی وی  
راہ کنڈیالیاں تاراں گھیرن جدھر نوں وی جاواں ہو  
کھ پتلی دے وانگ تماشہ، تكدے تكدے تھک گئے ہاں  
سمجھ نہ آوے کچھے بیٹھا، کھچدا کون تناواں ہو  
ٹوڈی بچے انقلاب نوں افراتفری آکھ رہے  
مکت کراونیاں ایہناں توں ہی، رتجھاں، دھپاں چھاواں ہو





پوناں ہتھ سنبھا گھلیا، اس نوں خود پروان کرو جی  
اینی ڈوگھی چپ دھاری ہے، کجھ تاں میری جان کرو جی  
دستک دے دے ہار گیا ہاں، بوہا بند ہے کھلھیا نہیں جے  
آکھ دیو، توں واپس مڑ جا، اینا تاں احسان کرو جی  
کتھے لکھ، کرس کنجوسی ایداں میرے نال کرن لئی  
نظر مہر دی پا کے جھولی، کجھ پل تاں دھن وان کرو جی  
جان کڑکی دے وچ پھاتھی، نہ ایدھر نہ اودھر ہاں میں  
آکھ الوداع کہہ کے میرا پرتن ذرا آسان کرو جی  
سر شہزادی روپ ونت دے ہوٹھ اڈیکن شبد سریلے  
ایہہ پل مہنگے، مڑ نہیں ملنے نہ ایڈا نقصان کرو جی  
پورن ماشی دا چن سوہنا، رشناں کت اٹیر رہیا ہے  
نیندر پچھے مہنگی دولت، ایداں نہ قربان کرو جی  
سچ، لیاقت، دل دی دولت، ودھ جاوے جے ونڈ دیو تاں  
در تے آئے کھڑے سوالی، مٹھیاں بھر بھر دان کرو جی



اس دھرتی تے دسو کپھڑے، ہے نہیں جو کرسان دے دشمن  
ایس نسل دے سبھ جی ہندے اصل بچ تاں انسان دے دشمن

کھیتاں اندر فصل بیجدا، بھرم بھنڈاری ہون دا پالے  
بھید بھاؤ بن کل دنیاں دے کیوں لوکیں بھگوان دے دشمن

ایہہ دکھری سرحد تے راکھا، ان محاذ دا سنگھ سورما  
کیوں لڈے نے منڈیاں اندر، کرتی نوں سویمان دے دشمن

دیش پریم پیالہ پیندا، انکھ آبرو خاطر جیندا  
چتر چلاک کرسیئیں بیٹھے، کیوں جامباز جوان دے دشمن

پہلاں صرف زمین سی گروی، ہن شاہ منگدے فرد ضمیراں  
تنگیاں، توڑے بن چلے نیں، ویر میرے دی جان دے دشمن

اس دا وی دل کردے بچے پڑھن سکولیں، کرن ڈگریاں  
اس نوں آکھن فیلسوفیاں، جو اس دے سمنان دے دشمن

حق منگدے نوں لاٹھی گولی، نیلا امبر، دھرت گواہ ہے  
کیوں نہ جانن اس دی ہستی، آدم دی سنتان دے دشمن



وطن اساڈا چوراں والی، جتھے دھرم ایمان توں چوری  
دھرم سال وچ وکدا ہر دن کنا کجھ بھگوان توں چوری  
دیکھن نوں دروازے پہرہ، کنڈے جنڈرے تھیں تھیں لمکن  
چین گاجا، روح کرلاوے، ہووے سبھ دربان توں چوری  
شبہ گاجا، کرم گاجا، رہندی کھہندی شرم گواچی  
رہا! تیری اکھ دے ساہویں ہوگئی دھرم ستھان توں چوری  
گڈیاں اتے پٹولیاں عمرے، اک بچڑی ہے بچڑاں کوہی  
قہر کفر نے تانڈو کیتا، مٹی دے بھگوان توں چوری  
تخت سلامت تاج سراں تے، عدلی راجا، راج گاجا  
اییداں تاں ایہہ ہونہیں سکدا، ہووے سبھ سلطان توں چوری  
تیرے ہتھ تلوار کیوں ہے، کرپا دی کرپان دی تھاویں  
لوہے نے کیوں اکھ بدلی ہے، ہتھ وچ پھڑی میان توں چوری  
ہن تاں ساڈا باپ روپیہ، ہے بد نیقی جننی مہیا  
بھرم نگر دے وائی ہاں سبھ وید کتیب قرآن توں چوری



تر رہیا ہے وقت سبھے، صرف اکو چال نال  
توں بھلا نچے پیا کیوں، غرض بدھی تال نال  
بیٹھ جانا موت ورگا، سبق تیرا یاد ہے ماں  
تر رہاں ہاں میں زرنتر درد ونھے حال نال  
توں میری انگل نہ چھڈیں، فی امیدے یاد رکھ  
تپدے تھل وچ، سورجے سنگ میں ترانگا نال نال  
سمجھیا کر توں پرندے، ایہہ شکاری بہت تیز  
پنہرے وچ پاؤن خاطر، چوگ پاؤندے چال نال  
تیر تے تلوار مینوں مار، تیرا کرم ہے ایہہ  
میں تیرا ہر وار موڑوں، صدق والی ڈھال نال  
کاہلیا نہ کاہل کر توں، سہج نوں ساہیں پرو لے  
دھرت نوں نیا کسے نہ اج تیکر چھال نال  
ماچھیاں دی چال ویکھیں، مگر مجھ نے بے لغام  
نکیاں مچھیاں نوں گھیرن، پونگ پھڑدے جال نال



زندگی چ کدے بیبا اسیراں نہیں کریدا  
بُریاں دی بات دا ہنگارا وی نہیں بھریدا  
بہن تے کھلون بارے گل پلے بنھ لے  
سچ پلے ہووے، کلے ہون توں نہیں ڈریدا  
رات پچھوں دن پھیر ایہی نت نیم ہے  
ایویں دم گھٹ گھٹ جیندیاں نہیں مریدا  
جسراں ملاپ روح چ چھیڑے وساد نوں  
اوسے طرحاں مترا وچھوڑیاں نوں جریدا  
ٹٹ گیا سپنا حقیقتاں نوں جان لے  
بھل جا توں سپنا حسین کسے پری دا  
آئیاں ازماؤن تیرا تان میرے ہیریا  
دیکھ کے مصیبتاں نوں ایویں نہیوں ٹھہری دا  
اج نوں سنوار بھائی کل کس ویکھیا  
ایہی اپدیش میرے گو رو تیرے ہری دا





کہہ دینداں، پرورتاں نہ میں، شبد کدے ہتھیار دے وانگ  
تاہیوں ہی ایہہ دسدے نہیوں سر بدھی دستار دے وانگ  
زندگی دی رنبھوی چوں میں، کھسک پچھانہ نوں مڑدا ہاں  
شرم کراں نہ تر داں جد میں، پھر یودھے بلکار دے وانگ  
دھرم دھراتل چھڈ کے تردے، سنگ مرمری فرشاں اتے  
بولن بول کبول چودھری، جیہاں تیز کٹار دے وانگ  
نیتی وان بدل کے نیتی، بدنیتی تے آ گئے نیں  
دھڑا پیارا دھرم دے نالوں، کلگ دے اوتار دے وانگ  
حرف ٹکاؤ، بنے وکاؤ، پیریں جھانجر پا بیٹھے  
راگ سدا درباری گاؤندے، چوغا چگدی ڈار دے وانگ  
دھواں دھار ماحول وشیلا، دم گھٹدا، ساہ پھلدا ہے  
کھ صفحیاں تے زہری خبراں، روزانہ اخبار دے وانگ  
جد وی سفر کراں میں سوچاں، سوچ سوچ کے بہہ جاواں  
کتھے قدم ٹکاواں، سبھ راہ، تیز دھار تلوار دے وانگ



ویڑھے دے وچ رکھڑا لا لئیں چاواں لئی  
خود غرضاً! نہ بیچ اکلیاں چھاواں لئی

چڑیاں بنھ قطاراں امبریں اڈ رہیاں  
رونق میلہ لازم بہت ہواواں لئی

ٹاہنی اتے نچدے پتر مانیا کر  
صرف ہوا نہیں دیندے کیول ساہواں لئی

شہری ہوئیوں آٹھنیاں توڑیں توں  
اس نوں ڈھاہنا پاپ ہے، پنڈاں تھواواں لئی

جد بجلی تر جاوے، جند تے بن جاوے،  
چھتری بندے برکھ نے پکھیاں ماواں لئی

اس دے ٹاہن سلامت رکھیں ازلاں تیک  
بھین میری دی پینگھ تے سچڑے چاواں لئی

ہر بوٹے نوں پانی پاؤ رشتیاں وانگ  
ایہہ وی سبق ضروری، بھین بھراواں لئی



راجیاں نوں یاد نہ جے قول اقرار ہے  
ساڈی الغرضی ہی بہتی ذمہ وار ہے  
انبیاں نوں ٹک ٹک باغاں نوں اجاڑ دے  
اک نہ اکلا، ایہہ تاں طوطیاں دی ڈار ہے  
کاواں نے سی کھوہے ساتھوں زور نال آلھنے  
گھگیاں وچاریاں نوں اپنی کتھے سار ہے  
جال وچ اڈنا پرندہ پھاتھا ویکھ لو  
چوگ والے لوبھ پچھے ہو گیا شکار ہے  
تلیاں تے سیس والی فیس اوکھی تارنی  
ماریا دوچتی، سر گڈے جنا بھار ہے  
وکھ وکھ آلھنے تے اڈ نے اڈاریاں  
قافلہ ہی اندروں تے فٹ دا شکار ہے  
کہڑا ویری دے گیا، کھڈونا ایہہ معصوم نوں  
بچیا نہ کھیڈیں، ایہہ تاں اک دا انار ہے



نہ مطلع نہ مقطع ایہہ تاں درد کہانی رات دی  
ترل وارتا ایہہ تاں دل دے اندر لے جذبات دی  
ہور کسے نوں کیہ سمجھاواں، میں تے آپ گواچا ہاں  
سمجھ اجے نہ آئی مینوں حالے اپنی ذات دی  
روٹی نوں کاں جھیٹا مارو، کھوہ لے جاؤ بالاں توں  
نیت کھوٹی سمجھ گیاں میں، کالے مُونہہ بد ذات دی  
سوچ سمجھ کے چا تر لوکاں، تانی ایہہ الجھائی ہے  
کوشش کر سلجھاؤنی چاہناں گنجھل ایہہ حالات دی  
جھیوری دے ہتھاں چوں بھانڈے مانجھدیاں جو چھڑدی ہے  
سرگم ایہہ تاں اوہدے گھر دے سکھنے توے پرات دی  
زہر پیّاؤندے راج گھرانے، پتہ نہیں ہن کتھے نیں  
نسل اجے وی بڑھکاں مارے، وش پیندے سقراط دی  
چار چنیر یوں گھریا بندہ، پھاہ لے کے کیوں مردا ہے  
پیڑ پچھانوں کدھر جاندی، اس دے آتم گھات دی



کچیاں گھراں دے بوہے کندھاں نوں سنبھالیے  
وڈے نے سوال ایویں ہس کے نہ ٹالیے  
ساگراں دی ہک تھلے ساڈا ہی سامان ہے  
چلو جی مدھانی پھڑ ایس نوں کھنگھالیے  
پھردے نے چور تے لٹیرے شرھیاں ہن  
اپنے بنیریاں تے آپ دیوے بالیے  
کاہدا اوہ ایمان جو بازار وچ بہہ گیا  
چور اتے سادھ اتھے بنے بھائیوالیے  
تیرا انصاف کہندے کھنھ لا کے اڈیا  
فیصلے سناویں کیسے دلاں دیئے کالیے  
حداں سرحدیں دے ارار پار موت ہے  
زندگی دے راکھے ہو گئے عقلوں دیوالیے  
پے گیا پھٹارا راگی گاؤندے نے بسنت راگ  
فٹ پوئی توں وی ہن آس دیئے ڈالیے





نہ گھبراویں جین جوگیا، اج مگروں ہی کل ہوندا ہے  
ڈھیری ڈھاہ کے بہہ نہ جاویں، ہر مشکل دا حل ہوندا ہے  
چار چغیر گھمریاں پاؤندا درد پرندہ بہن نہ دیویں  
من دی ٹاہنی پکا رہ کے ایہی بندا سل ہوندا ہے  
توں تکراروں سدھ م سدھا پہنچ گئیں ہتھیاں تیکر  
غصہ تاں چنڈال بھراوا، گل دا اتر گل ہوندا ہے  
ہر ویلے برسات اگن دی، بول تیزابی مُونہہ چوں کڈھیں  
سخن سنہڑا بھیج بھیڑیا، جے تیرے توں گل ہوندا ہے  
ون وچ ککھا رکھ کیوں ہووے، ہمسایہ ہے ماں پیو جایا  
تیز ہنھیریاں والا جھٹکا، تده بن کتھے جھل ہوندا ہے  
بیہمتاں دی یاری زحمت، رحمت سگت ہمتیاں دی  
بے وشواس نشانے توں بن چار قدم نہ چل ہوندا ہے  
درد کہانی بن جاندی اے، اکٹھیاں ہو کے ہڑ دا پانی  
صبر، صدق، سنتو کھ بنا ایہہ کلیاں کتھے ٹھلھ ہوندا ہے



اک پڑ تھلے دوجا اتے، پیس رہے چکی وچ دانے  
بھولے لوک الاپ رہے نیں، سبھ کجھ ربا تیرے بھانے  
ساڈا آٹا سانوں ونڈ کے، آکھی جان وجاؤ تاڑی،  
کنے چا تر ہو گئے ویکھو، کرسیدھاری زر جروانے  
کنک وی ساڈی، ہتھ وی ساڈے، پیسا کوئی ہور سمیٹے،  
دھرتی دھرم گواچ گیا ہے رکھوالا نہ فرض پچھانے  
چڑیاں موت گنواراں ہاسے، ایہہ ورتارا مکدا نہیوں،  
پھرن شکاری کس غلیلاں، دھرم نگرہیوں، دھر لدھیانے  
انھا بولا مایہ دھاری، شستہ دھاری تے ادھیکاری،  
کہڑا در کھڑکائیے دسو، جہڑا ساڈا درد پچھانے  
پھر بتاں نوں پوج رہے ہاں، مکت کرایا جس توں گرواں  
کدھر گھیر لیاے سانوں دھرم دے ناں تے مانس کھانے  
یوگی بھوگی رل گئے سارے، وچن رل کے وطن پرستی  
سو پھل کھڑے کیا ریوں پٹ کے، بیج رہے نے جو گیا بانے

ست یِگ، دواپر، کال تریتا کلِگ تیکر اکھیاں میٹ  
جنت پرندے ہن وی گاؤندے، اوہدیاں داتاں اوہی جانے  
بھیڈاں منن والیاں دی وی، نسل بدل گئی، ایہہ کیہ ہويا  
ان اتارن والے رج گئے، آجڑیاں دے پاٹے بانے

00



داس کبیر دی جھگی ہے کیوں گل کٹین دے پاس اے وی  
چھ صدیاں دا پہیہ گھمیا بدن دی نہ آس اے وی  
ایک نور تے سبھ جگ ایتجے، گاؤندے ہاں، پر مندے نہیوں  
لسیاں نوں تاں لینے پیندے، پچھ پچھ کے کیوں سواس اے وی  
راج بھاگ دی اردل اندر گنونتے کیوں چور جھلاؤندے  
ہر عرضی تے کیوں لکھدے نے، آگیا کاری داس اے وی  
بندھن مکت بنایا سی توں، سو پھلاں نوں کھڑن سکھایا  
خشبوئیاں نوں گھر نہیں ملیا، بھوگدیاں بنواس اے وی  
میرے اندر کچھ نہیں میرا، سبھ کچھ تیرا، پھر کیوں ہووے  
تیری نظر سولی اندر، دھنوتا ہی خاص اے وی  
ترس دا پاتر گیا نونٹیا، لکدا پھردا چانن کولوں  
کالکھ دی سرداری تھلے، تڑف رہیا اتہاس اے وی  
تانا تنیا شبد سنہری، جسدی خاطر داس کبیرا  
کرم بھوم وچ پھرے گواچا، تیرا پگن بلاس اے وی



ساڈے ہوندے سُندیاں پنجاب گیا ٹھگیا  
ٹھگیا وی ایداں سانوں پتہ وی نہ لگیا

تھالی وچ روٹی سی چپاتی کدوں بن گئی  
چھولیاں توں چنے کداں بنے ڈھورا لگیا

چنگے بھلے چول تیرے چاولاں چ رل گئے  
کھائی جا گتاوا توں، پنجابیا او ڈھگیا

تینوں وی بناؤن گے ایہہ ہور دا ہی ہور کچھ  
ویریاں دی اکھ ہن تیرے اتے جھگیا

تیرے جے مشیناں چ ہزاراں ساز قید نیں  
وجیں گا توں کداں ہن ڈھول اُتے ڈگیا

تیریاں اڈاریاں دے نال سدھا ویر ہے  
کٹ دے توں نشیاں دا جال شیر بگیا

ویکھ لے سرہال☆ تیری رت نوں ڈکاریا  
نوں من ریت سکی مونیوں پت جگیا

\*رت پینا ریگن ہارا جیو





بڑا ہی ورجیا خود نوں ایہہ کہنوں رہ نہیں سکدا  
میں تیرے واسطے تاں ہو پٹھاں لہہ نہیں سکدا

ادھوری گفتگو چھڈ کے توں مڑ کے بات نہ چھوہی  
میں تیری بے رخی اپنی وی جندے سہ نہیں سکدا

توں میری اکھ وچ اتھرو دی جوئے کیوں پئی پیڑے  
جو پتھر ہو گئے، ہن نیر بن کے وہ نہیں سکدا

اکلا آدمی ادھا ادھورا، کیہ کہے، کسنوں  
میں دل دی وارتا تیرے بناں تاں کہہ نہیں سکدا

میں اڈنے باز دے کھنہاں تے امبر بہت گاہیا ہے  
تیری دہلیز تے میں چوگ دے لئی بہہ نہیں سکدا

صرف کمزوریاں بندے دیاں مُونہ بہار کر دیوں  
ثبوتا آدمی اوداں کسے توں ڈھیہہ نہیں سکدا

کدے ویکھیں، گنیں، بکل میری وچ چن سورج نے  
میں تارہ نگر سارا، لے کلاوے، چھہ ☆ نہیں سکدا  
\* لک چھپ کے بہنا



چکی پھردیں لاش اے وی، تن جیندا من اندروں مریا  
بن منزل توں تردے تردے، تیرا حالے دل نہیں بھریا؟  
اینی لمی چُپ دا کارن، دس تاں صحیح کدے توں جندے  
میرے نال گفتگو کردی، سچ دسیں نی دل نہیں کریا؟  
اک ٹاہنی تے اپنے الو، راگ الاپن آپو اپنے  
جس وطن دا راکھا ہے رب، ہن وی مریا، ہن وی مریا  
موت دے نال مشکری کردا، اوہ پنجاب گواج گیا ہے  
ہن تاں اتھے رکھ تے بندے، جنت پرندہ ہر جی ڈریا  
آپے ہی توں دس بھراوا، میری سکھیا کنج لوے گا؟  
کئی دیر گلاس تیرے ہتھ نکو نک شراب دا بھریا  
تیری زلف سنواراں ہتھیں، رتجھ اے وی مچل رہی اے  
تینوں ورن لئی دس پرینے، کیہڑا ستم نہیں میں جریا  
بدلاں دی چنی دا اوہلا، پاسے کر، لشکوراں بن جا  
دید پیاسے نیناں خاطر، تیرے توں ایہہ وی نہ سریا



بچ جا پنجاب سیہاں، چوکیدار کہہ گیا  
اوناں تاں بچا لے، چنا پلے تیرے رہ گیا  
نشیاں سمیت کنے ویلاں تینوں ماریا  
ایویں تاں نہیں پہیہ تیرا پڑی توں لہہ گیا  
نرے دی پنڈ بھاری، تریا رہ، رکیں نہ  
اُٹھیا نہیں جانا جے توں پانی وچ بہہ گیا  
سورما سدییوی جنگ لڑے تاں ہی سورما  
گندا نہیں کنے وار بکڑی تے سہ گیا  
چمین وی تاں اُٹھیا سی 'فیم دے پہاڑ' چوں  
جگ سارا کوکدا سی ڈھیہہ گیا ہی ڈھیہہ گیا  
لگ گئی سیونک تیری دیہی تے دماغ نوں  
لکھ دا سی ہندا ہن لکھ دا نہ رہ گیا  
اگ تاں جونا سارے سینیاں چ قید ہے  
جگ مگ جگے جہڑا تیلی وانگوں کھہ گیا

سانجھ توں ملاحا بیڑا، چپو مار تان نال  
کنا کجھ پلاں پیٹھوں وھندا وھندا وہ گیا

00

## عوامی شاعر اُستاد دامن دے ناں

مادھو لال حسین دے حجرے شبد آگن دے گھڑدا تیر  
پنچ دریا جس اندر شوکن، دامن سی استاد فقیر  
جسم چیر کے وطن بنائے، کھس گئے کھنہ پرندیاں وانگوں  
ساری عمر رہیا اوہ سیندا، پلے پاٹی روح دی لیر  
بندے وچ وشواس جگاؤندا کہندا ہمت کر لئو یار  
جھنگ سیالاں ول نوں چل پو، اگلے پنڈ اڈیکے ہیر  
وارث دا سی اصلی وارث، لوک پیڑ دے ہدم ورگا  
زندگی دی ٹکسال چ ڈھلیا، حق سچ تے انصاف دا پیر  
نہ سی وید، حکیم، اولیا، نبض پھڑے بن دسدا سی  
ثرت پچھان کے کہہ دیندا سی، کرسی دی اکھ وچ ہے ٹیر  
حداں تے سرحدیں اس لئی، ارتھ بین سن، روکاں وی  
صدق سلامت کر کے اوہدی، ہوک تاں جاندی امبر چیر



کہندے نیں اک وار ملدیاں، لالی ویکھ کے اکھیاں دی  
کوک کیہا اس، سانوں پٹیا، جس نوں کہن آزادی ویر  
واہ او شاعرہ! پہریدارا ماں بولی تے غیرت دے  
پیاس مٹاون میری، تیرے بول جو ندیوں نکھڑے نیر

00



رات ہنیری ہوکا دیویں، آکھیں بار م بار او یار  
چن ستارے سورج میریاں دو باباں وچکار او چار  
تیرے ہتھ وچ سوہا پرچم، گھٹ کے نہ رکھ، لہرن دے  
رنگ رتڑے نوں بولن دے توں اس موتے نہ مار او یار  
ایہہ بکل برہمنڈ جڈی اے، لوک ملکتیاں دا جو خواب  
اُسُنوں گھٹ کے سیمت نہ کر ہور ذرا وستھار او یار  
میں وی تیرے نال برابر، دھر بن بال مشال کھڑاں  
بول ذرا توں کیہڑی گل دا، روح تے رکھدیں بھار او یار  
ایہہ جہڑی اسمان چ لٹکے لیک جہی کرپان دے وانگ  
شعراں میریاں روپ بدلایا، بن بجلی دی تار او یار  
جادوگرنی کرسی نے سبھ رینگن ہار بنا سٹے  
اڈنے پڈنے سپنے ہو گئے، کیوں ایسے لاچار او یار  
آپاں حالے فوج پیادہ، کھلری، کٹھی کیتی نہیں  
ساڈی بستی لٹن مڑ کے چٹھ پئے گھوڑ سوار او یار



میں تیرے ساہاں چ حاضر، الوداع کہنا نہیں ہے  
اک پل کیہ، اک ساہ وی، دور میں رہنا نہیں ہے  
پلک دے اندر نورانی، روشنی وچ گھل گیا ہاں  
ایس تھاں بن ہو کدھرے میں کتے بہنا نہیں ہے  
توں کدے وی شام ویلے، ایہہ کہیں نہ، جان دے ہن  
بن سواساں جین والا درد میں سہنا نہیں ہے  
اے محبت! عجب تیری داستاں ہے مہک ورگی  
ایس توں مہنگا کدے میں ویکھیا گہنا نہیں ہے  
کیہ کہاں، کداں کہاں، توں کیہ کیہ مینوں بخیا اے  
اک دو جئماں چ میتھوں، قرض ایہہ لہنا نہیں ہے  
ہو گئی سی پیڑ پتھر، پگھلیاں آرام ہے ہن  
تیرے بن دریا دے دے، کلیاں ویہنا نہیں ہے  
دل دی تختی اکریا ہے مہک دے پھمبے محبت  
آخری ساہاں دے تیکر، حرف ایہہ ڈھہنا نہیں ہے



میرے ہتھ وچ سورج نہیوں، دیوا ہے اک ٹمک رہیا  
ایہدے سر تے رات ہنھیری، وچوں دی میں گزر گیا  
وکدے نے گفتار دے غازی، منڈی دے وچ گا ہک بڑے  
ایس شہر کردار گواچا، چانن سوہی لیک جیہا  
کالا امبر وچ وچ تارے، ایہہ ہن وچھڑے میت مرے  
سلھی اکھ نے ویکھدیاں ہی بھریا ہوکا سرد جیہا  
سپیں میں دریا ہونا سی، وھندا جے میں بہندا نہ  
نہ پیندے پھر ریتل بٹے، ایہہ توں بالکل ٹھیک کیہا  
بجھیا بجھیا مر جاویں گا، جگ تے کر دے سرخ سویر  
چار چنیر وچھا دے چانن، دل نوں کنی وار کیہا  
سورج دی لشکور ورگیا، دھرت اڈیکے تینوں ہی  
کرناں بچ سیاڑاں اندر، گلیاں کوچے توں رشنا  
گیت غزل جاں آکھ رباعی ایہہ تیرے تے زبھر ہے  
اتھرو کریا صفحیاں اُتے، دل نے اپنا درد کیہا



دن چڑھدے توں شام تیک جد یاداں جھرٹ پوندیاں نیں  
ساہاں وچ سرگم چھڑ پیندا، پھر پوناں نغے گوندیاں نیں  
کدے سورج چن تے تاریاں وچ، جندلہدی تینوں ساریاں وچ  
سنیا کر امبراں والڑیا، جد کونجڑیاں کرلوندیاں نیں  
تپ جاوے پنڈا دھرتی دا، مرجھاؤندے برکھ بروٹے جد  
انداز عجب مینہ منگن دا، تد چڑیاں ریت نہوندیاں نیں  
دھرتی وچ جڑھاں سلامت جے، پیتیاں نوں لوریاں پون دے  
کھڑدا ہے باغ بگیچا پھر خشبویاں آپ بلوندیاں نیں  
سورج دی اکھ وچ اکھ پاواں، کرناں وی میرا نیڑ کرن  
چانن دی سرم سلائی لے، میرے نیناں دے وچ پوندیاں نیں  
روح والے ورق فرولدیاں تے آکھن مُونہہ چوں بول ذرا  
دستک در دستک دے دے کے، دل دا بوہا کھڑکوندیاں نے  
کھوہاں دے پانی اتر گئے، آہ اکھیاں وچوں کیہ وگدا  
ہنجوآں دی مالھ نہیں تردی، ٹنڈاں کیوں بھر بھر اوندیاں نیں؟



سپنے وچ روز میں ویکھ رہاں، میری ماں تے چاچی تائی سبھ  
حالے وی سانجھا بالن لے، ہر شام تندور تپوندیاں نیں  
خواباں دے اڈن کھٹولے وچ، یاداں اسوار سدیوی نیں  
دن رات میرے سنگ جاگدیاں، خورے کس ویلے سوندیاں نیں

00



ہمیشہ ڈھال ہی بننا، کدے ہتھیار نہیں بننا  
تسیں راہاں چ چھاں بننا، کدے دیوار نہیں بننا  
تسیں خوشبو دے وانگر رکنا پوناں چ گھل مل کے،  
کدے باغاں دی روح تے بے وجہ ہی بھار نہیں بننا  
ایہہ کالکھ آدمی نوں خوردی برباد کردی ہے،  
ہنھیری رات دا بھل کے کدے پریوار نہیں بننا  
تسیں دھپاں تے چھاواں نوں، سدا ہی ماننا کھلھ کے،  
کدے وی کمریاں دی جیل دا شنگار نہیں بننا  
تسیں جل دا تروکا دین خاطر مشق بن جانا،  
گھراں نوں راکھ کردے اوہ کدے انگیار نہیں بننا  
تسیں ہر وقت ہی ترین مشالاں بال کے شبدو،  
کدے لالچ دی جھانجر پھندی اخبار نہیں بننا  
تسیں سنگل صحیح، پر پگھل کے وی یاد ایہہ رکھنا،  
تسیں کرپان بن جانیو، کدے تلوار نہیں بننا

بڈھا دریا لدھیانہ دی ہونی دے ناں

میں وی نزل نیر کدے سی ستلج دا ساں وہن دوستو  
ہن تاں مینوں بڈھے تائیں گندہ نالہ کہن دوستو

کیوں شاہاں نوں سمجھ پوے نہ، جل وی اک دیوتا ہندے،  
کرن پلٹ پوتر پانی، پکا بنے گرہن دوستو  
فکر کرن، نہیں ہمت کردے، پڑھے لکھے سبھ گوڑھ گیانی،  
مر چلے نے سوچدیاں ایہہ، رل کے نہ ایہہ بہن دوستو

اک پاسے سرمایہ ظالم، زہر پیائے نہ پچھتائے،  
بھولے پیچھی ایس قہر نوں، بھانا من کے سہن دوستو

ون سون رسائناں گھولن، میرے پانی اندر جھڑے،  
دانویر بن کرن وکھاوا، مگروں نہ ایہہ لجن دوستو

بند شیشیاں والیاں کاراں، جانے نہ بے کرک زمانہ،  
بدبودار ہواڑھ بچ جینا ڈاڈھا اوکھا رہن دوستو

میرے وچ وشلا پانی، جتھوں لنگھدا ونڈدا کینر،  
پہریدار بنو تے جاگو، کالے ٹکے ڈھہن دوستو



رن بھومی نے روپ بدلایا، انٹرنیٹ میدان بن گیا  
سچ چکھو تاں نیتا بن کے، برا بولنا شان بن گیا  
پگ پوچھو سوہنی صورت، ڈھڈ اندر پیٹرول ٹینکیاں،  
اگنبن ہی چھڈی جاون، جو جتھے پردھان بن گیا  
خود نوں آکھے جتنا سیوک، کہہ کے سیوا چھکدے میوہ،  
کہنی تے کتھنی وچ پاڑا، کیسا ہے ایمان بن گیا  
ہر گھوڑے دے مگر وچھیرا، کرسی دا حقدار کہاوے،  
کملا رملہ جو کجھ بولے، اوہی سبھ فرمان بن گیا  
کاٹھ دیاں لتاں نوں بونے، سمجھ رہے نے اپنی ہستی،  
کرن منادی گھلیئے جسوں، سمجھے بڑا مہان بن گیا  
گھر دی منجی چھڈ کے جو وی، کرسی خاطر بھٹک رہیا سی،  
دن چڑھیا تاں سپنا ٹٹا، بوہے تے دربان بن گیا  
لوک کہا شبدان نے مینوں، جو کجھ ویکھیں کیوں نہیں لکھدا،  
جو کجھ تکیا لکھیا اوہی، ایہی غزل دیوان بن گیا



کیہدی اے مجال سانوں ڈبی وچ پا لوے  
مہک دا وجود، بھائیں ساہاں وچ ساہ لوے  
اپنی گل صاف، میں نہیں کپڑا، وجود ہاں،  
جدوں دل کرے مینوں پا لوے تے لاہ لوے  
ساگروں وصال سیدہ، نشپا اڈول ہے،  
جنا زور لگے اوہدا، اونا ہور تاء ✖ لوے  
اپنی ہی اگ وچ مچدے نوں کہہ دیو،  
کدے تاں پیار نال سانوں چتوں چاہ لوے  
چڑھے گھوڑے ہر ویلے، رہنا وی تاں روگ ہے،  
برکھاں دے پیٹھ پیٹھ، کہو، کدے ساہ لوے  
دھوئیں دے پہاڑ اتے، کہنے کیتی یاترا،  
خواباں دے پرندے ہن دھرتی تے لاہ لوے  
ساڈے پنڈ اوسے نوں ہواواں دین لوریاں  
کندھ نال کھڑا منجا، جہڑا چھاویں ڈاہ لوے





پاکاں اوہلے لکيا سورج، چڑھدا تاں پر بھات ویکھدے  
چپ دی نہیر گفہ وچ رہندے مرچلے ہاں رات ویکھدے  
نیویں نظر کریں، نہ بولیں، ہوٹھیں جندرے لا نہ بُھلیے،  
دو ہرنوٹے نین تیرے کیوں نہ میرے جذبات ویکھدے  
ہجر وصل وچ انتر ٹیا، وقت کھلوتا ہووے جیکن،  
برکھاں وچ دی چن دا چہرہ، جند نثیائی جھات ویکھدے  
صفر برابر میری ہستی، رقم بناں بے توں نال تریں،  
بیت رہی ہے عمر اے تاں یاداں دی سوغات ویکھدے  
میں وی چن جاں سورج ہندا تیرے دو نیناں وچ جگدا،  
دیناں والے ذات نوں چھڈ کے، بے میری اوقات ویکھدے  
ہس پیا کر چھبے جاییں، کھڑ پیندے من باغ بغچا،  
مہکے جیکوں رات دی رانی، تاریاں دی بارات ویکھ کے  
ویکھ کوں گھنگھور گھٹاواں لے کے کنیاں آ گنیاں نیں،  
جی کردا سی بھج کے دوویں، انج پہلی برسات ویکھدے



تن دی بھٹکن، من دی اٹکن، ثابت قدم اڈول رہے  
عقل دی سنگلی، پھڑ لے گھٹ کے، کھسکے نہ ایہہ کول رہے  
ہر منزل ہی خود سرناواں دس دیندی ہے پاندھی نوں  
پرپک نشا ہووے جیکر پیراں وچ سمتول رہے  
پھر کیہ ہویا چڑھی ہنیری، ایہہ تاں پہلی وار نہیں  
بال چراغ بنیرے دھر دے، ٹک جانے جو ڈول رہے  
مٹی تے قابض نوں دسو، کول بٹھا سمجھا دیو،  
وگدے پانی، خوشبو، پوناں، دسو کس دے کول رہے  
نیلے امبر آلهنیاں لئی، سپنے رتجھاں، اتھرے چاء  
میری روح دے اڈنے پنچھی ویکھ لوو پر تول رہے  
سندا کیوں نہ بابل بن کے، لکدا پھر دیں شیشے توں،  
شکر منا توں، ایہہ بے جیبھے درد کہانی فول رہے  
اودوں تک تاں سارا کجھ ہی، سبھ اچھا سی، تخت لئی،  
دھرتی والے جد تیکر سی، حق سچ توں انھول رہے



جیہناں دے ہتھ کنجیاں نے اوہ لاگے بہن نہیں دیندے  
ساڈے دل کیہ ٹٹدا بھر دا کجھ وی کہن نہیں دیندے  
ولی قندھاریاں روپ بدلایا، پر نہ بدلی ہے عادت،  
دل دریا نوں اس دھرتی تے کھلھ کے وہن نہیں دیندے  
کی دساں اس من دی حالت، اندروں باہروں ہے زنجی،  
بندے جو ہمدرد اوہ پلے لکھ وی رہن نہیں دیندے  
مان مرتبے مانن اتھے گرگٹ ورگے چہرے وی،  
مالک نوں اوہ بھرم پہاڑوں، پیٹھاں لحن نہیں دیندے  
دیکھ لوو کلجگ دا پہرہ، مومنہ سر کالیاں والے دا،  
جسدے ہتھ وچ شیشہ ہووے، نیڑے کھہن نہیں دیندے  
چار دیواری اندر چوغا، رج رج کھاندے نے پنچھی،  
بن پرواز مرن دا سانوں، درد وی سہن نہیں دیندے  
کڑتے نال پجامہ ساڈا سبھناں نوں ہی چبھدا ہے،  
تاہیوں کرسی لاگے ساڈا منجا ڈہن نہیں دیندے



ایس وطن وچ گھر کتھے ہے، خالی چار دیواریاں نیں  
لہجھ دیاں ایہہ عمرہ بیتی، تاں ہی اکھیاں بھاریاں نیں  
میرے پیریں بچپن توں ہی، بجھ گئے پریت، دسدے نہیں،  
اپنے توں ہی اپنے تیکر، تاہیوں سگل اڈاریاں نیں  
توں کہندا ایں تیز تراں میں، پر اس گل نوں بھل جاویں،  
استریاں دی مالا گل وچ، پیراں ہیٹھ کٹاریاں نے  
باغ بگچا کمبیا سارا، پتا پتا سہم گیا،  
راکھیاں دے ہتھ، اپنے ننیں، ویکھیاں جد توں آریاں نیں  
پہلی واری ایس قسم دا دھرم ویکھیا دھرتی نے،  
دھرم ستھان ورمیاں اندر، دھریاں ناگ پٹاریاں نیں  
تیرے ہوندیاں چونڈ رہے نیں، عصمت، زر جروانے سبھ،  
راج کردیا، بند کیوں تیریاں، اکھاں، بوہے باریاں نیں  
دیر سویر جواب تاں دینا پنینیں سرب سوالاں دا،  
جاناں وار گیاں جد ساتھوں پچھنیاں گلاں ساریاں نیں



تان دیو ہریالی چھتری، دھپے سڑدی دھرتی ماں جی  
وقت اجائیں جان دیو نہ، لا جیکارا آکھو ہاں جی  
بوہڑ تے پیل، نم تروینی، کردی سدا سواگت جتھے،  
اس رکڑی وچ بہت برکتاں ہندیاں سی بئی ایسے تھاں جی  
کڑیاں چڑیاں بن بے رونق، بنا باغیچہ قہر خدایا،  
برکھ بچ وشواس دواؤ، پتر نہیں، سپتر ہاں جی  
ون ہریالے، باغاں کچھڑ، امب ٹپکدے ٹاہناں اتوں،  
ایہہ سبھ ہووے، تیری دھرتی، دیس دواآبا منینیں تاں جی  
دھرت بسترے اپر چادر ہری کچور وچھا لئیے جے،  
اوہ دن موڑ لیایے جسراں، چھاویں منجا ڈاہندے ساں جی  
آلھنیاں لئی بہت ضروری، برکھ جھاٹلے گھر دے نیڑے،  
پچیاں خاطر بنن کتاباں چڑیاں مور کبوتر کاں جی  
پھیر کہیں گا، مینوں ستیاں، توں تے ویر جگایا ہی نہ،  
وقت گزر دا جاندا نکیا، اپنی گل میں آکھی تاں جی





بھگت سراجا اودھم سنگھ تاں آنکھی رت کردار دا ناں ہے  
لوک مکتیاں خاطر پلھری سوہی سرخ بہار دا ناں ہے  
دیس پنجاب دے سرتوں لتھی، مڑ چن کے بدھی ہوئی،  
ویراں دے سر شملے والی آنکھیلی دستار دا ناں ہے  
رنگ نسل تے ذاتوں اچڑا آزادی دا پرچم سچڑا،  
جلیاں والا باغ تاں ساڈے اس وڈے پریوار دا ناں ہے  
ورثے دا سویمان برابر، قائم دائم جت دا نشا،  
سیس تلی تے دھر کے تردی، بجلی جہی رفتار دا ناں ہے  
ہمت، صدق، دلیری چوتھا، مان بھراواں دا بے رل جے،  
حق سچ تے انصاف لوڑدی، زبھو سوچ وچار دا ناں ہے  
جبر ظلم دے سدا ساہمنے، نہ لفدی نہ جھکدی جھڑی،  
بابر نوں جو جابر بولے، میری گر گفتار دا ناں ہے  
توں جو مرضی سمجھ لویں ہن، گیت غزل کوتاواں کہہ لے،  
میرے لئی تاں قرض پرانا، سرتوں اترے بھار دا ناں ہے



سارا جنگل ساڑ لیا ہے، سوچ ذرا کیوں آپاں کھپے؟  
لوک رہے نے بانس دے بوٹے، سبھ دی سینے، سبھ دی سپے  
پت جھڑ والی کتھا کردیاں جھڑ دے پتے بہت گنائے،  
وقت پھٹارے دا جے آئے، آ اس نوں جی آیاں کہیے  
نویں کرومبل نواں سنبھا، نویں سپنیاں نوں کھنھ لگے،  
کس منزل ول جانیں آپاں، نشا کریئے رل کے پیہے  
سجے ہتھ نوں کھبا جیکر ساتھ نہ دیوے تاڑی دے لئی،  
ایداں ہی روح بے سر ہووے، دن تے رات گواچے رہیے  
قدماں دا سمتول ضروری، مینوں پکھو تھڑکے کولوں،  
من تے بدھی سرت اکاگر، رل کے تورن چارے پیہے  
ماں دھرتی تے جینی دے سنگ ماں بولی وی کدے نہ وسرے،  
دیش، بدیش، سمندر ٹپ کے، بھاویں جتھے مرضی رہیے  
توں مینوں، میں تینوں جیکر ہن تیکر وی ملیا نہیوں،  
وچھڑیاں ہی مر نہ جانیئے، اک دوجے دے دل وچ لپیے



کدے وی آس دے دیوے، ہوا توں ڈرن نہ دینا  
امیداں وقت جو کردے، کدے وی مرن نہ دینا  
ہنھیری رات ہے، طوفان، جھکھڑ، ڈولڈے سائے،  
تے جیوندی لاش وانگوں دوستی نوں ترن نہ دینا  
سراں تے شام ہے، سورج سمندر ملن لگے نیں،  
دلاں نوں سانجھنا تے سرد ہوکا بھرن نہ دینا  
کدے وی رات دے سائے توں ڈر کے سہم نہ جانا،  
جیوندے خواب نوں اگنی حوالے کرن نہ دینا  
بڑے طوفان آئے، آؤن گے وی ہور چڑھ چڑھ کے،  
دلا توں حوصلہ رکھیں، امیدیاں ٹھرن نہ دینا  
خنکسی جوہ دے اندر پھرن ٹولے بے لگامے جو،  
توں اپنی فصل اندر ورج، ایتھے چرن نہ دینا  
کدے جے اون اوہ پل، کہن جو دڑ وٹ کے بہہ جا،  
برونہیں چڑھن نہ دینا، کدے وی شرن نہ دینا



چیکدے سارے کہ ایہہ تاں رجیاں دے گھر بھرے  
تخت جنھاں نے بٹھایا، نہ کرے خوش، کیہ کرے؟  
بے دلیے نال چرچے، بحث ہن میں کیہ کراں،  
سمجھدے مورکھ کہ ایہہ تاں، کائر ہے، میتھوں ڈرے  
جال وچ ساڈے ہی جی نیں، چوگ دے لالچ شکار،  
وکن مگروں جل پری پھر پانیاں وچ، کیہ ترے  
ترپدی خواہاں دی گھگی، تیر وھدے آر پار،  
کنے سورج چڑھ کے لہہ گئے، زخم تاں اوویں ہرے  
تردیاں دے نال، تردا قافلہ یارو ہمیش،  
باہر چل، تے ویکھ منزل، بیٹھ نہ چھپ کے گھرے  
نیل گ و آں، جانگی گدڑ تے ویری بے شمار،  
ایہہ آوارہ وگ مڑ مڑ فصل کیوں ساڈی چرے؟  
غرض پچھے رات نوں نہ رات، چٹا دن کہیں،  
مرن توں پہلاں ہی بندہ، ایس موتے کیوں مرے؟

توں وی لاہ دے گھنڈ، کہہ دے چور نوں توں چور ہن،  
اوہ تاں آ کے بہہ گیا ہن، مل بیٹھا چوترے  
ورقیاں تے رنگ بھر دے بن سمیں دا چترکار،  
میں تاں لکھ تے تان لا کے، شبد جو میتھوں سرے

00





میں اکھیں تک کئی واری، بدل وی محبتاں کردے نیں  
پر دھرتی والے روح اتے کیوں پاؤندے رہندے پردے نیں  
ایہہ پتہ نہیں چوگردا ہے جاں من کمزورا، خبر نہیں،  
دل تیز دھڑکدا ملن سار، کیوں ٹھنڈے ہاؤکے بھر دے نیں  
نرچھل نرکپٹ وکارہین، سچی وی محبت ہندی ہے،  
ایہہ اگنی وسترہین بھلی، مانن توں سارے ڈردے نیں  
رماں دی قیدن دھرتی ایہہ، جسماں دی غلامی کردی ہے،  
ایہہ برکھ بروٹے، جنت جیو سبھ روح دا ہانی وردے نیں  
سپنے تے رتجھاں گھگیاں جہے، معصوم پرندے وانگ نرے،  
ایہناں دے قاتل ویکھے میں، خود اپنے ہتھوں ہردے نیں  
ایہہ سترنگی جو پینگھ دسے تے آبھا منڈل رشاں دا،  
کرناں دا میلہ، دھرم نال ایہہ سبھ جی میرے گھر دے نیں  
آ کچھڑ چڑھیے قدرت دی سبھ بھل بھلا کے ولگنیاں،  
جو روح دے گھنگرو سندے نہ، اوہی تاں صدمے جردے نیں



سنیا سی رتاں اکسار نہیوں رہندیاں  
ساڈے پچھوں پھیر کیوں بلامتاں ☆ نہیں لپہندیاں

دھپاں، چھاواں، رات، دن پھیر نوں وی جان لے،  
ندیاں وی سدا اکسار نہیوں وہندیاں

من چ ترنگاں تے امنگاں رکھیں قائم توں،  
بھادیں ایہہ ودان دیاں سٹاں رہن سہندیاں

دھرتی دھریکاں دھیاں ہنجھوآں دی جون بچ،  
مانگ بچ سندھور تے اداس ہتھیں مہندیاں

بننا سی جنھاں اک دوسرے لئی آسرا،  
باہواں اک دوجے نال ایویں رہن کھہندیاں

پپاں بھار بہن لئی زمین لسے واسطے،  
کرسیاں سدا بلوان دے لئی ڈہندیاں

مر جاوے اندروں تے باہروں ادوں آدمی،  
من والے قلعے دیاں کندھاں جدوں ڈھہندیاں

\*مصیبتاں جہیاں بلاواں



بن ملیاں توں میرے دل دی، بات کس طرحاں کہہ جاندا ایں؟  
روح دے دھر اندر بن پوڑی، دسین کسراں لہہ جاندا ایں؟  
سپنے اندر دستک دے کے، اوہنیں پیریں مڑ ہیں جاندا،  
اوسے نال گفتگو میری، جنا کچھ رہ جاندا ایں  
اپنے چہرے اندر مینوں، انج لگدا اے توں وی حاضر،  
شیشے اندر چپ چسپتے، کیہڑے ویلے بہہ جاندا ایں  
پیڑ پرچے شبداء دس، اگن کٹھالی پینا پیندے،  
دھن جگرا! توں ساڈی خاطر، کنے صدمے سہہ جاندا ایں  
ایہہ دستور پرانا اگ دا، نیڑے آیا بھسم کرے گی،  
بھمبٹ بن کیوں اڈیا آؤنیں، سدھ م سدھا کھہہ جاندا ایں؟  
پیڑ پہاڑوں بھاری کداں، چکن مگروں ترل کریں توں،  
پاکاں دے اوہلے نہ ٹکدا، اتھرو بن کے ویہہ جاندا ایں  
میرا اتر سمجھ لویں توں، شبد گواہی میں نہ پاواں،  
ہر ساہ سمجھ سمرپت اوہنوں، بن بولے جو کہہ جاندا ایں



ڈھیری ڈھاہ کے بہہ جاندا ایں، ایس طرحاں نہ کریا کرتوں  
مرن دھاڑا جیکر متھیا، جیندے جی نہ مریا کرتوں  
آپے کہندیں، چار دھاڑے، ایہہ زندگانی، بھرم بلبلا،  
کوڑ، کفر بے ملکہ جاگیراں، نہ جھولی وچ بھریا کرتوں  
جنگل دے وچ رات پوے جے، دن وی چڑھدے او سے تھاں تے  
برکھ بروٹے تیرے سنگ نے، ایویں ہی نہ ڈریا کرتوں  
ایہہ اپدیش بھلایا نہ کر، سبھ دی سینے، سبھ نوں کہیے،  
گنگیا توں تے چپ کر جادیں، شبد ہنگارا بھریا کرتوں  
جے دریا وچ پانی چڑھیا، بیٹھا وی تاں رڑھ جاویں گا،  
مٹی بن کے خر جاویں گا، پیر اگانہہ نوں دھریا کرتوں  
مرد کہاویں، مردا کیوں ایں، ہر مسئلے دا حل ہندا ہے  
تیرے سنگ اتھاس کھڑا ہے، جت کے نہ انج ہریا کرتوں  
توں دھرتی توں سبق لیا کر، ایہہ وی تاں ڈولے تے سنبھلے  
جے گھر جاویں کلا کدھرے، ایہہ صدمے وی جریا کرتوں



زندگی! تیرے ورگے سجن سارے نہیں ہوندے  
کردے جو اقرار، کدے اوہ لارے نہیں ہوندے  
سڑکاں کنڈھے پلدے بال جھلونگی اندر جو،  
کھڑا کہندی، ماں دی اکھ دے تارے نہیں ہوندے  
جھگیاں نال نبھاؤندے یاری ککھ تے کانے ہی،  
اتھے وسدے لوکیں کدے وچارے نہیں ہوندے  
من دے اتے بہہ جانڈے نے پریت پیڑاں دے،  
اکھیوں کردے اتھرو بہتے بھارے نہیں ہوندے  
اتھے تاں ہر پرکھ مولدا، کھڑنا چاہندا ہے  
من دے باغ بچے اندر آرے نہیں ہوندے  
سکھر پریتیں چڑھدے جیکر راہیں بیٹھ گئے،  
تھک سکدے نے، پر ایہہ لوکیں، ہارے نہیں ہوندے  
دل دریا، من ساگر، پانی سارا نزل ہے،  
دھرتی اتے سگل سمندر کھارے نہیں ہوندے





میں جو آکھیاے، اوہ میرا ہے، اس گل توں انکار نہیں  
توں جو سنئیں، میں تاں سچنا، اسدا ذمہ وار نہیں  
ہو سکدے توں پتھر ہوویں، خود نوں سمجھ لویں ہیرا،  
کوڈی مل نہ تیرا بندیا، جیکر روح تے بھار نہیں  
لنگھ جاویں کر پون سواری، ملیا کر خشبوئی وانگ،  
بہت مہین ہے پردہ بھاویں، وچ کوئی دیوار نہیں  
غرضان خاطر، منڈی اندر دکیا نہ کر سودے وانگ،  
رنگھن دی جو عادت پالئے، بند کدے اڈار نہیں  
بن ہڈیاں توں کاہدا بندہ، نرا گنڈوا آکھ لوہ،  
شد سرجنا بندے نہیوں، جیکر سوچ وچار نہیں  
جھورے جھردا گھر چلیا ہیں، کچے پر بت وانگ کیوں  
رڑھدا، رڑھدا، مک جاویں گا، اس توں وڈی بار نہیں  
کھلر پلر چلے پنچھی، کس منزل دے راہی ایہہ  
جین مرن جے اک نہ ہووے، کہندا کوئی ڈار نہیں



چل گھمیرا گنھ کے مٹی، دیوے گھڑ دے چان لئی  
توں دھرتی تے دوجا رب ہیں، عمراں لگیاں جان لئی  
چین دیاں لڑیاں دا بھوویں چان ملدا ستے بھاء،  
میں تاں دیوے بال ہنھیرا، میٹوں فرض پچھان لئی  
پون گورو نوں گندھلا نہ کر، شام ڈھلی تے رات پیاں،  
کل عالم وچ خوشیاں ونڈ تووں، ملیاں نے جو مان لئی  
دیوے نال محبت کرنی، چیتے رکھ کے، اس گل نوں،  
جو خرچاں گا وستر بننا، اک کرتی دی ہان لئی  
روشنیاں دا جال پساراں، نال ہنھیرے لڑن لئی،  
ایہہ زندگانی ملدی نہیوں، ایویں مٹی چھان لئی  
ہرے کپور چھتر دی چھوویں، جے بہنا تاں فکر کرو،  
سنگھنے ون ہریالے لاؤ، سر تے چھتری تان لئی  
ننھا دھاری دی جت ہووے، آدی کال توں اج دے تیک،  
ہور کوپلا کر ن بہنا، من وچ کچی ٹھان لئی



جبر ظلم دی پینگھ سکھر جد پہنچے اتیاچاراں تے  
قلمناں والیا! اس پل سوئی دھریا کر سرکاراں تے  
صبر صدق سنتو کھ سروور، جد کنڈھیاں توں بھر جاوے،  
تر پیندے نیں لوک ادوں ہی، ترلیاں توں ہتھیاراں تے  
کلی گلی جلی توں بن، گیان جوتن وی چاہیدی،  
ترس نہ ایداں کریا کرتوں، پنجرے پائے شکاراں تے  
نبض سمیں دی ٹوہنی بھل گئے، وید حکیم سیانے سبھ،  
بلدے اکھر تاہیوں ڈسکن، رت بھیاں اخباراں تے  
لاٹھی تے بندوق دی گولی، جد کدھرے وی فرق کرے،  
نکل پوے کرپان میانوں، رت چمکے پھر دھاراں تے  
مرضاں بن کے فرض کھڑے نے ہسپتال دے بوہے تے،  
رحم حکومت ایہہ کیہ کیتا کمزوراں لاچاراں تے  
وقت حساب برابر رکھدے، دیر سویر، ہنیر نہیں،  
پڑھیا کرتوں ایہہ وی سٹراں، وقت دیاں جو دیواراں تے



کس دروازے دیپ دھراں میں، من مستک وچ نہیر پیا ہے  
سمجھ پوے نہ کتھوں چھوہاں، کم تاں حالے ڈھیر پیا ہے  
من دا میلا شیشہ کیہ میں، صاف کر لیا، الجھ گیا ہاں  
کنا کجھ ہی بے ترمیبا، روح دے چار چنیر پیا ہے  
ہر واری دیوالی دیوے، منوں ہنھیر مٹاؤندے کیوں نہ  
کاواں رولی، جھر مٹ کیسا، میرے گل وچ پھیر پیا ہے  
سورج، چن، ستارے، دیوے، بجلی والے لاٹو، جگنو  
سہناں دے پکھے ہتھ دھو کے، کیوں کلمونہاں نہیر پیا ہے  
حالے تیک ایودھیا من دی، یدھ توں مکت کیوں نہ ہوئی  
اس دے اندر مسجد مندر، کیوں خطرے دا گھیر پیا ہے  
قدرت رحمت ونڈ دی، بھردی سکھنی جھول ازل توں بھادیں  
بہمتے نوں کیہڑا دے، تیری تھالی بیر پیا ہے  
اکو تھان تے اپنے دیوے، جگن نرنتر، دھرتی چہرہ  
روپ جویں پھلکاری سرتے، بحری سرخ سویر پیا ہے



تک لے لکھیا دھرم دا لے، کیسی امر ویل نے گھیرے  
دھرم سال وچ وجدے دھاڑے، بڈھے چور مسیتیں ڈیرے  
حکمران دی چھتری تھلے، سبز کبوتر کرن گٹرگوں  
ہریل جہڑی بولی بولن، بالکل سمجھ پوے نہ میرے  
اؤنسیاں پا کے کون اڈیکے، رشتے بنے مشینی وستو  
چوری کس نوں کٹ کے پائیے، ہن نہ بہندے کاگ بنیرے  
الھ گئی ہے تانی اپنی، لہدا ہی نہ تانا پیٹا  
کلیاں ایہہ سلجھاؤنی اوکھی، نہ وس تیرے نہ وس میرے  
دھرم اتے اخلاق دے راکھے، بن بیٹھے نے شستر دھاری  
دانشور دی دانش نوں ہن، پے گئے چار چنیر یوں گھیرے  
دھرتی دے سبھ مال خزانے، لٹن پٹن والا ٹولا  
دیش دی مندری حالت کر کے، من من موٹے اتھرو کیرے  
تن تاں اتھے، من پردیسی، سارا وطن پرایا جا پے  
جھوٹا جھوٹا سورج لگدے، لہندا چڑھدا شام سویرے





کیہ دساں نی خوشبو جیسے، میں تے ہر پل ایہو چاہواں  
کنڈے کنڈے آپ چگاں تے ہر پھل تیری جھولی پاواں  
زندگی دے اپرام پلاں نوں چوس لواں شو روپ دھار کے  
روح دے نغن وجود نوں جندے سکھر پہاڑیں ناچ نچاواں  
کئی جنماں دے ججراں مگروں، وصل دیاں دو گھڑیاں ملیاں  
میں جندڑی دا ماس کھوا کے، کیوں شکرے نوں یار بناواں  
چار چنیرے بھیڑ بڑی ہے، ون سونے شور دا جنگل  
من دا مور دھرت نوں سہکے، کیہڑی تھاں تے پیلاں پاواں  
پت جھڑ دے موسم وچ ملیوں، ہن کاہنوں مہکندڑے یارا  
ہن تاں میرے اپنے سرتے برکھ نپترے ورلیاں چھاواں  
میرے گھر وچ اک دریا ہے، شانت وگے بھرپور زرنتر  
تاں ہی تپش نہ آوے نیڑے، جد چاہواں میں تاری لاواں  
میرے اندر باہر نے بہندے، جو میرے وشواس دے پاتر  
رشتے ناطے ونج بازاری، سچ منیں میں مومنہ نہ لاواں



چھڈ دے آلس بھراوا، وقت نہیں کرنا خراب  
پرت جاوے نہ دوبارہ، بوہے آیا انقلاب  
شبد نوں کہہ دے کہ توں نرجند نہیں، ہتھیار ہیں  
سن لوں، اتر ملیگا، پھیر تینوں لاجواب  
لا لیا ڈیرہ کوں بربادیاں نے اس نگر  
رنگ کالا پے گیا ہے، سرخ سوہا سی گلاب!  
سچ کیہ بیلا سنا دے، سوچ تے نہیڑا لنگار  
گھنڈ دا کیہ کم اتھے، روح نوں کر لے بے نقاب!  
لوک شکتی نہ نگوئی، نہ وکاؤ، سمجھ لو  
راہ دسیرے غیر حاضر، بھٹکدے پھر دے جناب!  
کلیاں تے ڈھاریاں نوں، اج وی تیری اڈیک  
تانگھدے نیناں تے ویکھیں، جوت مکھدی بے حساب!  
ایں وچ شامل ہاں میں وی، تیرے وانگوں آلسی  
گندیاں مچھیاں جے بھریا، نرملے جل دا تلاب!



صبر صدق سنتو کھ سمرپن، سچ سلیقہ شامل کر دے  
مہنگے مل دے مانک موتی، بھر بھر مٹھیاں جھولی بھر دے  
بہت دناں توں گل نہیں ہوئی، نبض کھلوتی ہووے جیکن  
مٹی دا بت بولن لا دے، مار آواز جیوندا کر دے  
نا بھی وچ کستوری لے کے مرگنی کیہ لہدی پھردی  
جنگل وچ ہرنوٹے ویکھے، مر جانڈے انج چنگیاں بھردے  
پتن دی بیڑی نوں جنڈرے، مار ملالھ نے کدھر تر گئے  
دل دریا نوں پار کردیاں، ڈبڈے نہ، پھر دس کیہ کردے؟  
خوشبو تاں مہتاز نہیں ہے، عمر، جسم تے فاصلیاں دی  
روح توں روح وچکار بھلا دس، ہوندے نیں پھر کاہدے پردے  
پاک پوتر رشتیاں اندر، قسماں وعدے بے ارتھے نیں  
سرب سمیں دی کرن سواری، جیہڑے سیس تلی تے دھردے  
اس بکڑی وچ خبرے کیہ ہے، بند پڑی نوں کیہڑا کھولے  
کیہ کجھ وقت لکائی بیٹھا، رہیے اس دی چپ توں ڈردے



تیرا دتا زخم میں کیہڑا جریا نہیں  
گل دکھری ہے تیرا دل ہی بھریا نہیں  
ورقہ ورقہ پاڈن والے کدھر گئے  
ہر دشمن توں شبد کدے وی ہریا نہیں  
حملہ آور دے اپنے حملے جر بیٹھاں  
اج تک میں وی پیر پچھانہ نوں دھریا نہیں  
مارن تیر نشانے دی تھاں، نہیرے وچ  
ہن تک تاہیوں، اک وی راون مریا نہیں  
زندگی نالوں موت پیاری، سمجھن جو  
آزادی نوں اوہناں توں بن، وریا نہیں  
دعویدار ہتھیرے سکھ دے، ساتھ بڑے  
درد سمندر ساڈے توں بن، تریا نہیں  
دھرت پیاسی ترس گئی، گھٹ پانی نوں  
بھر کے اک وی وگدا ہن تے دریا نہیں



شبہ ہمیشہ چپ رہندے نیں، جس ویلے کردار بولدا  
وقت ہنگارا بھردا آپے، سن کے محرم یار بولدا  
دھرت، آکاش، پاتال تے چوتھا کل سرشتی رونق میلہ،  
سگل ہنسپت گاونڈی جاپے، جد توں اندروار بولدا  
مٹویں بات، بھلاویں اکھر، کھلے پلے من دے ورق  
اک سر ہو کے تر پیندے نے، جد وی سوتر دھار بولدا  
ہے من میرے، ویکھیں کدھرے، ڈولیں بھٹکیں بالکل نہ توں  
اس نوں بالکل کچ نہ منیں، جو بولی اخبار بولدا  
نہ لتاں نہ باباں ثابت، سیس و ہونا ایہہ بت جسدا  
کس مونہہ نال بھلا میں اس دی، دس توں جی جی کار بولدا  
لوک ہمیشہ اس چہرے نوں، اپنے وچوں خارج کردے  
کرسیدھاری انھا بولا، جیہڑا بن سرکار بولدا  
مٹھڑی مات زبان بھراوا، چھڈیں نہ گربھجن سیہاں توں  
ایہدے کر کے آپاں کہیے، اوہ ساڈا سردار بولدا





بنی زندگی نمائی لگی اوڑکاں دی پیاس  
تسیں لائی جاوے ساڈے مُونہ نوں زہر دا گلاس  
اوس پیڑ دی کہانی، نہیں سنائی میتھوں جانی  
جہڑی لئی بیٹھا دل وچ راوی تے بیاس  
ساڈے دھیاں پت ہندے جدوں گبھرو جوان  
کاہنوں ولیہ بناوے، ڈاڈھا سمیں دا خراس  
کداں چھڈ آئے کچھے پنڈ فصلاں تے کھیت  
جھونے سر سٹی بیٹھے، ہوئیاں منجراں اداس  
ساڈے واسطے ایہہ راوی بنی موت دی لکیر  
حالے کنی دیر رہنا اتھے ناگاں دا نواس  
راتیں بھونکدے سی عُتے، نچے سویاں سچ بھوت  
رہا خیر رکھیں ویڑھے، کریں بُریاں دا ناس  
جنگ بازو باز آؤ، ایویں اک نہ لگاؤ  
ساڈے خون نال بجھنی نہ توپاں دی پیاس



شام گھٹاں چڑھ آئیاں مڑ کے، سانول گھرنوں موڑ مہاراں  
پنوں پنوں کوک رہی جند، مارو تھل وچ وعظاں ماراں  
لگی پونی ہو چلی جند، کتی جاواں روز پونیاں  
ساؤن مہینے کن من کنیاں، ماردیاں بھہاں تے آراں  
کئی واری سمجھائی دل نوں، ایویں نہ توں ڈول جیہا کر  
جتاں دیکھ کے ہیا نہ پھر، ڈگیا نہ کر تک کے ہاراں  
وچ سنتالی قہر ورتیا، شرم دھرم سی دوویں لک گئے  
بندے بن گئے وشمیر کالے، اڈیاں سی کھنہاں دیاں تاراں  
دھرتی ماں ہٹکورے بھردی، پت سورے چیتے کر کے  
ویکھو گدڑ کرن کلولاں، کھان پے شیراں دیاں ماراں  
اکو رنگ دے چون منورتھ، اکو رنگ دے مونہہ تے متھ  
لیراں لتھیا بندہ پچھدے، مکتی لئی کس عرض گزاراں  
ہے انصاف دی دیوی دس توں، انھی ہیں جاں گوگی بولی  
تیری کھڑی کانی اندر، موئے ساڈے سپن ہزاراں



امبراں ج اڈدے غبارے بئی کمال ہے  
بھارے گورے بندیاں دا ہویا برا حال ہے  
کامیاں نوں کمی کہو، ویلھیاں نوں بادشاہ  
صدیاں توں اج تیک ایہو ہی سوال ہے  
حق دے لئیرے بنے بیٹھے مائی باپ نہیں  
غافل دا کڈا وڈا ویکھ لو کمال ہے  
دھرم دا تاپ چاڑھ دین تے اتار لین  
غرضان بنائی سانوں، دودھ دا اہال ہے  
بلھیا! قصور والے رہندے جے قصور وچ  
ساڈا بے کسوریاں دا کائنات مندا حال ہے  
عیناں سارنگیاں، وجاواں کوں خالمہ وے  
اکھرے نے سرتاں ہی تال توں بے تال ہے  
اگت دے اندر ایہدے جتھ نہ پھڑا دیو  
دل ایہہ معصوم حالے، نکا جیہا بال ہے



رنگے چوڑے والی دھی نوں سپنیاں خاطر امبر دیویں  
دھرتی دی مریدا بخشیں، ترن لئی وی ساگر دیویں  
دھرت دھریک تے دھیاں تے، پالنهاریاں کل سرشٹی  
نہ کملاون پانی باجھوں، مان محبت وافر دیویں  
لاواں چار جاں ست کو پھیرے، بھاویں رسم نکاح دی ہووے  
رشتے والی لاج پڑھاویں، دل دے ویڑھے آدر دیویں  
دکھ تے سکھ دے رشتے ناطے، ون سونا بھائی چارا  
دھرتی جڈی سدکن کھڑی، امبر جڈی چادر دیویں  
سر تے رہے سلامت رحمت، چوگر دے دی بخش زرنتر  
چار دیواری اندر قیدی، رب نہ قادر دیویں  
مائی نی سن میریئے مائی، بابل توں کجھ ہور نہ منگاں  
اڈن خاطر چیتن بدھی، گیان دی بھر کے گاگر دیویں  
ساہاں دا سرمایہ ہووے، دم دم روح دی طرب ہلاوے  
سر دا سائیں بن نہ بیٹھے، بس وشواس دا پاتر دیویں



چھانگیا برکھ اُداس کھڑا ہے، لہدا ٹکیاں ٹاہنیاں نُوں  
اکھیاں بھر کے رو پیندا ہے، کر کر چیتے ہانیاں نُوں  
شملے والی پگ دے ڈھلے پیچ جدوں وی چندا ہاں  
قابل تیک پنجاب سی میرا، کرداں یاد کہانیاں نُوں  
ہن نشیاں دا چھیواں دریا کیوں کہندے ہو کم کلو  
گندہ نالا کیوں نہیں کہندے، ایہناں زہری پانیاں نُوں  
میرے گل وچ گنڈھ پیپویں، کھولن والے کدھر گئے  
آپ جلاہے گڑبڑ کیتی، کنج سلجھاواں تانیاں نُوں  
مجھ وچ کے گھوڑی لے لئی، گڑوی لے کے پھر دے ہاں  
روندے ہاں ہن چیتے کر کر، چاٹیاں اتے مدھانیاں نُوں  
دلی دے لال قلعے دے اتے، پنج دریائی کلنی سی  
ہسدے نے جد دسدا ہاں میں، گدی بیٹھے ہانیاں نُوں  
پنج دریا پنجاب سی میں تاں، سانجھی طاقت کدھر گئی  
ستلج، بیاس، جھناں تے راوی، پچھدے جہلم پانیاں نُوں





راتیں تینوں یاد کردیاں، واہوا لڑیاں تیرے نال  
اس توں مگروں، کیہ دساں میں، کیہ کچھ ہو یا میرے نال  
سر سوہی پھلکاری لے کے، لگیا توں ہیں کول کھڑی  
بھرم چھلاوا کیوں انج کیتا، بھولے من توں میرے نال  
جی کردا اے، کول بہا کے، اپنے مونہوں آکھ دیاں  
شبہ ہاردے جتھے جا کے، اوہ رشتہ ہے تیرے نال  
جی کردے میں کہاں چاندنی، پھر سوچاں پر بھات کہاں  
تیرا چہرہ کنا ملدا سجرے سون سویرے نال  
اوہ کہندے نے تن دی بھٹکن، میں کہنداں ہاں مہک پھرے  
کئی واری بحث پیاں میں، اپنے چار چنیرے نال  
میں تیری لشکور سہارے، سورج بن کے بھڑدا ہاں  
اٹ کھڑکا چلدا رہندے، میرا گوڑھ ہنھیرے نال  
اصلی گل ہے روح ترہائی، رحمت وانگوں برس کدے  
بھرن کیارے دس توں کسراں خالی ٹنڈاں پھیرے نال



صدیاں توں ہی لوک وچارے، مگتیاں خاطر سوچ رہے نیں  
چتر شکاری رتجھاں سنے، نالو نال دبوچ رہے نیں  
ساڈے پچیاں دے مٹھیاں تے، خرچنگے ہن اے بی سی ڈی  
اوڑے ایڑے والی تختی گوڑھ گیانی پوچ رہے نیں  
ہے گردیو سمتیا بخشیں، لاڈلیاں نوں راہ پاویں، جو،  
بازاں دی دھر پال رہے نے، چڑیاں دے کھنھ نوچ رہے نیں  
ہر یگ وچ، ونجاریاں ہتھوں، سسی نے تاں مرنا ہی سی،  
کداں توڑ محبت چڑھدی، جس دے یار بلوچ رہے نیں  
پھیر چوراسی چیتے کرکے، چون بخار دے موسم اندر،  
کرسی خاطر نارد ٹولے، مڑ کے زخم کھروچ رہے نیں  
بے اخلاقے ناچ نچاؤندے، مان مرتبے کلغی خاطر  
کیہڑے لوکیں، آپ سمجھ لو، میوے میوے بوچ رہے نیں  
رات ہینری اندر جگنو، جگدے نیں، پر دسدے کیوں نہ  
بند کمرے دے قیدی ہوئے، اڈنے پڈنے سوچ رہے نیں



سُکدے سُکدے سُک چلے نیں، یار میرے دریاواں ورگے  
دھرتی ماں دے صدقی بوٹے، امبر تیک سداواں ورگے  
شبِد پوتر واک جہے تے، روح دے اندروں باہروں بھیتی،  
بن بولن توں جانن والے، بہت مقدس تھاواں ورگے  
مدھے مارگ دے نہ پاندھی، نو مارگ، نو کرن جہے نیں  
سجرے، نزچھل، نزکپٹے تے پگڈنڈیاں جہے راہواں ورگے  
زندگی دے اپرام پلاں وچ، سرتے چھتری بندے تندے  
برکھ بروٹے ورگی خصلت، سکھر دُپہرے چھاواں ورگے  
دور دیس پردیس بچ بھاویں، تن پردیسی پر من دیسی  
ڈولے گھنیاں رتجھاں ورگے، گٹ تے اُکرے ناواں ورگے  
سونے دے دند وانگوں لشکن، من دے محرم سورج رانے  
پھل خشبوی تے رنگ جتھے، سجری روح دے چاواں ورگے  
اوکھ گھڑی وچ سبھ توں پہلاں، آ کے درد ونڈاون ہارے  
کدھر تر گئے، ہم راہ تردے، بانہہ وچ پیاں باہواں ورگے



اس طرحاں کیوں جاپدا، نیاواں ہے امبر ہو گیا  
ملن آیا دھرت ٹوں، مل کے برابر ہو گیا  
مار کے آواز مگروں، توں سی مینوں کیہ کیہا  
یاد نہیں، پر ویکھ لے، ایہہ دل تاں کافر ہو گیا  
جھڑ گئے پتے پرانے، پھر پنکارا پنکریا  
کونپلاں دا بدل ہی، رب دا پیغمبر ہو گیا  
اتھرو جد اکھ اندر سی تاں تپکے وانگ سی  
وہ گیا تاں ویکھ لے، پل وچ سمندر ہو گیا  
پھیر دھوکھا کھان مگروں، کیوں بھلا کھاندا وساہ،  
ہن تاں ایہہ دل جاپدے، میرے توں نابر ہو گیا  
جاپدے بازار دی لگی ہے اس نوں بد دعا  
رشتیاں دا چہن چکر، وی آڈمبر ہو گیا  
کڈھ کے شیشہ دکھایا، میں کیہا کہ ویکھ لہو  
بدگماناں سمجھیا، ساڈا نرا در ہو گیا



شہر خاموش دے بوہے بند نے، مُونہہ وچ جویں زبان نہیں ہے  
انج کیوں لگدے، ایس نگر دے برکھاں وچ وی جان نہیں ہے  
پیر پیر تے بہت خدا نے، پتھراں والی جون پئے جو  
بڑیاں بھیڑاں چار چھیرے، اک وی تاں انسان نہیں ہے  
بنیا پھر دے سرجنہارا، میں ہی اس دے بت نوں گھڑیا  
جہڑے بت نوں پوجے دنیاں، سچ مچ ایہہ بھگوان نہیں ہے  
ہندو مسلم سکھ عیسائی، سبھ نوں کیسی شامت آئی  
منڈی مال وکاؤ ورگے، تھلے دین ایمان نہیں ہے  
من دے جنگل رات پئی ہے، کلیاں بات سناواں کس نوں  
خود نوں آپ ہنگارا بھر داں، پیڑاں سہن آسان نہیں ہے  
لنگھ آ، لنگھ آ من دے مندر، روح دا ناد وجائیے رل کے  
جے توں وکھرا راگ الاؤنا، مینوں ایہہ پروان نہیں ہے  
میں تاں جسم وہونی خوشبو، پھلاں اندر حاضر ناظر  
مل جا توں کر پون سواری، اتھے کوئی دربان نہیں ہے





توں پچھیا ہے، غزل لکھاں میں، بہتا کیہڑی بحر دے اندر  
تکڑی وٹے یاد نہ رہندے، مینوں من دی لہر دے اندر  
پنڈ اچے وی پچھا کردا، دن تے رات پہر تے گھڑیاں  
ادھی صدی گزاری بھاویں، میں لدھیانے شہر دے اندر  
بہتا مٹھا بولن والیاں کولوں، پیا بچ کے رہنا  
موت یقینی ہو سکدی ہے، اپنے مٹھے زہر دے اندر  
نیتاں چوں بدینتاں پرکھن، تیجے متھے والے نیر  
نگی اکھ نوں دسدی نہ جو، کھوٹی روح دی گہر دے اندر  
چار چفیرے وی ہاں تکداں، ٹانگے والا گھوڑا نہیں میں  
شام سویرے تریا رہنداں، من دی سکھر دُپہر دے اندر  
پانی منگن جوگا وی نہ، ڈنگیا پھر داں، حالے تک وی  
خورے کنا قہر پیا سی، نیم نظر دے زہر دے اندر  
شام ڈھلی ہے، ہن نہ آویں، تڑکسار پر بھاتی سن لئیں  
لبھ لویں درویش دی روح چوں مینوں اتم پہر دے اندر



سوچ دے ڈونگھے سمندر تَر دیاں وی  
صدق نہ چھڈاں تسیہ جردیاں وی  
بہت واری توں میری ہم سفر ہوویں  
تاریاں دے نال گلاں کردیاں وی  
اگن دی گاتھا سناؤنی پے گئی سی  
زندگی تینوں محبت کردیاں وی  
بہت واری جھوٹھ شیشہ بولدا ہے  
مندا نہ من کدے ایہہ ڈردیاں وی  
من میرا تندور وانگوں بھج رہیا ہے  
نال تیرے شانت گلاں کردیاں وی  
توں رلیں مرگاوی وچ پھیر سمجھیں  
زندگی کنی پیاری مردیاں وی  
شبہ نہ گلنار بندے ویدنا جے  
بیت جاندی عمر ہاؤکے بھردیاں وی

وہ رہی راوی بنا پانی توں اتھے  
سمجھ کیوں آوے نہ تینوں تردیاں وی  
توں میرے سُر تال وچ کیوں خلل پاویں  
زندگی وچ رنگ سوہے بھر دیاں وی

00



کئی جنماں توں وچھڑے آپاں، آ جا دوویں اک ساہ ہوئے  
کوشش کریئے، گھل مل جاییئے، دھڑکن اندر نبض پروئے  
روز اڈیکن مکھڑے پینڈے، گھسن گھیر ہنھیریاں گلیاں  
ڈردیاں نوں ایہہ ہور ڈراون، آ جا چان چان ہوئے  
من دی کھوٹ نہارن خاطر، انگ سنگ رکھیئے نزل شیشہ  
روز رات نوں اس وچ تکیئے، روح دے میلے وستر دھویئے  
دو عملی وچ گھر گئے آپاں، پت نوں کہیئے جین جوگیا  
گھر وچ جی جائی دھی نوں، خود کھندے ہاں آپاں موئے  
جاسمین مہکدیاں پوناں، ساہاں وچ رما لے توں وی  
سچے سرخ گلاب دی جاییئے، سرتوں پیراں تک خوشبوئے  
جس رشتے دا نام نہ کوئی، پر ایوں لگدے ازلاں توں ہے  
آ جا دوویں شگناں والا، رل کے تیل بروہیں چویئے  
دھرتی جڈی بکڑی اندر، انبروں اچا خواب بچئے  
کل عالم دی شکتی پیئے، نی سوچے نی نوں نزویئے



میری روح دے اندر وار کتے، ایہہ جگدا مگھدا نُور جیہا  
راوی دے نزل پتتاں تے، جیویں سورج سرخ سُرور جیہا  
دل والی کول تختی تے، آہ لکھی عبارت کون پڑھے  
جس محرم نے ایہہ لکھ بھیجے، پنچما ہے کافور جیہا  
توں سچ دسیں بئی ایس طرحاں، کیوں سچیں میں محسوس کراں  
توں میرا بالکل میرا ہیں، کرناں دا پہلا پور جیہا  
اس پل دا لکھ شکرانہ ہے، جد پہلا بول سنایا توں  
نہ مگروں مینوں ہوش رہی، اج تیکر ہاں مخمور جیہا  
دن چڑھیا تے میں پڑھیا ہے، شیشے چوں اپنے چہرے نوں  
توں حاضر ناظر نیناں وچ، من تاں ہی تاں پر نور جیہا  
امبر تے دھرتی جیہڑی تھاں، گلوکڑی پا کے ملدے نیں  
میں تڑف گیاں اوہ ویکھن نوں، انمنواں پنڈا دور جیہا  
مسکان بھیج دے سجری جہی، چبے دی خوشبو نال بھری  
اس من دے سکھنے بھانڈے نوں، توں کردے پھر بھر پور جیہا





سنگڑے نیں لوک جسڑے رلے دھنوناں وچ  
رونقاں کمال، میلہ لگیا دوکاناں وچ  
زندگی ٹیوب ریل وانگراں لنگھائی ساری  
نظراں نکاواں کوں اچے اسماناں وچ  
سڑکاں چومارگی، چھیمارگی توں ودھ بھاویں  
زندگی دی گڈ ساڈی حالے وی ختناں وچ  
کالی کرتوت دا کمال چٹے دن ویکھو  
سنیاں نے سٹھاں، بھیڑ دے شمشاناں وچ  
عقلاں دی گھاٹ پے گیان والے مندریں وچ  
ہے نہیں سرپان تکیھی، گتے دے میناں وچ  
ویچدے نیں زہر تے سیاستاں سیر شام  
ماکیوں مخیر کوں رکھدے زباناں وچ  
لایا کتھے ڈیرہ، پنڈ بڑا پچھے رہ گیا اے  
نیدراں گواچ گمیاں، کچ دے مکاناں وچ



بڑا سوچیا کہ تینوں ہور کجھ وی نہیں کہنا  
پر کراں کیہ میں سوکھا نہیوں، چپ تیری سہنا  
میرے ویڑھے دی گچڑی ج کھڑے کنے پھل  
کر ایہناں نوں پیار، نالے کہہ دے جو وی کہنا  
لاہ دے متھے توں تیڑی، سوہنے چن اتوں داغ  
تند میل وانگوں پھیر اوہنے مگروں نہیں لہنا  
چل سیک توں بجائیے سوہے سپنے سندھوری  
بہتا چنگا نہیوں ہندا ایویں آگ نال کھہنا  
تیری مٹھی مسکان ویکھ ڈولدے ایمان  
کہہڑے جندرے دے کچھے توں سنہال مٹھی گہنا  
کالے لیکھاں وچ ریکھ میرے مار کے تاں ویکھ  
واپے چاننی لکیر، جویں رات نوں ٹہلنا  
میری اک گل من، بن پنا دا چن  
نالے کر اقرار سدا انگ سنگ رہنا



دیکھن والی اکھ نہیں لہدی، قدم قدم تے رلدے ہیرے  
ساڈے متھے ایہہ کیہ واہے گھچ مچولے توں تکریرے  
چٹے دن تے سکھر دُپہرے، اس دھرتی دی عظمت رولی  
باہوبلی سیاسیاں مل کے، لٹیاں ڈولیاں لاہے کلیرے  
جس دے ہتھ وچ جو وی آیا، اس نے پایا اپنے اندر  
چورتے چوکیدار بنے نے، گھئی کھچڑی نے ویرے ویرے  
دیکھ لوو کیہ کلجگ آیا، سچ سنایاں سندے نہیوں  
راجے شینہ تے نال مقدم، جھاکن سانوں ٹیرے ٹیرے  
ہر چاچا ہی قیدو بنیا، پھوکی شان سکھر تے پہنچی  
کٹی جاویں رانجھن خاطر، پھر وی چوری توں کیوں ہیرے  
جاگ جاگ دھرتی دے پترا، بھیناں نوں وی نال رلا لے  
شرم دھرم نہ چھپ کھلوئی، دین سنٹھیا نہ بے پیرے  
زندگی تیری مانگ سندھوری، ستونتی رہے سدا سہاگن  
دھیاں سر پھلکاری سوہے، پتراں دے سر سوہے چیرے



من دی بستی ویکھن نوں تاں، اسری ہے، آباد نہیں  
ایسے کر کے انقلاب وی، اونا زندہ باد نہیں  
باغاں والے باغبان سبھ، ٹھیکے دار بنا سٹے  
برکھ بروٹے اجر چلے، مالی نوں کجھ یاد نہیں  
وطن میرے وچ دھیاں پتر، اک وی رہنا چاہندا نہیں  
سون چڑی نوں کیہڑا کہندی، ہوئی ایہہ برباد نہیں  
ساڈے پنڈ دا گڑ تے شکر جد توں منڈی آ بیٹھے  
اپنا من کے کھا لینداں، پر پہلاں وانگ سواد نہیں  
تن تے من نوں کنی واری ڈھال کھالی پایا ہے  
میرا نشپا ایویں کدھرے، بنیا تاں فولاد نہیں  
سورمیاں دے وارث لکھاں، ٹوڈی لکدے پھر دے نیں  
کنج کہندے ہو بھگت سراجھے اودھم گھر اولاد نہیں  
ہے گر میرے، راگ رتن دی سوچھی ساتھوں گم چلی  
رسنا گاوے، رس نہ آوے، من مندر وساد نہیں



کن کر کول میرے، سوہنے چن کھنا  
دل دا ابال کاہنوں، ایویں سانجھ رکھنا  
زندگی چ آس تے امید ہی چراغ نیں  
چاننی بغیر تاں ہمیش بندہ سکھنا  
دھرتی وی جاندی ہے سورج دے تان نوں  
ایویں تاں نہیں کردی دوآلے پردکھنا  
موت ہے اٹل، پر جیندے جی کیوں مریئے  
شوق سانوں زندگی دا مٹھا موہرا چکھنا  
پچھدے شہید تے مرید حق سچ دے  
مار کے زمیراں پٹی خواب دی کیوں جکھنا  
وڈی مچھی نکي نوں ہے سدا کھاندی ویکھ  
منڈی سنسار نے بازار ساڈا بھکھنا  
ہمتے نی، بوہے کھلھے، رکھداں سویر شام  
ساڈے گھر پیر کدوں پائیں گی سلکھنا





میرے ساہاں چ جے کجھ تازگی ہے  
ایہہ تیرے عشق دی دریادلی ہے  
ندوشا تیغ توں ڈریا نہیں جے  
بھراؤ! ایہی تاں مرداگی ہے  
مصیبت آؤن تے وی مسکراؤنا  
ملی ورثے چ ایہی سادگی ہے  
ملو تاں مہک وانگوں فیل جاؤ  
اصل وچ ایس دا ناں بندگی ہے  
میں بازی جان دی لائی ہے پھر وی  
توں حالے سمجھدیں ایہہ دل لگی ہے  
میں ہوندا ظلم ویکھاں، چپ بیٹھاں  
تے اس توں ودھ کھیڑی بزدلی ہے  
چلو! اوتھے وی قلمیں بیچ آئے  
جیہڑے کھیتیں اجے ویراگی ہے



کالھی کالھی ہر پل کالھی، کچھ پل میرے کول تاں بہہ جا  
چُپ دا پر بت روح توں لاہ دے، میری سن لے، اپنی کہہ جا

سپنا ڈھال حقیقت دے وچ، عمل کرن گے انت نیڑا  
نچا دھار، یقینی منزل، دوپٹیے توں مگروں لہہ جا

ایس طرحاں کیوں کردیں یارا، روح دی پیاس بجھی نہ حالے  
حالے تاں میں رنج نہیں تکیا، جے آئیں تاں کچھ پل رہ جا

اک پل ملیوں، بجلی کڑکی، پھیر پتہ نہیں کیہ کچھ ہویا  
دنداں تھلے چبھ دبا لے، اوس درد نوں ایداں سہ جا

پیڑ پراہنی بن کے بہہ گئی، دل دے پلنگھ نواری اتے  
نیناں وچ پتھرایا نہ رہ، اتھروآ توں ہن تاں وہ جا

کندھ اوہلے پردیس بنا کے، دلیوں دور کریں ننکانہ  
دل وچکار نہ نگی بیٹھیں، سرحد اگن لکیرے ڈھیہہ جا

روپ تیرے وچ میں وی حاضر، جیکن دھپ وچ نور سورجی  
مہکاں نوں رنگ لا دے آکے، پھل پیتاں دے اندر شہ ☆ جا

\* لک چھپ کے بہنا



دل تے بھار بڑا ہے بھاویں، اتھرو بن کے ویہہ نہیں سکدا  
وگدی پون میرا سرناواں، اکو تھاں تے بہہ نہیں سکدا  
نیا توں دھن وان بڑا ہیں، بلونتا سلطان وی سنیاں  
اگن کٹھالی میں وی ڈھلیاں، اپنا سوکھا ڈھیہہ نہیں سکدا  
گلے لگاؤنا، نہ ٹکراؤنا، میرے اشٹ سکھایا مینوں  
تیرے توں کیہ پردہ جندے، کسے نال وی کھہ نہیں سکدا  
سہاں دی گلوکڑی کس کے، میری سن تے اپنی دس لے  
وچ وچالے ہور دا چہرہ، سچ جانیں میں سہ نہیں سکدا  
بن ملیاں توں ہوون میلے، جیکر تیری رحمت ہووے  
بولن دی پھر لوڑ رہے نہ، اگے کجھ میں کہہ نہیں سکدا  
سکھر ہمالہ پربت چوٹی، اس توں اگے جانا چاہاں  
تیرے قدماں وچ مڑ آواں، اک دم تھلے لہہ نہیں سکدا  
سیرت، صورت سوہنی اگے، شبد ہار گئے ویکھ ذرا توں  
اکو ٹاہنی پھل خوشبوئی، مانن توں میں رہ نہیں سکدا



میری روح دے اندر وار کتے اک جوت الہی جگدی ہے  
جدوں ٹکلی لا کے ویکھاں، صورت تیری لگدی ہے  
روپ دی سکھر دوپہر دے اندر، درس پیاسے نیناں نوں  
اک دوگھٹ پیا دے ندیوں، جو تده اندر وگدی ہے  
ایہہ کیہ کرم کمایا ہیرے، رانجھن یار نمانے تے  
سپنے وچ وی بہتی واری صورت تیری ٹھگدی ہے  
عشق سمندر دے وچ ڈبے، میں تاں تردے ویکھے نہیں  
ایس دوکان ادھار نہ ملدا، سودا نقد م نقدی ہے  
مہکاں دے لٹ بھوریاں نوں، دن تے رات آرام نہیں  
ہرن جیہی کستوری تیری روح دے اندر لگدی ہے  
سرد سمندر اکو چھال چ پراں جے چاہیں تے  
اگن اگیٹھی ہر پل اندر، تیرے کارن مگھدی ہے  
ایہہ تیرا دھنوا، تپایا، ترل بنایا لوہے نوں  
اگن کٹھالی دے وچ میری کندن ہستی دگدی ہے



بھل کے وی ورلاپ نہ کریئے مر مگیاں دریاواں دا  
فکر جدوں وی کریئے، کریئے سجرے پنگرے چاواں دا  
بہت پچھانہ جو چھڈ آئے ہاں ٹوئے بے بکھرے تھیں  
کریئے تاں شکرانہ کریئے . کریئے اوہناں راہواں دا  
دھرتی پیٹھاں بلد کھلوتا، سنگیں چک جو دھرتی نوں  
صدقی پتر دھرم نبھاوے، جو سمجھایا ماواں دا  
اصلی پونجی سگل سمرپن، دھرتی دھرمی نبھاؤنا ہے  
مل دوانی نہیوں نخر، چنچل شوخ اداواں دا  
اک عمر توں مگروں جا کے جین جگت دی سمجھ پوے  
ایویں لیکھا رکھدے رہیئے، کجھ تھواں کجھ ناواں دا  
ایک جوت دی مورت سننیں، دھن پر دوویں ہوندے نیں  
کیوں نہ چیتا رکھدے لوکیں لہیاں ہونیاں لاواں دا  
کچی کندھ، آلے وچ دیوا، جد وی جگیا ویکھ لواں  
پر نہیں لہدا نظر پوے جد، چہرہ مینوں ماواں دا





کیوں مردے ہو مارن لگیاں، مینوں مارو پیار دے نال  
میں نہیں مرنا، جیکر مینوں، مارو گے ہتھیار دے نال  
پڑھ ویکھو اتھاس دے ورقے، شبد بان ہی جتدا ہے،  
قبریں کیڑے کھاندے سبھ نوں، جو جتدے تلوار دے نال  
توں دو قدم اگانھ جے آویں، چار قدم میں آوانگا،  
جا تریا پھر، جے توں مینوں، جتنا ہے ہنکار دے نال  
کچھ رشتے بے نام جے، پر ترکھار نہیں ہندے،  
گنتی منتی کریا نہ کر، میرے جے دلدار دے نال  
بے مطلب جے من دے مندر، کوڑ کباڑا سانجھ رہیں،  
اوڑک اک دن ڈگ پوینگا، اس بے لوڑے بھار دے نال  
بن ملیاں توں، میری روح وچ، تیرا روپ چراں توں ہے،  
ہویا کیہ ایہہ گنڈھ چتراوا، اندس دی جہی تار دے نال  
کڑیاں، چڑیاں، دھری بابل، امبڑی وہڑھا، نکا ویر،  
کنا کچھ ہے، جڑیا ہويا، آہ کونجاں دی ڈار دے نال



دیکھیں اک دن کھل جاؤں گے، صدیاں توں بند تالے  
طوطے وانگ پٹاکن گے پھر، ٹکیاں جیہاں والے  
لوک کچھری اندر آؤنے بن فریادی دیکھیں  
کھسکی خان کہاؤندے نے جو، رانی کھانی دے سالے  
جبر ظلم دی اس توں ودھ کیہ ہور ہنھیری وگنی  
دھرم سیاست جتھے رل کے کردے گھالے مالے  
پھانسی چڑھیاں دے وارث تال، چیتے کس نوں رہندے  
تختے چاڑھن والیاں مڑ کے آ پھر تخت سنبھالے  
بند بوہیاں نوں کھولن مگروں پھیر بہاری شیرا  
چنگے نہیوں ہوندے لگنے، سوچاں اندر جالے  
ہن بابر کیوں لشکر لے کے چڑھ قابل توں دھاوے  
روح تے قبضے والے تنز، جد اس آپ سنبھالے  
چوراں دے گل پھاہیاں دیکھن والے کالھے پے گئے  
پر چاہندے نیں، ایہہ کم کوئی دوجا آن سنبھالے



تتلی دے کھنہاں تے لکھ کے، ایہہ جو توں پیغام بھیجیا  
کنا سوہنا ربا خود توں، سرناواں لکھ نام بھیجیا  
سرخ سویر، دُپہرا کھڑیا، صندلی پون رکدی بھیجی،  
سورج دتا رنگ بھرن لئی، کنا کجھ بے دام بھیجیا  
پہلاں لوری، شبد زنتر، کنی پونجی سوہنی مینوں،  
کنج کراں شکرانہ تیرا، جو جو توں انعام بھیجیا  
درد سمندر رڑکن مگروں، گیت، غزل کویتاواں میں تاں،  
کجھ نہیں رکھیا اپنے پلے، تیری طرف تمام بھیجیا  
ماں تپ تیز تپیشتر ورگی، قدم قدم تے سچ زنتر،  
واہ او داتا، میری خاطر بابل وی ہرنام بھیجیا  
گر دا شبد سواس پرچا، دم دم وچ محسوس کراں میں،  
روح دا اتھرا گھوڑا وی توں دے کے نال لگام بھیجیا  
دور درشتی والے نیر، متھے اندر دھریا سورج،  
دل دریا نوں کھیڑے بخشے، کیسا نوری جام بھیجیا

کیوبا دے اُنکھیلے صدر فیڈل کاسٹرو دے مرن تے

توں ترنیں تاں ایداں لگے، موت جھکانی دے گئی یارا  
اک دوجے نوں ملے کدے نہ، کیوں لگدا سی بھائی چارا

نگی ہو گئی کنڈ جاپدی، ڈھیہہ گیا کوس مینار اُنکھ دا  
سوہنا بھڑیوں نال دشمنان، توں امنان دے پہریدارا

تیرا وطن کیوبا، سوہے سورج دا ہم نام بن گیا  
پکھل گیا توں لوکاں خاطر، سر پیروں سارے دا سارا

جبر ظلم دے دہسر سارے، تیرے تے حملہ آور بن کے  
چڑھے انیکاں وار سی بھاویں، توں نہ جھکیوں، واہ سردارا

انقلاب دا سوہا پرچم، ڈگیا، چکیا پھر لہرایا  
رہا چمکدا نور زرنتر، تیری ٹوپی اتلا تارہ

تیری فوجیاں والی وردی، جسم تیرے دا حصہ بن گئی  
توں اک داری وی نہ کمبیا، دشمن دا تک لشکر بھارا

مار پھوک توں اٹھ کے شیر، ستے لوک جگا دے پھرتوں  
زسنگھے دا ناد سنا دے، کھڑک پوے رنجیت نگارا



آ لکھوندر☆ چل تڑ چلیے، وقت دیاں دیواراں اولھے  
کھوں تر کے کتھے آئے، قدم قدم تے کھا ہچکولے  
من مستک وچ سپنے تاں سی، پورن دے لئی کاہل نہیں سی  
ثابت قدمی نے خود تاہیوں، بند بڑے دروازے کھولے  
کتھے پنڈ جنڈیالا تیرا، ہورس تھاں میں اگیا پگیا،  
وقت دی تکڑی تول تول کے، کنے سچے سودے تولے  
ناکرن تے بن سرناویں، انلکھیاں اقراراں ورگا،  
لم سلما سفر تردیاں، سمجھ لیا کنا بن بولے  
کنے یار جھکانی دے کے، پوڑی پوڑی سر سر کردے  
کرسی جون ہنڈھاؤندے مر گئے، تلخ سمیں پیراں وچ رولے  
کرناں آئیاں بنھ قطاراں، من دا وہڑھا روشن ہويا،  
ایوں لگیا میں تریا پھرداں چندرما تے پولے پولے

\*میراہیلی ڈاکٹر۔ لکھوندر سنگھ جوبل





کنے سورج چڑھ کے لہہ گئے، وقت لحاظ کدے نہیں کردا  
سکھر پہاڑ دی ٹیسی اتوں، اترے باجھوں کسدا سردا  
گیس غبارے چڑھدے امبریں، کتھے ڈگدے ویکھ لیا کر،  
توں اس جونی کیوں پیندا ایں، جے من رہندے اندروں ڈردا  
چغلی دی کھٹی دا کھٹیا، کھانا سوکھا، ہضم نہ ہووے،  
بن آئی توں تیرے ورگا، موتوں پہلاں تاہیوں مردا  
چم دی جیہہ گھما کے سچ تھاں، کوڑ کماویں، دویں دلیلاں،  
من دی عدل کچھری اندر، کیوں رہندیں ہرجانے بھردا  
نیت دی بوری تھلیوں سی لے، اپروں پاویں پیٹھاں سرکے،  
بدنیتی چوں بدنوں لاہ دے، کاہدے پچھے رہندیں مردا  
جے انصاف دی تکرڑی تیری، دئے نیاں نہ کرے فیصلے،  
پاڑ وکالت نامہ سجناء، میرا دل ہامی نہیں بھردا  
اینا تاں اتھاس نوں پچھ لے، جنگ باردا بندہ کیہڑی،  
جیتو عالم گیر سکندر، جد وی مردا خود توں مردا



نہ سی کالی عینک اکھیں، ہتھیاں وچ دستانے  
کھڑا موڑ لیاوے اوہ دن، مستی دے مستانے  
پورا میلہ ویکھ کے مڑنا، رج مروٹا کھانا،  
سارے دن دی لاگت سی بس ایویں اک دو آنے  
مار دڑنگے جانا آپاں پڑھن سکولے چائیں،  
قلمناں خاطر راہ چوں لہنے، کلک، نڑے تے کانے  
ہن تاں جیباں بھریاں بھاویں اندروں من ہے خالی،  
اکو جنم بچ ویکھے آسوں الٹ ہووے زمانے  
شمع دان استاد گواچے، جاں مینوں نہ دسدے،  
گھور غبار ہنھیرا گوڑھا، لاٹاں نہ پروانے  
راجگرو، سکھدیو، بھگت سنگھ، بال سبھا وچ ویکھے،  
لاڑی موت ویاہن چلے، بنھ شگناں دے گانے  
ہن جسمناں دی منڈی لگی، تار دیو مل لے لو،  
شبد محبت وادھو ہويا، کون پڑھے افسانے



گولی مار، بندوق چلاؤ، شبد کدے دی مردے نہیں  
پوناں اندر گھل جاندے نے، وقت دے ہتھوں ہردے نہیں  
راجے نوں شینہ آکھن والی، پرت میرے گورو نانک دی،  
حالے تیک مقدم زہری، شیشے نوں وی جردے نہیں  
امبر دے وچ کئے تارے، جاگ رہے نے صدیاں توں،  
اک ادھ نقر بھر جاوے تاں، ٹھنڈے ہاؤ کے بھر دے نہیں  
دھرتی دی مریدا ایہی، چوراں نوں بس چور کہو،  
حق سچ تے انصاف دے پہرو، انج آکھن توں ڈردے نہیں  
انھے کتے، 'وا نوں بھونکن، دشمن دی پہچان بناں،  
اپنی نسل بناں بینسلے، ہور کسے نوں جردے نہیں  
قلہکار جو لکھے، مٹاویں، تیرے وس دی بات نہیں،  
شاستراں نوں شستر مارے، سورے ایداں کردے نہیں  
اک دیوے دی لاٹ بجھا کے، تیز ہنھیری سمجھے نہ،  
ہنھ قطاراں، جگدے جگنوں، پیر پچھانہ نوں دھردے نہیں



سال مگروں پھیر مڑ کے آ گئی شور اتری  
زہر دا بھریا پیالہ، پی رہیا اے یاتری  
بیج توں ہی برکھ بنیا، ظالمانہ ایہہ نظام،  
پیتاں جیوں چھانگدی پھردی ہے سانوں داتری  
جی کرے بچہ بناں تے پانیاں تے پھیر میں،  
ٹھیکری پھڑ کے گھماواں، مڑ چلاواں کاتری  
بیج پانڈو وچ جوئے، نت دروپد ہار دے،  
چنید دی خلق پھردی، بہت اوکھی آتری  
چن کجے وچ پاؤنا، بالکے دا شغل ہے،  
لوک سمجھن لگ پئے نے، جادوگر دی چاتری  
نغریاں تے لاریاں دا کیوں کریں مڑ کے وساہ،  
چھاننی دے وانگ ہن وشواس والی پاتری  
ویکھ لو انگریز تر گئے، پھیر دی آپاں غلام،  
دھیاں پتر جھجکدے بولن توں بولی ماتری



دلی وچ درباری دیکھو، دودھ وچ کانچی گھول رہے نیں  
ہوش حواس گوا بیٹھے نے، جو آیا اوہ بول رہے نیں  
کرسی عجب خماری دے وچ، نال حقیقت پائے وچھوڑا،  
دھرم دھراتل والے پاوے، تاہیوں پیروں ڈول رہے نیں  
لکھی جنگل بنے لوک تاں، نادھریاں دی دھر بن جاوے،  
لوک بٹھاؤندے سر دے اپر، جیہڑے درد فرول رہے نیں  
دیش بھگتیاں دی پرہیہاشا، نویں عبارت سمجھ پوے نہ،  
اپنی تیز ہنھیری تاہیوں، ڈر کے دیوے ڈول رہے نیں  
نہ ترشول کٹاراں کولوں، ڈردے نہ تلوار دے کولوں،  
جہڑے سیس تلی تے دھر کے، سچ دی تکرڑی تول رہے نیں  
گیرو نہیں، ایہہ ساڈی رت ہے، لال قلعے دیاں کندھاں اپر،  
مغلاں ویلے توں اج تیکر، ساڈے قدم اڈول رہے نیں  
گملے اندر اگے پودے، پرکھاں نوں ہن کرن ٹچکراں،  
دیکھو کلجگ، تیز کدالے، ساڈی جڑھ نوں فول رہے نیں





شہنشاہی کفر جد وی بولدا ہے  
تخت دا پاوا ادوں ہی ڈولدا ہے  
بھرم ہے تینوں کہ پیسہ پیر سبھ دا،  
کوڑ ویکھو، کفر کداں تولدا ہے  
میل دیوے دھرت نوں آکاش تیکر،  
جل بنا گڑوی ج مشری گھولدا ہے  
جھڑیاں پیراں دے پیٹھاں دھرت ہی نہ،  
ایہہ باشندا اوس بستی کول دا ہے  
جال اتے چوگ چگدا ویکھیا میں،  
پر پرندہ اڑن خاطر تولدا ہے  
اک دن سنیا میں جھگی والیاں توں  
کون سانوں تھاں کو تھاں تے رولدا ہے؟  
رہن دے توں پھوکیاں ہمدردیاں نوں  
پھر کہیں گا میرے پردے پھولدا ہے



اج کاہنوں ہوئیاں تینوں نیندراں پیاریاں  
کون تیری تھاں تے ایہہ نبھاؤ ذمہ واریاں  
کھنھ تیرے کول، نیلے امبراں توں پار جاہ،  
بھل بیٹھا بھیڑیا، توں امبریں اڈاریاں  
شہر ول جان دے لئی، اڈیاں تے بھیڑ ہے،  
اک دوجے نالوں ودھ، کاہلیاں سواریاں  
پنڈ ول مڑنا وی خواب وچ بھلیا،  
کھتوں کتھے سٹیا، لیا کے دشواریاں  
شہر وچ جین دا سلیقہ وی کمال ہے،  
ہوا تائیں سہکنا تے بند بوہے باریاں  
کئی واری مینوں تاں بنی آپ ایداں جاپدے،  
پرزے مشین والے، بنے ہاں گراںریاں  
پلنگھ، پنکھوڑا، منجا، پیڑھا تیرے واسطے،  
برکھاں دے مڈھ کاہنوں پھیری جاویں عاریاں



سُتیاں اندر سُپن جگاؤندے رہندے ہاں  
ماچس اتے تیلی وانگوں کھہندے ہاں  
اُڈیاں دے کچھے پھرنا، شوق نہیں،  
کپکے پیریں دھرتی اتے رہندے ہاں  
مان نہیں، ابھیمان نہیں، وشواسی ہاں،  
بات ہمیشہ دل والی ہی کہندے ہاں  
نکے نکے حاکم ساڈے اندر نے،  
ایسے ہی کمزوری ہتھوں ڈھہندے ہاں  
خشبوئی تے چانن پسرے چار چنیر،  
جہڑی تھیں تے رل کے آپاں بہندے ہاں  
دل دی حالت چچھدا ہیں تاں سنیں، اسیں،  
سورج وانگوں ہر دن چڑھدے لیہندے ہاں  
کرسی سانوں کنا وادھو کر دتا،  
منجیاں وانگوں کدے کدائیں ڈہندے ہاں



کون کہندا ہے محبت منگدی پروانگی  
ایہہ تاں دل دریا دی یارو، بے پناہ دیوانگی  
توں سارنگی کہہ لیا کر، جو کتاباں دسیا،  
میں سدھارن آدمی، آکھاں گا اس نوں ساگی  
کہن توں توں جھجکيا کر نہ، دے دی وارتا،  
اکھیاں چوں بول پیندی آپ ہی ویرانگی  
لوک من تے راج کر لے، پاتشاہیاں مان لے،  
چار دن دی کھیڈ ساری کلغیاں ایہہ خانگی  
ویکھ بابا کھنھ لا کے، دھرم ایتھوں اڈ گیا،  
تیرے گھر وچ پھیر ہو گئی، کوڑ دی پردھانگی  
تن وچارا کمبدا ہے، ڈولدا پتے دے وانگ،  
کیہ تماشہ کر رہی ہے، روح دی بے گانگی  
دھرم، دھرتی، مات بولی، جنن ہاری سہکدی،  
بھرم بھانڈے وانگ ہو گئی، کھوکھلی مردانگی



توں تے مینوں آپ کیہا سی، دھرتی دھرم نبھائیں رل کے  
اج ہی تریئے، بہہ نہ جھریئے، پکھتائیئے کیوں یارو بھلکے  
من مستک دے مانک موتی، پوٹلیاں وچ قید کریں نہ،  
ایہہ پودے ہی برکھ بننگے، محنت دی مٹی وچ پلکے  
آ وشواس دی انگلی پھڑیئے، قدم کدے گمراہ نہ ہوں،  
دھرم تھڑکیا اپنے پیروں، نفرت دی اگنی وچ جلکے  
کرسی ناچ نچائے کیسا، آدم نک نکلیاں پائیاں،  
بندے دا پت کیہ کردا ہے، سرمائے دی جون وچ ڈھلکے  
پیڑ پریتوں بھاری ہو گئی، پگھلن دا کیوں ناں نہیں لیدی،  
ناگ ولیواں پا بیٹھی ہے، ساہ گھٹدی ہے شاہرگ ول کے  
زہر پرچی پون دا پہرہ، رشتے ناطے جیوں ادھموائے،  
نسل کشی ول تردے جائیئے، عقل، ناگنی لے گئی چھل کے  
چل شیشے دے سمنکھ ہوئیئے، پر کجھ ہٹواں دور کھلویئے،  
بہت نیڑیوں سچ نہیں دسدا، وقت گواہیئے نہ ہن ٹل کے





نِکلیا رہ ہمدردا وڈیا، مریاں نوں نہیں ماریدا  
ایہہ انداز توں کتھوں سکھیا، ارتھ بدلنا یاری دا  
بدنیتاں دی نیت وی تاں گل وچ پھایاں بندی ہے،  
ظالم کاریگر نے گھڑیا، ایہہ جو دستا آری دا  
سارے راہ بند ہوں تے بندہ، موت گلے نوں لاؤندا ہے،  
روح تے بھار پیاں دم گھٹدے، جد نہیں ہوو سہاریدا  
کتھے بنے منارے ویکھے، لسڑے تھوڑ زمینیاں دے،  
خرچ فضول دا مہنا دے کے کر نہ وار کٹاری دا  
آڑھتیاں توں پھڑ کے قرضہ، ویلاں کون کرا لئے گا،  
جس کولوں اج تیک نہ سریا، بوہا اک الماری دا  
توں گیتاں وچ جو کجھ ویکھیں، اس وچ ساڈا کجھ وی نہ،  
اوہ تاں سارے کجھ پوردے، منڈی اتیاچاری دا  
دھی دا ڈولا تورن جوگا، جیکر ہندا دھرمی باپ،  
اکو تھاں کنج اڑدا دندا، اسدی موت گراری دا



کیہڑے کم آئیاں ساڈے دوستو فقیریاں  
پہلی ہی قطار مل بہندیاں وزیریاں  
دیکھ لو گھمائی جاوے، عقلاں دے گیڑ نوں،  
کئی واری جاپدا ہے، بن گئے بھمیریاں  
دھرماں دی منڈی وی نیلام گھر بن گئی،  
وسپدا بازار ہن گدھیاں نوں پیریاں  
جتھے کتے باغ وچ لال سوہے پھل نے،  
آ گیا آدیش بیجو کیسری پنیریاں  
ساڈیاں وی رتجھاں نوں ہے جنہاں نے مدھولیا،  
اوہی ہن کہن چھڈو دل دگیریاں  
امبراں تے گڈیاں چڑھاؤن والی رتجھ نے،  
سوتی ہوئی ڈور نال، انگلاں نے چیریاں  
رکھ نہ امید ایویں، بھولے دلا پاتشاہ،  
نیت بدکار تیری، نیتیاں وی ٹیریاں



کنڈے جنڈرے کیوں لاؤندے ہو، پچھدے نیں بند بوہے  
اس گھر اندر کوئی نہ رہندا، نہ بلی نہ چوہے  
نہ کوئی بندنار سجاوے، چوہے تیل شگن دا،  
مدت ہوئی نظر پئے نہ، سرتے سالو سوہے  
نہ دستک نہ بڑک سنے تے نہ ہی چاپ قدم دی،  
سہکدیاں نے کندھاں، سانوں، کوئی تاں آ کے چھوہے  
گوڈے گوڈے گھاہ چڑھیا تے سپ سلوٹی پھر دے،  
سن سراں نہ پیڑ کسے دی، میرے من دی جوہے  
ایوں پتھرائے نینیں جمیا، سرد جیہا اک ہوکا،  
جیوں کوئی درد پوٹلی بنھ کے، دھر گیا میری روح  
اینا سیک ہجر دا توبہ! سہن سخالا نہہیئوں،  
تن من تپے تندور تے جیہا ہو گئی لال پھلوہے  
بھر بھر ٹنڈاں جتھوں مالھ لیاؤندی سی بنی پانی،  
ویکھو ساڈے ویکھدیاں ہن، خالی ہو گئے کھوہے



مہک رہی مسکان پیاری، ہائے توبہ،  
دے دے اک ادھ چنگ ادھاری، ہائے توبہ  
شام ڈھلی تے خر جانے پرچھاویں نہیں،  
پھر نہیں لبھنی صورت پیاری، ہائے توبہ  
تارے بڑے پیارے، پر ایہہ امبریں نہیں  
نھیر دی بکل دھرتی ماری، ہائے توبہ  
ارتھ وچارے پچھے رہ گئے شہداں توں،  
دل تیتھوں جاوے بلہاری، ہائے توبہ  
سپنے وچ توں آئیں جاں نہ آئیں پر،  
بند کریں نہ دل دی باری، ہائے توبہ  
نمین کٹورے، ہرنوٹے دی رلیں کرن،  
ڈنگدی پئی سرے دی دھاری، ہائے توبہ  
جس وچ تیری میری روح دا ریشم سی،  
کدھر گئی ہن اوہ پھلکاری، ہائے توبہ



گرد غبار ہنیر چھیرا ہمت کر کے ہونچھو یارا!  
من مستک نوں روشن کر کے، کالا ٹکا پونچھو یارا!  
راجے تے مہاراجے جیہڑے بالکل سننا چاہندے نہ،  
انقلاب دا نعرہ لا کے کوڑ کباڑا پونچھو یارا!  
اس دھرتی نے بندھن توڑے، موڑے نے مومنہ جابر دے،  
جبر ظلم دے کالے اکھر، جو لکھدے نے پونچھو یارا!  
ظالم پنچہ ہر واری ہی، ساڈے مومنہ نوں جھپٹ رہا،  
دھرم ترازو کہہ جو ٹھگدے، سبھ ونجارے ہونچھو یارا!  
ہنجیں سائیں کرن نیلامی، لوک راج دے ناں تھلے،  
وکن والیو! وک نہ جانیو، ایہہ گل من چوں پونچھو یارا!  
آدی جگادوں پالنہاری، ساڈی سبھ دی ماں دھرتی،  
اس دی عظمت نال کھید دے، دانو پنٹھتی ہونچھو یارا!  
مال خزانے اس دھرتی دے، دوہیں ہتھیں لہدے نیں،  
مڑکاں والیو! بڑھک مار کے، دیر نہ لاؤ پونچھو یارا!





تیرا دتا زخم میں کیہڑا جریا نہیں  
گل دکھری ہے، تیرا ہی دل بھریا نہیں  
ورقہ ورقہ پاڑن والے کدھر گئے،  
ہر دشمن توں شبد کدے وی ہریا نہیں  
حملہ آور دے اپنے حملے، کیہ دساں،  
اج تک میں وی پیر پچھانہ نوں دھریا نہیں  
مارن تیر نشانے دی تھاں نیرھے وچ،  
ہن تک تاہیوں، اک وی راون مریا نہیں  
زندگی نالوں موت پیاری سمجھن جو،  
آزادی نوں اہنھاں توں بن وریا نہیں  
دعویدار بختیرے سکھ دے ساتھ بڑے،  
درد سمندر ساڈے توں بن تریا نہیں  
دھرت پیاسی ترس گئی گھٹ پانی نوں،  
بھر کے وگدا ہن تے اک وی دریا نہیں



دل دا کمال ویکھ، پہلاں تاں نہیں بولدا  
جدوں مسکاویں، اگوں پارے وانگوں ڈولدا  
سورج دی جايے، لشکور تیرے نور دی،  
رات دے ہنھیریاں چوں رہاں تینوں ٹولدا  
تیرے اگے ٹٹ گیا، چپ والا جندرا،  
جنے کھنے اگے میں وی چت نہیں فرولدا  
تیرے بنا کسے دا مرید نہ میں اج تیک،  
موتیاں دے تھال ایویں مٹی چ نہیں رولدا  
توں تے میتھوں دور کنی دیر ہوئی تر گئی،  
یاداں والی گٹھڑی میں کیہدے اگے فولدا  
سمیاں دے ناگ شیشے اتے ڈنگ ماریا،  
اپنا وجود ویکھ، وس بڑی گھولدا  
تیری ہی سنائی گل حالے کنیں گونجری،  
سماں کدے تکڑی چ وستاں نہیں تولدا



راجیاں نُوں یاد نہ جے قول اقرار ہے  
ساڈی الغرضی وی، ایہدی ذمہ وار ہے  
انبیاں نوں ٹک، ٹک، باغاں نوں اجاڑدے،  
اک نہ اکلا، ایہہ تاں طوطیاں دی ڈار ہے  
کاواں نے سی کھوہے ساتھوں، زور نال آلھنے،  
گھگیاں وچاریاں نوں، اپنی کتھے سار ہے  
جال وچ اڈنے پرندے پھسے ویکھ لو،  
چوگ والے لوبھ پچھے ہو گیا شکار ہے  
تلیاں تے سیس والی فیس اوکھی تارنی،  
ماریاں دوچتی، سر گڈے جنا بھار ہے  
وکھ وکھ آلھنے تے اڈ نے اڈاریاں،  
قافلہ وی اندروں تے فٹ دا شکار ہے  
خورے کیہڑا دے گیا، کھڈونا ایہہ معصوم نوں،  
بچیا نہ کھیڈیں، ایہہ تاں اک دا انار ہے



عمر گزاری جیہناں ساری، وطن میرا برباد کردیاں  
شرم کیوں نہیں مندے نیتا، بھگت سراہے یاد کردیاں  
حق سچ تے انصاف دا نقشہ، واہیا جیہڑا سورمیاں سی،  
ٹھیکیداراں بدل لیا ہے، بیگم پورہ آباد کردیاں  
آپے ہی بن بیٹھے باپو، آپے چاچے، ہور بڑا کچھ،  
کڑم قبیلہ جان ودھائی، خود نوں زندہ باد کردیاں  
چٹا بھاویں نیلا پیلا، زہریلہ ہے وشیر لانا،  
سوہے خون چ رلی سفیدی، جھجکاں، مرداباد کردیاں  
پتھر چت بھگوان، حکومت، نہیں گولڈے عرضی پتر،  
عمر گوائی پھر وی آپاں، ہن تیکر دھنواد کردیاں  
کچے کوٹھیں سکھنے پیپے، بنا علاجوں خالی کھیسے،  
مک چلے نے اتھرو، اکھیوں، رو رو کے فریاد کردیاں  
کوتا، غزلاں، گیت، رباعیاں، لکھدا ہاں میں لوکاں بھانے،  
میں تاں قلم گھسائی ساری پیڑاں دا انوواد کردیاں



ساڈے من دی گلی چوں، اج کون لنگھیا  
وے میں جیہدے کولوں، بنا بولے دل منگیا  
مینوں سدھ بدھ بھلی، ہوئی جند اڈھموئی،  
جدوں والاں وچ اوس نے گلاب ٹنگیا  
جہڑے جاندے نے سچیاں محبتاں دی سار،  
کہندے رب اوہناں روحاں نوں ہے آپ رنگیا  
میں وی کھوھی نہ زبان، لاجوتی دے وانگ،  
اوہ وی چھوئی موئی، چھوئی موئی بڑا سنگیا  
شاید اوس دا ہی نما نما نیناں چج سرور،  
پہلی مکنی چج مینوں جیہدے پیار ڈنگیا  
ایہہ تاں روحاں دا سمیل، جیکوں دیوا، بتی، تیل،  
کالے جگ دا ہنھیر ویکھ بڑا کھنگھیا  
ہن مٹ گئے زمانے دیاں تیراں دے نشان،  
اساں درد محیٹھڑی چج من رنگیا





بڑا ہی ورجیا خود نوں، ایہہ کہنوں رہ نہیں سکدا  
میں تیرے واسطے تاں ہو رہیٹھاں لہہ نہیں سکدا

ادھوری گفتگو چھڈ کے توں مڑ کے بات نہ چھوہی،  
میں تیری بے رخی اپنی وی جندے سہ نہیں سکدا

توں میری اکھ وچ اتھرو دی جوئے کیوں پئی پیڑے،  
جو پتھر ہو گئے، ہن نیر بن کے وہ نہیں سکدا

اکلا آدمی، ادھا ادھورا، کیہ کہے کس نوں،  
میں دل دی وارتا، تیرے بنا تاں کہہ نہیں سکدا

میں اڈنے باز دے کھنہاں تے امبر بہت گاہیا ہے،  
تیری دہلیز تے میں چوگ دے لئی بہہ نہیں سکدا

صرف کمزوریاں بندے دیاں مومنہ بھار کر دیون،  
ثبوتا آدمی اوداں کسے توں ڈھیہہ نہیں سکدا

کدے دیکھیں، گنیں، بکل میری وچ چن سورج نے،  
میں تارہ نگر سارا لے کلاوے چھہ ☆ نہیں سکدا

\* لک چھپ کے بہنا



ماں دھرتی، جہنی، ماں بولی، جسراں آپاں بھل چلے آں  
کل دی چھڈو، اج ہی آپاں لکھاں وانگر رل چلے آں  
سر سی بھاری ذمیواری، کھسکدیاں گنڈھ کھسکی ایسی،  
ونج دریا دے، توڑی دی پنڈ وانگ بھراؤ کھلھ چلے آں  
اٹھ صدیاں توں پہلاں بابے کالے لیکھ نہ لکھ سمجھایا،  
نیند پیاری، ارتھ گواچے، اصل سنیہا بھل چلے آں  
ساڈے نالوں شاہی مورخ، دھرتی تے نہیں لبھیاں، ملنا،  
مہنگے مل دی سکھیا بدلے، اتھرو بن کے ڈلھ چلے آں  
پہلاں کنیاں، پھیر ہنھیری، جڑھاں پولیاں ہل گئیاں نیں،  
جھاڑ بھلا کیہ ملنا سانوں، کنک دے وانگوں ہل چلے آں  
ساتھوں پہلیاں سانوں دسیا سچ دا مارگ دھرم دی پوڑی،  
کوڑ کفر دا ونج کردیاں، دیوے کر کے گل چلے آں  
سرمائے دیاں چڑھیاں کانگاں، شرم دھرم سبھ بنے وکاؤ،  
مٹی دے بک کچھے آپاں، کس تکرڑی ونج تل چلے آں



چن دا ٹکڑا پہن دودھیا، جد سنے وچ آ جاندا ہے  
سچ منی توں مہک ورگیئے، عجب چھنچھنی لا جاندا ہے  
چندن دی گیلی دیاں مہکاں، لوں لوں دے وچ رچ رچ جاون  
جھتے جا کے شبد ہاردے، اوہ پل تاں تڑفا جاندا ہے  
رسونتا جیوں امب سندھوری، دھر اندر تک گھلدا جاوے  
چتودیاں خشبویئے تینوں، پل وسادی آ جاندا ہے  
گیت، غزل، کویتاواں مینوں، رات دنے انواد کردیاں  
کھورے کپھڑا شبد کسے نوں کپھڑے ویلے بھا جاندا ہے  
کولتا، احساس، مسکنی بند الماری وچ نہ رکھنا  
ریشم نوں وی ایس طرحاں ہی کیڑا لگ کے کھا جاندا ہے  
تریل چ بھجیاں لگراں تے ہی کھڑدے پھل بسنتی رتے  
پت جھڑ سخت پرکھیا مگروں اوہ موسم وی آ جاندا ہے  
سرخ گلاب دیاں دو پتیاں، چمبا لڑیاں کلیاں جڑیاں  
اکو تھاں تے قادر کداں، رحمت دا مینہ پا جاندا ہے



اے ولا! جد تک تریں گا، روشنی دے نال نال  
نہ کدے گمراہ کریگا، قسمتیں دا بھرم جال  
زندگی! تیرا وی قرضہ سر کھڑھا چر کال توں  
اس جنم کداں اتاراں، ایہہ بڑا اوکھا سوال  
دوستی دی مہک سچی، ویکھ نہ محسوس کر  
گھر دے اندر لا لیا کر، نرگسی پھلاں دی ڈال  
توں میرے ساہاں بچ کھڑ جا، چاندنی دی ویل وانگ  
پون گاؤندی ویکھ لئیں پھر، نچدی پاؤندی دھمال  
ایہہ کدے اپرام نہ ہویا، کدے نہ ڈولیا  
ساتھ میرا دل نبھایا، کیہ کہاں، بس، بے مثال  
میں ٹراں گا روز اگے، ہور اگے سیدھ نال  
میں کدے کیتا نہیں جی، اک تھاں تے قدم تال  
ایں دھرتی دی لیاقت تے نزاکت سانجھ لے،  
پوربی نقر بچ چڑھیا، ویکھ سورج دا جلال



کدے وی آس دے دیوے، ہوا توں ڈرن نہ دینا  
 امیدیاں وقت جو کردے، کدے وی مرن نہ دینا  
 ہنیری رات ہے، طوفان، جھکھڑ، ڈولدے سائے،  
 کدے وی لاش وانگوں دوستی نوں ترن نہ دینا  
 سراں تے شام ہے، سورج سمندر ملن لگے نے،  
 دلاں نوں سانجھنا تے سرد ہوکا بھرن نہ دینا  
 کدے وی رات دے سائے توں ڈر کے سہم نہ جانا،  
 جوئدے خواب نوں اگنی حوالے کرن نہ دینا  
 بڑے طوفان آئے، آؤن گے وی ہور چڑھ چڑھ کے،  
 دلا توں حوصلہ رکھیں، امیدیاں ٹھرن نہ دینا  
 نخسمی جوہ دے اندر پھرن ٹولے بے لگامے جو،  
 توں اپنی فصل اندر ورج، اتھے چرن نہ دینا  
 کدے جے اون اوہ پل، کہن جو دڑ وکے بہہ جا،  
 بروئیں چڑھن نہ دینا کدے وی شرن نہ دینا





سورج جان توں مگروں تاں بس کجھ پل لگدے رات بنن لئی  
چیر ہنیرا چانن آوے، ساڈی شبھ پربھات بنن لئی  
وقت دیاں اکھاں وچ تلنا، سچ تے پہرہ دینا پیندا  
زہر پیالہ شرط ضروری بندے توں سقراط بنن لئی  
دھرتی دھرم اضل توں ایہی، نرہوؤ تے نرویر سلیقہ  
سیس تلی تے دھرنا لازم، سورمیاں دی ذات بنن لئی  
زندگی تیرے تیک رسائی، سچ میں توں سہل نہیں سی  
ونگ تڑنگے موڑ بڑے سی، ایہہ میری اوقات بنن لئی  
قلمماں نوں وی سرکٹوا کے شبد سواری دا حق ملدے  
تیز دھار تے ترنا پیندا، لوک مناں دی بات بنن لئی  
سارا کجھ ہی ویریاں نے تاں ساڈے متھے تے نہیں لکھیا  
ساڈی غفلت وی کجھ شامل، ایداں دے حالات بنن لئی  
پتھر من جذبات وھونا کنج کچھلے گا خود سمجھاؤ  
درد سمندر جل کن دیوے، ہنڈھوآں نوں برسات بنن لئی



مر چلے ہاں آپاں یارو، چپ رہ کے نہ بولن کر کے  
کندھاں وی تاں پاڈیاں نیں دل بوبا نہ کھولن کر کے  
شکی ہو گئے دوویں پلڑے، در در پیندی ہر دو لعنت  
تکڑی بے وشواسی ہو گئی اچا نیواں تولن کر کے  
کوڑا ہونجھن خاطر بنہی، تیلھا تیلھا کھلری بوکر  
کوڈی مل رہیا نہ تاہیوں، اک دوجے نوں رولن کر کے  
پنچے دی عظمت سی کنی، جد تک سی شبھ کرمن کردا  
ہن تاں وانگ چپڑ دے لگے، نیت مرادوں ڈولن کر کے  
سنے داتری سٹے والے، پتہ نہیں جی کتھے تر گئے  
وانگ ہتھوڑے وجن والے، حق سچ لئی نہ بولن کر کے  
لہجہ نہیں سپیلے گھوڑے، نسل ختم ہی ہو گئی جاپے  
چٹے ہاتھی، ہوڑ، ہنٹر چار چفیر مدھولن کر کے  
توں وی اوہناں چوں نہیں لگدا، جو کردے سی پہریداری  
کویا! توں بدنام ہو گیا، کھدو لیراں فولن کر کے



درد سیاہی نال توں لیکاں واہیاں نیں  
دل تے اکھیاں دوویں ہی بھر آئیاں نیں  
متھا ٹس ٹس کردے کہہ کجھ سکدا نہ  
روح دے باغیں کونلاں وی کرلائیاں نیں  
بن بوہے تے دستک، پو لے پیریں ایہہ  
رتجھاں من وچ کدوں پراہنیاں آئیاں نیں  
میں ایہناں نوں کوں کہہ دیاں تر جاو  
پیڑاں میری ماں جائیاں ہمسائیاں نیں  
سجری پون دا بلا تیری ہستی ہے  
سرخ گلاباں ایہہ باتاں سمجھائیاں نیں  
تیرے ہاؤکے اندر میں ہی حاضر سی  
ایہہ رمزاں سبھ اکھیاں نے اتھائیاں نیں  
دل دروازے کھلھے نے توں لنگھ وی آ  
تیری خاطر نظراں پھیر وچھائیاں نیں



اس دھرتی تے ورلے ورلے سنکٹ سمیں سہارے بندے  
اوہی سنئیں، امبریں جا کے سورج، چن جاں تارے بندے  
اپنی اگ وچ آپے سڑ کے، وقت گاچا، ہتھ نہ آئے  
اوہی پل تاں ویر میریا، ہڈیاں دے وچ پارے بندے  
چیری جاوے تن دی گیلی، دو بے کن آواز نہ پہنچے  
باغ بےغی ڈھیر کرن لئی، شکوے روسے آرے بندے  
نکیاں نکیاں گنڈھاں بنھ کے، من مندر وچ رکھیا نہ کر  
سفر سمیں ایہہ بہتے نگ وی بندے خاطر بھارے بندے  
تیری چھتری سبز کبوتر، چوگ چکن لئی بیٹھے جیہڑے  
اڈ جانے نیں، دانے چگ کے جیہڑے بہت دلارے بندے  
دھونتے پتونے جتھے، کلاونت گنونتے رُلدے  
گھرتے وطن اجاڑن خاطر، ایہی پل انگیارے بندے  
کوڑ کفر دے نہیرے اندر، توں جو کردیں تخت نشینا  
وقت کچھری دے وچ پیہا، اصل گواہ تاں کارے بندے



ملدیاں تینوں میرا کیسا مقدر ہو گیا  
پیار قطرہ مل گیا، میں وی سمندر ہو گیا  
میریاں خواباں بچ توں جاں رات رانی مہکدی،  
میرے چاء دا قد وی تیرے برابر ہو گیا  
میری روح دا صدق وی اج مولیا بن کے بہار،  
سونے رنگی دھرت دا، جیکوں سونبر ہو گیا  
مل گئی پرواز مینوں، کھنہ لاؤندے تاریاں،  
مل گیا اے ساتھ تیرا، میں وی امبر ہو گیا  
میریاں نیناں چوں ہنجھو، خشک ہونوں بچ گئے،  
ملن دا اقرار ہی اصلی پیغمبر ہو گیا  
توں کھلوتے پانیاں تے نظر کیتی، با کمال،  
بہت گندھلی جھیل دا پانی وی سرور ہو گیا  
سرمرے شہداں نوں سنگی، تال وی نے آ جڑے،  
کھولدا من بھٹکدا سی، شانت ساگر ہو گیا





اک ادھ بول سنا دے مینوں حالے دل نہیں بھریا یار  
اکلاپے دا بوجھ میرے توں، ہور نہ جاوے جریا یار  
جویں شرینہ دیاں فلیاں چھنکن پون وگے گھنگرالاں وانگ  
ہاسے دی چھنکار چ کیه توں، دس دے، جادو بھریا یار  
چوس لواں سبھ تلخیاں تیرے متھے اندروں دل کردے  
ایں جگہ نہ شکوہ میتھوں، ہن نہ جاوے جریا یار  
ہر واری، ہر تھاں نہ درد سنایا جاوے سبھناں نوں  
اج اچانک اچھلیا ہے، جو من رہندا بھریا یار  
اپر تھلے میرے کیوں نیں، سہمے ہوئے دھرت آکاش  
ہر چہرہ ہی زرد بھوک ہے، ہووے جیکوں ڈریا یار  
توں ہوویں تاں اگنی وی ہم راز وانگراں لگدی ہے،  
'کلیاں بہت محال اگن دا میں دریا ہے تریا یار  
گلوکڑی وچ اوہ پل سارے، کسنے چاہاں مڑ کے پھیر  
عطر سروور نوں جد آپاں، رل کے سی جد تریا یار



ٹاہلی توت پھٹارا پھٹیا ویکھ مہینہ چیترا چڑھیا  
پت جھڑگروں روح دے سائیناں توں وی تاں مل جاوے اڑیا  
چپ دے جنگل دن تے راتاں شام سویراں، کیہ توں کردیں،  
روح تے دستک دے دے پرتیں ایہہ توں ورقہ کتھوں پڑھیا  
لسی نوں وی ماریں پھوکاں اینا وی دس ڈر کیہ ہويا،  
ہوٹھ چھہا کے روح نوں سنج لے، جھجک رہیں کیوں، دودھ دا سڑیا  
کنکاں ہوئیاں سون سنہری سٹیاں دے مُونہہ دانے موتی،  
بلیاں دے وچ جڑ کے مانک، اس نوں کنج سنیا رے گھڑیا  
اکھلی دے وچ سرسی میرا سخت میری ہستی دے کرکے،  
وقت لحاظ نہ کیتا میرا موہلے مار مار کے چھڑیا  
توڑ رہے نے پھل تے کلیاں وںجاں خاطر چست پھلیرے،  
ٹاہنی ٹاہنی خوشبو پچھدی، کرن م کرنی کپھڑا جھڑیا  
میں اوہ یدھ لڑن دی خاطر، رن بھومی وچ پہنچ گیا ہاں،  
اپنے الٹ لڑائی ہے ایہہ، جو سی میں اج تیک نہ لڑیا

موہ تیرے دی سرم سلائی پا نیناں وچ ہويا چانن،  
دل دروازے اندر تک توں، مندري سرخ نگینہ جڑیا  
دیکھیں راہ وچکار نہ چھڈیں کھیاں میں راہ بھل جاواں گا،  
رب توں ودھ وشواس پاترا، یاد تیری دا پلو پھڑیا

00



اگ نال کھیڈیئے انگاراں نال کھیڈیئے  
آ جا کدے سوہنیا، وچاراں نال کھیڈیئے  
تینوں مینوں روکدیاں، نظراں ملاؤن توں،  
کاہنوں سڑ جاناں دیواراں نال کھیڈیئے  
شکرے تے باز دوویں محلاں پلے رہن دے،  
آ جا دوویں گھگیاں، گٹاراں نال کھیڈیئے  
جوڑ دے نہ، توڑ دے نہ، قہروان باغبان،  
کھڑے ہوئے پھلاں گلزاراں نال کھیڈیئے  
اتھری بندوق دیاں گھوڑیاں نوں چھڈ دے،  
پوٹیاں نوں آکھ دے، ستاراں نال کھیڈیئے  
حیلے تے وسیلے جدوں مر مک جان سارے،  
گورو فرمان ہے کٹاراں نال کھیڈیئے  
جت ہار کاہدی ویرا ہندی پریوار بچ،  
جنی دیر کھیڈنا پیاراں نال کھیڈیئے



جان والیا جا نہ بیبا، اک واری پھر میرا ہو جا  
دل ڈب چلے، وچ ہنیرے، مڑ کے سرخ سویرا ہو جا  
جو کجھ ہو یا بیتیا چھڈ دے لیکاں پٹن دا کیہ فائدہ  
میں وی من نوں ایہہ سمجھائی سر پیروں سمجھ تیرا ہو جا  
مانک جنم امولک ہیرا، رسیاں رسیاں بیت نہ جاوے  
دل دروازے کھولھ پیارے، مڑ سچناں دا ڈیرہ ہو جا  
پہلاں قلعے اسار ہوائی، پھر اوہدی رکھوالی کردیں  
میری من لے، دیوے خاطر، کچے گھریں بنیرا ہو جا  
اگنی دا ونجارا بن کے، پھریں بھٹکدا عالمگیرا  
باغ بچے ساڈن دی تھاں، دھرتی پت پھلیرا ہو جا  
دہشت خوف سہم دے اکو نقطے اندر سمٹ گیا ایں  
پھیل گلابی مہک وانگراں، بندو دی تھاں گھیرا ہو جا  
ہر مشکل دا حل ہندا ہے، جے وشواس پکیرا ہووے  
سرب شکستیاں تیرے اندر، بے ہمتی چھڈ، جیرا ہو جا





شاماں نوں سورج جاندیاں اقرار کر گیا  
مڑیا نہ ساری رات حداں پار کر گیا  
محرم دلاں دا کنڈ کر کے دور بہہ گیا،  
پچھو نہ دل دا حال کی، بیمار کر گیا  
قدماں توں کچھ کو دور پر روحوں کروڑاں میل،  
خورے پتہ نہیں کون ایہہ دیوار کر گیا  
ماراں آواز، پرٹ آوے پھر توں میرے کول،  
دیکھو بے رحم وقت کیہ کیہ وار کر گیا  
مینوں نظر بھر دیکھیا، پہچانیا نہیں  
دساں کوں میں روح تے کنا بھار کر گیا  
یاداں چوں کاہدا نکلیا دلدار ملکڑے،  
میرا وجود برف، ٹھنڈھا ٹھار کر گیا  
میرا خواب گھل گیا، شہداں جی اس طرحاں،  
امبر، سمندر، دھرت نوں پرچار کر گیا



واتاورن وگڑدا جاوے، لا دیئے وشواس دا بوٹا  
بہت ضروری من وچ لاؤنا، کھیڑے ونڈدی آس دا بوٹا  
من پردیسی گھر نہیں مڑیا، ڈمگ ڈمگ ڈول رہیا ہے  
روز دیہاڑی فیل رہیا ہے، عجب جے بنواس دا بوٹا  
اپنی دھرت پرانی لگدی، نظر جویں پتھرا چلی ہے  
کنکریٹ دے جنگل اندر اک وی نہیں دھرواس دا بوٹا  
چاٹر چتر کرے چترائی، پیار وکھاوے جسم پلو سے  
ڈنگدا خون جگر دا منگدا روح دے اندر لاس دا بوٹا  
فصلاں والی دھرتی بنجر، اجڑ چلے سپن بچے  
برکھاں نال لمکدے اتھرو، کھا چلیا سلفاس دا بوٹا  
چتر شیطان دی حرکت ویکھو، کر لیا ہے وگیان پالتو  
گملے اندر لا دتا ہے، ہڈیاں بن ہی ماس دا بوٹا  
آپو اپنی ذات وڈیری، امرویل جد فیلردی ہے،  
ایس طرحاں ہی سک جاندا ہے، سانجھاں دے اتھاس دا بوٹا



دیس پنجاب دے برخوردارا اپنی سُرَت سنبھال دولیا  
تیرے چار چپھیرے تنیا، شہری تندوآ جال دولیا  
مرزے پچھے واہر پئی ہے، ون سونے دشمن لکھاں  
سروں مڑاسا لتھیا تک لے، گل وچ الجھے وال دولیا  
بین، بنسری، ڈھڈ سارنگی، تومبا وٹھلی واماں مارے  
آ جا وے میرے لاڈاں جایا، خوشبو آن سنبھال دولیا  
ریتلیاں ٹبیاں وچ گوکے گھبون ظالم روڑھی جاندے  
حاکم پتھر چت نے ہو گئے، ہو گیا مندڑا حال دولیا  
گھر دی کنجی کھوہ کے ساتھوں، باغ گھیریا مغلاں ساڈا  
ونڈ رہے نے آپنیاں نوں، جیوں چوری دا مال دولیا  
ستلج سنے بیاس تے راوی وسر گئے نے تینوں کیوں وے  
توں جنھاں توں ترنا سکھیا، بھلیوں اصلی چال دولیا  
شیر دیاں ماراں تے جد وی ویکھاں گدڑ کرن کلولاں  
انج کیوں لگدے مینوں پترا، کردا کوئی حلال دولیا



رات پئی ہے، پھر کیہ ہويا، میں نہ ہن دگير بناں گا  
اگن بان ہاں، وکھ لیو میں، رات دی ہک وچ تیر بناں گا  
نال شکریاں لڑدے لڑدے، جھپٹ مار دے بازاں خاطر  
چڑیاں دی دھر پالدياں میں، ظالم لئی شمشیر بناں گا  
کنک دے بدلے انکھ وچ کے، دھرتی تے کیوں بھار بناں میں  
رات دے کالے چہرے اتے بلدی سرخ لکیر بناں گا  
ہور کسے نوں کراں جوڈڑی، من کے اپنا بھاگ ودھاتا  
ہرگز ایہہ نہ ہونا میتھوں خود اپنی تقدیر بناں گا  
جگنو، چن اسکھاں تارے، کنے میرے یار پیارے  
ایں طرحاں ہی جگدا جگدا میں سورج دا ویر بناں گا  
آدی جگادی سچ تے پہرہ، دین لئی میں حاضر ناظر  
جبر ظلم نوں میٹن دے لئی، چانن دا ہمشیر بناں گا  
ماتا دھرت سہاگن میری، بنی ابھاگن، جسدے کر کے  
برکھ بروٹے پون دین گے، میں وی نزل نیر بناں گا



جھڑ گئے پت پُرانے بھاویں، رت نویاں دی آئی نہیں  
تاہیوں رسم نبھاؤن لئی میں دتی اج ودھائی نہیں  
مودی خانے اندر سودا جنا وی سی وک چکیا،  
کیہدا ہوکا ہن دیووگے، نویں رسد جے پائی نہیں  
تن زخمی ہے، روح تے چھالے، لگدے من پردیسی ہے،  
خود نوں پچھ کے دسیو آپے، کس دی شامت آئی نہیں  
میں جے چپ ہاں، ایہہ نہ سمجھو، چور سادھ پہچاناں نہ،  
دیکھن نوں ہی سدھرا لگداں، اپنا وی شودائی نہیں  
وطن میرا برباد کردیو، ایہہ گل چیتے رکھ لینا،  
من دی کھوٹ سمجھدے لوکیں، ہن چلنی چترائی نہیں  
چوراں دے ہتھ، ڈانگاں دے غز، سندے ساں، اج ویکھ لئے،  
پہریدار برابر دوشی، جس راکھی کروائی نہیں  
پونی صدی گزارن مگروں کچے ویڑھے پچھدے نیں،  
حکمران جی، اوہ آزادی ساڈے گھر کیوں آئی نہیں





جیہناں سازاں وچوں سرتے تال بھندا اے، اوہ ہر بچن رگل دی شاعری وچوں دوہاں پنجاباں دے سرت  
تال تسمیں بڑی اسانی نال مان سکدے او۔ دوہاں ونڈے دیساں دی چڑ ساڈی ایس نسل نے وی بھوگی  
ہے تے آون والی نسل وی بھوگے گی۔ رگل جی دی شاعری وچ کھڑا ہے اوہ اکھروں تہانوں لہجہ جان گے  
جیہڑے اج دے پڑھن ہار لینی بلکل ان جانو ہوسن۔

ایہہ نرا بولی دے پکس نوں مانن والی کتاب ای نہیں سگوں اجو کے چل رہے دیہار دے ماڑو مونہہ زور  
ویہن ہارے جانکاری دیندا ہویا اک شاعر دا لاشعوری اظہار وی اے۔ اوہ شیواں ٹوں کیویں رت بدلدی  
ویکھدا اے تے نال گڑھدا اے، اوہ راہ دسیون والا اوہ راہنما وی اے جو سوچ، شعور دا دیوا پھڑ کے  
نویں پیڑھی دے اگے ہونڈدا اے۔

میں دلوں بچانوں "سرتال" دے ایس وجدے لفظی سرائ نوں ادبی دنیا وچ جی آیاں آکھدا ہاں۔ تے آس  
کرداں رگل ہوری اپنا قلمی سفر جار رکھن گے۔

بابا منجی (لاہور)



ਪੰਜਾਬੀ ਸੰਤ ਜ਼ਿਆਦਤ ਅਕਾਦਮੀ  
ਗੁਰਮਿਤਰ



SATVIC  
BOOKS

ISBN 978-81-87526-91-2



9 788187 526912